

# Asun Wankláán Ání

## Mateo

### Lówanlín

Yesu Anáin Ulínto  
(Luka 3:23-38)

**1** <sup>1</sup>Yesu Kristo, Owíe \*Dawid mu na, \*Abraham mu na ámu ulínto ní.

<sup>2</sup>Abraham lókwú Isak. Isak lókwú Yakob. Yakob lókwú Yuda mua mu apio yinhé<sup>a</sup>. <sup>3</sup>Yuda lókwú Peres mua Sera. Amú yín gyí Tamar. Peres lókwú Hesron. Hesron lókwú Ram. <sup>4</sup>Ram lókwú Aminadab. Aminadab lókwú Nahson. Nahson lókwú Salmon. <sup>5</sup>Salmon lókwú Boas. Boas mu yin gyí Rahab. Boas lókwú Obed. Obed mu yin gyí Rut. Obed lókwú Yisai. <sup>6</sup>Yisai lókwú Owíe Dawid.

Owíe Dawid lókwú Salomo. Salomo mu yin gyí ɔtsi ɔkwá teki ogyi Uria mu ka. <sup>7</sup>Salomo lókwú Rehabeam. Rehabeam lókwú Abia. Abia lókwú Asa. <sup>8</sup>Asa lókwú Yehosafat. Yehosafat lókwú Yoram. Yoram lókwú Usia. <sup>9</sup>Usia lókwú Yotam. Yotam lókwú Ahas. Ahas lókwú Hiskia. <sup>10</sup>Hiskia lókwú Manase. Manase lókwú Amon. Amon lókwú Yosia. <sup>11</sup>Yosia lókwú Yekonia mua mu apio yinhé. Mu brésú bektá Israelfo, híe amú bee buyétsiá \*Babilon ɔmátó ní.

<sup>12</sup>Amú Babilon yɔtɔ á, Yekonia lókwú Sealtiel. Sealtiel lókwú Serubabel. <sup>13</sup>Serubabel lókwú Abihud. Abihud lókwú Eliakim. Eliakim lókwú Asor. <sup>14</sup>Asor lókwú Sadok. Sadok lókwú Akim. Akim lókwú Elihud. <sup>15</sup>Elihud lókwú Eleasar.

---

<sup>a</sup> 1:2 Apio yinhé ánti gyí Israel abusuan dúanyo ámu anáin ní.

Eleasar lókwú Matan. Matan lókwú Yakob. <sup>16</sup>Yakob lókwú \*Yosef, Yosef létsiá \*Maria. Maria lókwú Yesu. Yesu gyí \*Kristo, (ɔhá ámú Bulu ladá mu ofúli amu) ni.

<sup>17</sup>Mú su tsú Abrahamsu bɔtu Owíe Dawidsu bugyi anáin ulínto dúana. Tsú Dawidsu bɔtu bréá bɔyɔ Babilon ɔmátɔ é bugyi anáin ulínto dúana. Asa tsú amú Babilon yɔtɔ bɔtu Kristo, (ɔhá ámú Bulu ladá mu ofúli amu) kwíúsú é bugyi anáin ulínto dúana.

### Yesu Kristo Kwí

(Luka 2:1-7)

<sup>18</sup>Ɔkpa ánfísv Yesu Kristo kwí lɔtsɔn ni. Bɔpu \*Maria há \*Yosef bæe otsiá. Táme asa bétsiá, abɔfia ɔtsi múa oyin á, bowun ání Maria dé ɔmé \*Ɖɛ Wankíhé túmitɔ. <sup>19</sup>Mu kulu Yosef a, mu asún da ɔkpa, táme omekle ání ɔbɔwa mu pélitɔ. Mú su ɔɔbwe agywun ání obékiná mu ñaintɔ. <sup>20</sup>Táme bréá ɔde mú agywun bwe á, kí, \*Bulu-ɔbɔpu ɔku léle iwí ɔwan súná mu okudetɔ, bláa mu ɔbé, “Yosef, \*Dawid mu na, mánya péli ání fékpa fú ká Maria ba fú wá, tsúfé ɔmé ámú ɔde ámu itsú Ɖɛ Wankíhé túmitɔ. <sup>21</sup>Ɖbɔkwí obiyímbi, bédinká mu dá Yesu. (Mú asi gyí, ‘Ɖlepú.’) Tsúfé mu ɔbéle mu ahá tsú amú lakpantɔ ní.”

<sup>22</sup>Íni léha Bulu asún ámú ɔleblí tsun mu ɔnɔsú ɔtɔipúsv ámu ileba mútɔ. <sup>23</sup>Ɖbé, “Kí, obitebí ání ɔmɔkúyɔ oyin wá kí obénya ɔmé. Ɖbɔkwí obiyímbi, bédinká mu dá Imanuel.” (Mú asi gyí, “Bulu bu aní wá.”)

<sup>24</sup>Bréá Yosef létsinkí á, olegyi asún ámú Bulu-ɔbɔpu amu lébláa mu amúsv. Oletsíá Maria, kpáín mu. <sup>25</sup>Táme ɔmɔpu ibi da Maria, kpéfun bréá ɔɔkwí mu bi yínhé gyankpapu, ɔledinká mu dá Yesu.

### Anyansapu Aku Bá

**2** <sup>1</sup>Bréá Owíe \*Herode dé iwíe gyí Yudea ɔmátɔ ɔkwí Yesu wúlu kvá butetí mú Betlehem, ibu Yudea ɔmátɔ unv. Mú ɔma a, anyansapu akvá butowun atɔ ntsrakpabitɔ botsu owí ɔdalíkpa ɔmá kvɔ ba Yerusalem wúluto. <sup>2</sup>Befité



*Anyansapv lówun mv osúna ání igyi ɔsrakpabi  
owí ɔdalíkpa unv. Mú sv bebá bosúm mv. (Mateo 2:2)*

bee, “Nkúnú bakwíi \*Yudafɔ owíe amu? Anlówun mv osúna ání igyi ɔsrakpabi owí ɔdalíkpa unv. Mú sv abá bosúm mv.”

<sup>3</sup>Owíe Herode lónu asún ánfu á, opúni letsíi mva Yerusalemfɔ fée. <sup>4</sup>Mú sv ɔletɪ Yudafɔ Bulu \*igyí ahapú dehen pú Mose \*mbla asunápú fée fía, fíté amú ɔtínéá bókwií \*Kristo, (ɔhá ámú Bulu ladá mv ofúli amu).

<sup>5</sup>Bebláa mv bee “Betlehem wúluá ɪbu Yudea ɔmátɔ. Alí Bulu \*ɔnɔsɔ ɔtɔɪpú ɔku lówanlín tswɪ nɪ. <sup>6</sup>Ɔbée,  
‘Fú Betlehem, Yudea wúlu,

fumegyí wúlu túkúríbí ɔkpagyíɔkpasu Yudea awúlu yilé ámutɔ.

Tsúfé ɔmású ogyípú ɔku ɔbédalu tsu fútsá,  
ɔbékpa Bulu ahá Israelfɔ.’ ”

<sup>7</sup>Mú su Owíe Herode létí anyansapu amu nkule, fíté amú bréá bowun osúna ɔtsrakpabi amu, bebláa mu. <sup>8</sup>Múú ɔlɔwa amú Betlehem ɔbéé, buyódunká kebi ámu wankláán. Ní bowun mu a, buyínki bebláa mu, méni mu é móyósum mu.

<sup>9</sup>Olenya bláa amú tá alu benatí. ɔtsrakpabi amúú bowun owí ɔdalíkpa amu, lékpa amú alu yélú ɔtínéá kebi ámu bu. <sup>10</sup>Bréá bowun ɔtsrakpabi amu a, ansí lehie gyi amú. <sup>11</sup>Bowie wóyítɔ unu á, bowun kebi ámu mua mu yin \*Maria, beda akpawunu súm kebi ámu. Besankí amú akentebi, bekie mu sika pepe, ɔhíén pú \*ohuam.

<sup>12</sup>Mú ɔma a, Bulu lɔwa mbla há amú okudetɔ ɔbéé, bumáyinkí yótsun Herode wá. Mú su ɔɔtsun ɔkpa bámbású yó amú wúluto.

### Yesu Mua Mu Akwúpú Egyipte ɔmátɔ Yo

<sup>13</sup>Bréá anyansapu amu benatí á, \*Bulu-ɔɔɔpu léle unu ɔwan súná \*Yosef okudetɔ, bláa mu ɔbéé, “Kusu, afukpa kebi ámu mua mu yin sri ya Egyipte ɔmátɔ. Mlutsia unu yófun bréá nébláa fu mbéé mlyínki ba, tsúfé Owíe Herode obódunká kebi ámu, mɔ mu.”

<sup>14</sup>Mú su Yosef lókusú onyé-onyé ámu, kpá Maria mua kebi ámu sri ya Egyipte ɔmátɔ. <sup>15</sup>Betsiá unu yófun bréá Herode lówu. Íni léha Bulu asún ání ɔleblí tsun mu ɔnɔsú ɔtɔpú ɔkusu leba mútɔ. ɔbéé, “Neti mí bí ámu tsú Egyipte ɔmátɔ.”

### Betlehemfɔ Abí Mɔ

<sup>16</sup>Bréá Owíe \*Herode lówun ání anyansapu amu bamlé mu a, ɔblɔ lehie kítá mú. ɔlɔwa mu ɔsá akɔpú ɔbéé, buyó Betlehem wúluto pú mú nkudasí, abuyɔmɔ abi yinhé ání bahɔ tsú nfinyɔ ba ayasí féé. Tsúfé anyansapu amu bebláa mu beé, begyankpá wun ɔtsrakpabi amu nfinyɔ ní.

17Ínu léha Bulu asún ání ɔleblí tson mu ɔnɔ́sú ɔtɔ́ipú  
\*Yeremiasu leba mútɔ́. 18Ɖbéɛ,

“Bonu isú móa olú kvá umeká tin Rama wúluto.

Rahel dé mu abí sú. Omotsulá ání bukpáta mu,  
tsúfé butráa buma unv.”

### Yesu Mva Mu Akwúipú Yinkí Tsú Egypte

19Owíe Herode lowu ɔma a, Bulu-ɔbɔpu léle iwí ɔwan  
súná Yosef okudetɔ Egypte unv, bláa mu ɔbéɛ, 20“Kusu,  
afukpa kebi ámu mva mu yin, amliyinki yɔ \*Israel ɔmátɔ́.  
Tsúfé ahá ámú bodunká ání bómo kebi ámu, bawú.” 21Mú  
su Yosef lókusú kpá kebi ámu mva mu yin, beyinkí yɔ Israel  
ɔmátɔ́.

22Táme bréa bowie unv á, olonu ání Arkelao latsiá mu  
si \*Herode obiású, ɔde Yudea ɔmású gyí. Mú su olenya  
ifú ání ɔbɔpu kebi ámu ya unv. Bulu lélawá mbla há mu  
okudetɔ ɔbéɛ, ɔpú mu ya Galilea ɔmátɔ́. 23Mú su bɔɔɔ  
yétsiá Nasaret wúluto. Ínu léha Bulu asún ámú ɔleblí tson  
mu ɔnɔ́sú atɔ́ipúsu ɔbéɛ, “Béti mu Nasaretyin” amu ileba  
múttó ní.

### Asú Ɖbɔpú Yohane Bulu Asún Ɖkanda

(Marko 1:1-8; Luka 3:1-18; Yohane 1:19-28)

**3** 1Bré kvɔtɔ́ á, Asú Ɖbɔpú Yohane léba ɔde Bulu asún  
ɔkan da Yudea \*dimbísú. 2Ɖbéɛ, “Mlɔdamli klɔntɔ́,  
amlisi lakpan bwe, tsúfé \*Bulu iwíegyí lawíé wóyí tá.”  
3Yohane iwí asún \*Bulu ɔnɔ́sú ɔtɔ́ipú \*Yesaia lówanlín  
ɔbéɛ,

“Ɖku dékplɔn dimbísú ɔbéɛ,

‘Mlɔla aní Wíe ɔkpa.

Mlɔswii ikpa ha mu’ ” amu ní.

4Yohane lówa \*kpɔ́sɔ́-imi atadɛ, ɔɔpu ɔwɔlɔ́-kpákpá  
ɔfé klí músú. Atsantsanku pú ɔkwén otegyi. 5Ahá botsu  
Yerusalem wúluto, Yudea ɔmátɔ́ pú Yordan bunkpa ɔnɔ́  
awúlu féésú ba bonu mu asun blíhé. 6Bele amú lakpan blí,  
ɔɔɔ amú \*asú Yordan ntsutso.

7Táme bréá \*Farisifo pú \*Sadukifo tsotsɔtsɔ beba beɛ, ɔbɔɔ amú asú á, ɔlefíté amú ɔbéɛ, “Abe abí-aná, ntu gyá mli, mliśrí Bulu usbutí ámúb íbá ámu? 8Mómú mliświe abía íbósuná ání lélé mliladámli klvntɔ. 9Mlumáki mliaa, mli náin gyí \*Abraham. Mú su Bulu méébutí mli usu. Nde mli bláa mbéɛ, Bulu ɔbétalí há abwi ánfí íbédamlí Abraham abí-aná. 10Séi á, Bulu lapú efé yi nyí-atsitsitɔ. Oyígyíoyí ání imoswie abi wankláán á, bókun mú dá, wá mú féé ogyá. 11Mí mú á, ntsu ndepubó mli asú púsúná ání mliladámli klvntɔ. Táme ɔkúvá ɔdvn mi bu ɔma ɔbá. Mmɔfun ání nósvrá mu ntukvta kúrúá. Mu ɔbópu \*Dɛɛ Wankíhé pú ogyá bó mli asú ní. 12Dde mu ílín, ɔbópufúní ntéte lé ayó ámutɔ. ɔbékpa ayó ámu wá mu odudutɔ. Táme ɔbéféí ofuníkpa unu wankláán, kpá ntéte amv wá ogyá ání itamaduntɔ.”

### Yesu Asúbɔ

(Marko 1:9-11; Luka 3:21-22)

13Yesu lótsu Galilea ɔmátɔ ba Yordan ntsu ɔnɔ Yohane wá ɔbéɛ, ɔbɔ mu asú. 14Teki Yohane mótsulá ání ɔbɔbɔ mu asú. Íni su ɔlebláa Yesu ɔbéɛ, “Mí ilehián ání fóbɔ asú. Nkálí ígyi sù faba fee mí ɔbɔɔ fú asú?”

15Yesu lébláa mu ɔbéɛ, “Séi á, ha atsu mú alí asa, tsúfé ilehián ání abóbwe tógyítáá ida ɔkpa Bulu ansítɔ.”

Mú su Yohane lótsulá. 16Bréá ɔbɔbɔ Yesu asú tá, Yesu lédalí ntsu ámutɔ alí nwulótáa lefinkí, olowun Bulu Dɛɛ dekplí fé abróduma, ilobogyonká musu. 17Inu ɔme kv lotsu ɔsúsú ɔbéɛ, “Óni gyí mí Bía ntɔdwé mu, mi ansí tehié gyi mu iwí ní.”

### Yesu Isókí

(Marko 1:12-13; Luka 4:1-13)

4 1Inunu \*Dɛɛ Wankíhé amv lékpa Yesu ya \*dimbísú, méni ɔbunsám ɔbɔɔ mu ki. 2Oletsíá unu \*klí ɔnɔ nke advana (40), onyé advana (40). Mú su akún lehué kítá mu. 3Inu ɔbunsám lóɔ mu ki, bláa mu ɔbéɛ, “Ní Bulu mu Bi fúgyi á, mómú ha abwi ánfí idamli bwe bodobodo.”

4 Yesu léle mú ɔ́nɔ́ ɔ́bée, “Bɔ́wanlín wá Bulu asún ámutɔ́ bée, ‘Megyí atogyihe wule nyankpusa obégyi tsiá nkpa, táme ɔ́pú Bulu asun blíhé é tsiá nkpa.’ ”

5 Ɖbunsám lékpa mu ya Yerusalem, wúlu wankíhé amutɔ́, ɔ́ɔ́pɔ́ mu yéluí \*Bulu ɔ́tswékpa obu ámu ɔ́tántra. 6 Inu ɔ́lebláa Yesu ɔ́bée, “Ní Bulu mu Bi fúgyi lélé á, tu kpayi. Tsúfé bɔ́wanlín wá Bulu asún ámutɔ́ bée,

‘Bulu ɔ́béha mu abɔ́pɔ́ békpatá fú ibutɔ́,  
méni fú yabi méeda ibwi kukusu.’ ”

7 Yesu léle mú ɔ́nɔ́ ɔ́bée, “Betrá wanlín bée, ‘Mákapú fú Wíe Bulu ki.’ ”

8 Mú ɔ́ma a, Ɖbunsám lópu mu ya ibu fúáhé kusu, olosuná mu ɔ́yítɔ́ iwíe ogyíkpa fée, pú mú numnyam. 9 Múú ɔ́lebláa mu ɔ́bée, “Ní féda akpawunu súm mí á, nópu íni fée há fú.”

10 Yesu lébláa mu ɔ́bée, “Ɖbunsám, nati tɛi mísú! Tsúfé bɔ́wanlín wá Bulu asún ámutɔ́ bée, ‘Da akpawunu ha fú Wíe Bulu. Mu nkule fu súm.’ ”

11 Inu Ɖbunsám lénatí mu wá, \*Bulu-abɔ́pɔ́ beba beki musu.

### Yesu Gyumagyihe Asutsuá Galilea Ɖmátɔ́

(Marko 1:14-15; Luka 4:14-15)

12 Mú ɔ́ma a, Yesu lónu ání bakítá Yohane tswi obu, oleyinkí ba Galilea ɔ́sulúsu. 13 Olotu tsú Nasaret wúlutɔ́ yó Kapernaum, wúluá ibu mantáa Galilea ɔ́pu ɔ́nɔ́, Sebulon múa Naftali ɔ́sulúsu. 14 Mu inu yɔ́ léha asún ámutɔ́ Bulu \*ɔ́nɔ́sú ɔ́tɔ́pú \*Yesaia léblí ámu uleba mútɔ́. Ɖbée,

15 “Sebulon pú Naftali  
ɔ́sulúvá ida Yordan bunkpa ɔ́nɔ́, mantáa Galilea  
ɔ́pu.

Galilea ɔ́mátɔ́ ɔ́má bámbásúfɔ́ butsie.

16 Ahá ánfí butsie oklúntɔ́ ánfí  
bawun wanki kpɔ́nkɔ́nkɔ́nti ku.  
Butsie ɔ́sulúvá lowu dé iwíe gyí músú.  
Wanki ku lawánkí wúlí amósú.”

17 Tsú inu Yesu léfi asi ɔ́de Bulu asún ɔ́kan da, blí ɔ́bée, “Mlɔ́damli kluntɔ́, \*Bulu iwíegyí lawíe wóyí tá.”

### Akasípú Abaná Le

(Marko 1:16-20; Luka 5:1-11)

18 Eke ɔkuá Yesu ná Galilea ɔpu ɔnɔ á, olowun apíó abanyó aku. Simon ání butetí mu Petro mua mu gyama Andrea, bude asawu tswí, tsúfé aye alepú bugyi. 19 Múú ɔlebláa amú ɔbéé, “Mlɔba bobuo mi. Nóbwe mli anyánkpúsa alepú.” 20 Inunu besi amú asawu aná tswi, kplá buo mu.

21 ɔlenatí yó nkpá kpalobí, olowun apíó abanyó aku é, Yakobo mua mu gyama Yohane. Amúa amú sí Sebedeo bubu ɔkluntɔ, bude amú asawu bíun, Yesu létí amú. 22 Inunu amú é benatí sí amú sí mua ɔklun amu bobuo mu.

### Yesu Atósuná, Mu Asún ɔkanda Pú Ulotsa

(Luka 6:17-19)

23 Yesu léki Galilea ɔmátɔ féé, súná atɔ Yudafɔ \*ofíakpa. ɔleda Bulu iwíegyí ámu iwɔ \*asun wankláán ɔkan. ɔletsa ɔhétɔ múa awútɔ ulɔ kugyíku. 24 Inu su mu iwɔ asún leklei yó Siria ɔmátɔ féé. ɔɔpu alɔpu tsúa ntíné-ntíné ba mu. ɔletsa ulɔ kugyíku, ahá ání bude iwɔɔsun wúun, amúa \*ɔhɛ laláhe dé amú háan, amúa ulɔ dídahe bu amúsú pú abubúpu aná féé. 25 Mú su ɔɔm kɔɔnkɔɔnkɔnti bobuo mu. Ahá ání botsú Galilea ɔmátɔ pú Dekapoli<sup>b</sup> awúlu amusu, Yerusalem wúlutɔ, Yudea ɔmátɔ pú Yordan ntsu ɔbun ɔsulúsu féé.

### Ibusu Atosunáhé

**5** 1 Bréa Yesu lówun ɔɔm amu a, ɔlɔdu yó ibu kusu yétsiá asi, mu \*akasípú amu beba mu wá. 2 Inu olosuná amú atɔ ɔbéé,

### Oyúla Asún

(Luka 6:20-23)

3 “Bulu layúlá ahá ání amú ansí medín tɔtɔsu dun mu Bulu,

<sup>b</sup> 4:25 Dekapoli asi gyí awúlu dú.



tsúfé amúbú mu \*iwíegyí ámu ni.

4 Bulu layúlá awireho agyíró,  
tsúfé obólwií amú klon.

5 Bulu layúlá iwiasí abápu,  
tsúfé amú obégyi ɔsulúv amu ni.

6 Bulu layúlá ahá ání mu apébwe akún múa ɔmewóli  
de amú,  
tsúfé ɔbéha amú bómwe.

7 Bulu layúlá nwe awúnpu,  
tsúfé obówun amú nwe.

8 Bulu layúlá ahá ání amú kluntɔ lowankí,  
tsúfé amú obówun mu ni.

9 Bulu layúlá ahá nsiné alapó,  
tsúfé ɔbétí amú ɔbée mu abí.

10 Bulu layúlá ahá ání budin amúsú mu apébwe sv,  
tsúfé amúbú mu \*iwíegyí amu ni.

11 “Bulu layúlá mli, ní bude mli sia, budin mli sv, bude afunu wa dínká mli sv. 12 Ansí igyí mli, iwí ɔsanki mli, tsúfé mli ɔkɔká tɔɔ ɔsúsú. Alí ɔɔbwe Bulu ɔnósú atɔ́pú agyankpapu amu ni.

### Nfólí Múa Wanki

(Marko 9:50; Luka 14:34-35)

13 “Mligyí ɔyítɔ nfólí ni. Ní nfólí itá ɔdwe á, ntɔ bélapúwá mú ɔdwe? Itráa ma ale há tɔtɔtɔ bwe. Tsei butetséí mú tsítsá, ahá butetsátsa músú tsun.

14 “Mligyí ɔyítɔ wanki é ní. Wúluá idin busu tamanjáín. 15 Butamanywé ɔkandíe, pú ɔlɔ bun músú. ɔfvákpá butɔpúbíán, méni ibówankí há ahá ání butsie wóyí ámutɔ féé. 16 Mú sv mliha mli bwehé iwanki alí, méni ahá bówun mli bwehé wankláán ámu, fówun békanfú mli Sí ámú ɔb ɔsúsú ámu.

### Mose Mbla Iwí Atosunáhé

17 “Mlimáki mliaa, neba Mose Mbla ntée Bulu ɔnósú atɔ́pú amu atosunáhétɔ ɔkakpá. Mmeha mútɔ ɔkakpá, mboún neba

bɔɔbwe mú ifun. <sup>18</sup>Ɔɔɔkwali nde mli bláa, ɔsú mba asi bómɔ ɔɔɔ, táme itoduáhé ntée asúnbi kule kúrää uméedali Mbla ámutɔ, yɔfun bréá mútɔ asún féé laba mútɔ. <sup>19</sup>Ɔhagyíɔha ání omobu mbla ámutɔ túkúrííbi ku, olosuná mu aba é ɔbée bumábu mú á, bétu mu kebi túkúrííbi ɔsúsú iwíe ogyíkpa unu. Táme ɔhá ání olegyi mbla ámu féésú, súná mu aba ání bogyíi músú á, bétu mu ɔha yilé ɔsúsú iwíe ogyíkpa unu. <sup>20</sup>Mú su nde mli bláa mbée, ní mlimɔɔbwe Bulu apé dun Mose \*mbla asunápú pú \*Farisifo ámu a, mlimóowie \*Bulu iwíegyí amutɔ ekekekeke.

### Ɔblɔ lwi Atosunáhé

(Luka 12:57-59)

<sup>21</sup>“Mlilanú ání bebláa mli anáin atutfo ámu beɛ, ‘Mámɔ ɔha. Ɔhagyíɔha ání ɔmɔ ɔha a, Bulu obégyi mu asún, há mu ipón.’ <sup>22</sup>Táme mí mú nde mli bláa mbée, ɔhagyíɔha ání olenya ɔblɔ wa mu ba á, Bulu obégyi mu asún. Ɔhá ání olesia mu ba ɔbée, ‘Ɔhakpan!’ á, obégyi ipón \*Yudafɔ asún agyípú ansítɔ. Ɔhagyíɔha ání ɔlebláa mu ba é ɔbée, ‘Raka!’<sup>c</sup> a, obégyi ipón yɔ usbutí ogyá ání itamaduntɔ. <sup>23</sup>Íni su ní fotsu atɔ hahé foyɔ afɔɔɔɔɔ ɔɔɔkpa, fekaín ání fapú asun laláhe ku gyi fú bá á, <sup>24</sup>si fú atɔ amú yai \*afɔɔɔɔɔ-asubwisu unu. Yɔ fúa munyo amlila mli nsiné, asa afuba ɔɔɔɔ afɔɔɔɔ ámu ha Bulu.

<sup>25</sup>“Ní ɔku ɔsáma fu á, wa ɔsa ha abvyobwií ipa ha mu asa asún ámu ogyíké ifun, méni fú onyabá ámu ɔméeha asún agyípú bumɔɔpu fú ha obu adípúsú ɔkípu, ɔwa fú obu. <sup>26</sup>Mbláa fu ɔɔɔkwali, nkétu faká ɔku ámu féé tá asa féɔɔɔɔ unu.

### Otsiába Ɔmadali lwi Atosunáhé

<sup>27</sup>“Mlilanú ání bebláa mli beɛ, ‘Mákke ɔku tsiába.’ <sup>28</sup>Táme mí mú nde mli bláa mbée, oyingyíoyin ání olowun ɔtsi, ɔɔɔbwe mu klé lwi agywun á, alatɔ mbua dodo mu kluntɔ.

<sup>c</sup> 5:22 Raka asi gyí “Ɔbwu!”

<sup>29</sup>Mú su ní fú gyɔpi nsíbi tehá fútɔbwé lakpan á, loti mú le, tswi tsalífwí. Ibu aléá fú iwí ɔtineku má unu, dun ání bótswí fú nyankpusa-oyí ámu féé wá ɔsubutí ogyá ání utamaduntɔ. <sup>30</sup>Mú su ní fú gyɔpi ibi tehá fútɔbwé lakpan á, ka mú tswi tsalífwí. Ibu aléá fuma ibi kule, dun ání bótswí fú nyankpusa-oyí ámu féé wá ɔsubutí ogyá ání utamaduntɔ.

### **Ɔkákíná Iwí Atosunáhé**

*(Mateo 19:9; Marko 10:11-12; Luka 16:18)*

<sup>31</sup>“Betrá bláa mli beɛ, ‘Ɖhagyíɔha ání obékiná ɔká á, ɔwánlun ɔkákíná ɔwulú ha mu asa.’ <sup>32</sup>Táme mí mú nde mli bláa mbée, ní oyin okíná mu ka ání ɔmɔkúdáli mu ɔma a, muláhá su ɔtsi ámu ɔbédali mu ɔma. Oyingyíoyin ání ɔtsiá ɔtsi ání mu kulu lakíná mu anfi é latɔ mbua.

### **Ntamka Iwí Atosunáhé**

<sup>33</sup>“Mlilétrá nu ání bebláa mli anáin atutíɔ ámu beɛ, ‘Máka ntam kpaali. Mboún bwe dinka ntam amúú feka há Bulu ámusu.’ <sup>34</sup>Táme mí mú nde mli bláa mbée, máka tɔtɔtɔ kúrää. Mápɔ ɔsúsú ká ntam, tsúfé Bulu owíe obíá igyi. <sup>35</sup>Mápɔ ɔsulúv ká ntam. Bulu ayabi oyíkpa igyi. Mápɔ Yerusalem wúlu ká ntam. Awíetɔ Owíe wúlu kpɔnkpɔnti ní. <sup>36</sup>Mlumápɔ mli nwun ká ntam, tsúfé mluméetalí bwé imi kule futútú ntée bíbi. <sup>37</sup>Mboún fú ‘Iin!’ ibwée ‘Iin!’ Fú ‘Ó-o!’ é ibwe ‘Ó-o!’ Kugyíkvá fétrá blí tsíá mótɔ itsú Ɖbunsám wá.

### **Lalahe Ikwaka Iwí Atosunáhé**

*(Luka 6:29-30)*

<sup>38</sup>“Mlilanú ání beblí beɛ, ‘Ɖha obwíe mu ba nsíbi a, bubwíe mu é mu kle ka kwɔ. Ɖha ɔtsíi mu ba iyín é á, butsíi mu kle ka kwɔ.’ <sup>39</sup>Táme mí mú nde mli bláa mbée, mlímáklá ɔha laláhe. Mboún ní ɔha ɔdá fú ɔsvɔ á, damli nyɔɔsi é ha mu ɔdáa. <sup>40</sup>Ní ɔha dékléá ɔbésamáa fu, ho fú atadie á, pu fú tati é ha mu. <sup>41</sup>Ɖhá ání ɔdun fu ɔhíe fú ɔbée, fúsóra mu atɔ máli kule ha mu a, sɔra mú máli anyɔ. <sup>42</sup>Ɖha ɔkúlí fú atɔ á, ha mu. Ní ɔku é ɔbée fupáan mu tɔku á, mákiná.

**Alupódwe lwi Atosunáhé***(Luka 6:27-28, 32-36)*

43“Mlilónuá beblí beε, ‘Dwe fú bá, afulu fú olupú.’  
 44-45Táme mí mú nde mli bláa mbée, mli dwe mli alupú.  
 Mlibo mpái ha ahá ání budin mlisu, méni mlóbwe mli Sí  
 ámúú obu osúsú ámu abí. Tsúfé mutéhá owí telin, ɔtehá  
 nyankpu é itotswie wulí aha wankláán pú aha laláhe  
 féésú. 46Ní fú adwepú nkule futodwé á, upán mɔmu fénya?  
 \*Lampoo ahópu kúráá butobwé ali. 47Ní fú anyawie nkule  
 futowá ɔnó á, nto fakuku bwe dubi? Ali kén ɔmátófo butobwé  
 ní. 48Iní su mlifun fé alá mli Sí ámúú obu osúsú ámu lófun.

**Yilé bwe lwi Atosunáhé**

**6** 1“Mluki wankláán ání mli mɔobwe mli yilé ahá ansító.  
 Ní mlóbwe mú ali á, mli ménya ikóká mli Síá obu  
 osúsú wá.

2“Mú su ní fobwé yilé há ohíani á, máda mú ɔkan fé  
 alá apinabwebí abwepú butobwé Yudafo \*ofiakpa pú dunsu,  
 méni ahá békanfú amú. ɔnɔkwali nde mli bláa mbée, Bulu  
 laká amú iko dodo. 3Táme ní fobwé yilé há ohíani á, máha  
 fú buna obu tóá gyɔpi labwé. Bwe mú ɔainto, 4méni fú Sí  
 oklúnto ató owúnpu amu obéka fú iko.

**Mpáibɔ lwi Atosunáhé***(Luka 11:2-4)*

5“Ní mlóbɔ mpái á, mli mábwe fé apinabwebí abwepú.  
 Amú tekle Yudafo ofiakpa pú dunsu lí bó mpái, méni  
 ahá bówun amú. ɔnɔkwali nde mli bláa mbée, Bulu laká  
 amú iko dodo. 6Táme ní fóbɔ mpái á, bitíwíé fú obutótó,  
 afufin obu wa lwi, ɔ mpái ha fú Sí ɔainto. Fú Sí ɔainto ató  
 owúnpu amu obéka fú iko.

7“Ní mli dé mpái ɔ á, mli mátsiá plá mútó há mú iwa swí  
 fé ɔmátófo. Butosusu beε, ní ɔɔbó mú iwá swí asa Bulu obónu  
 mú há amú. 8Mli mábwe fé amú, tsúfé mli Sí Bulu yín tóá ide  
 mli hián asa mli dé mu kulí. 9Mú su mli ɔ mpái mli aa,

‘Ani Síá fúbu ɔ́súsú.

Ahá bubúu fú dá.

10 Ba begyi iwíe.

Ahá bubwée fú apé ɔ́sulósu, fé aláá butɔ́bwé mú ɔ́súsú.

11 Ha aní atogyiheá íbófun aní nde.

12 Si aní lakpan kie aní,

fé aláá anitesíkíe ahá aní butɔ́pú ílá gyi aní.

13 Mákpa aní wá ísókító, mboún le aní tsu

ɔ́bunsám íbitó.’<sup>d</sup>

14“Tsúfé ní mlesí ahá lakpan kíe amú á, mli Sí á mú ɔ́bu ɔ́súsú ámu é obési mli klé kíe mli. 15Táme ní mlumésíkíe ahá a, mli Sí ámu é oméesíkíe mli.

### ɔ́nókíe íwí Atosunáhé

16“Ní mludé \*ɔ́nókíe á, mlumábwe mli íwí búmbláán fé aláá aku butepina bwé. Aláá ahá bówun aní bude ɔ́nókíe sù butɔ́bwé íwí alí. ɔ́nókwalí nde mli bláa mbée, Bulu laká amú íkó dodo. 17Mboún ní mludé \*ɔ́nókíe á, mlubie ntsu, amlifunya nwun, 18méní ahá bumóowun aní mludé ɔ́nókíe. Táme mli Sí oklúntó ató owúnpu amu mú obówun mli, ká mli íkó.

### Atonyahé Puyáí ɔ́súsú

(Luka 12:33-34)

19“Mlumákíe ató yáí ɔ́sulósu anífu. ɔ́tíné aní atéple butɔ́wí ató, íkó aná tɔ́wí nkanu yíntá, awíkplu é butobwíe wíe obuto wí ató aní. 20Mboún mlíkíe ató yáí ɔ́súsú. lnu mú á, atéple butamawí ató, ítamawí nkanu, awíkplu é butamabwíe wíe obuto wí ató. 21Tsúfé ɔ́tínéá fú siadié bu a, unó fú agywun tetsiá.

### Nyankpusa-oyí ɔ́kandíe

(Luka 11:34-36)

22“Ansíbi igyi ɔ́kandíe há nyankpusa-oyí. Ní fú ansíbi bu alé á, fú nyankpusa-oyí ámu féé bówankí. 23Táme ní

<sup>d</sup>6:13 Ínì bu nwuló dada amu akotó: *Tsúfé fóbú iwíegyi, túmi pò iwíwanki bré féétó. Amen.*

fú ansíbi ma ale a, fú nyankpusa-oyí ámu fée ibu oklúnto. Ní ɔkandíe ámuú ibu futɔ ámu idun a, múmú fawíe oklún kɔnkpɔnkpɔntɔ.

### **Bulu Mwa Atonyahé Iwɪ Atosunáhé**

(Luka 16:13; 12:22-31)

24“Ɔhaa méetalí súm awie anyɔ. Ɔbódwe ɔkule, lú ɔkule. Ntéé obóbu ɔkule, omóobu ɔkule. Fuméetalí súm Bulu, súm kɔba.

25“Mú sv nde mli bláa mbée, mli máhan iwɪ tɔ́a mlégyi, tɔ́a mlónu tsiá nkpa pú tɔ́a mlédídá sv. Mbée, nkpa medéhián dun atogyihe? Ntéé ɔyɔlúv medéhián dun atɔ didáhé? 26Mliki mbubwi, butamadú, butamasíetí wá ɔdantɔ, táme mli Sía ɔbu ɔsúsú tehá amú atogyihe. Mli má labi dun amú? 27Mliɔ ma ɔbétalí han iwɪ pú bré kpalóbí tsía mu nketo?

28“Ntogyi sú mli dé iwɪ háan mli atɔ didáhé sv? Mliki alíá putɔ-oyí ntswítswɪ tedan. Itamayɔ agyúmá ntée lú atati. 29Táme nde mli bláa mbée, Owíe \*Salomo, mu inya féeɔ́ a, ɔmetalí híhie iwɪ, wá akíle fé oyí ntswítswɪ anfitɔ kuku. 30Ní Bulu dé ifá ání nde ulí, ɔke ulawú, bawá mú ogyá tati didá á, ntogyi sú ɔméetalí dídá mli atati dun mú? Mli hógyi mɔtsɔ!

31“Mú sv mli máhan iwɪ fíté mli aa, ‘Ntɔ abégyi?’ ntée ‘Ntɔ abónu?’ ntée ‘Ntɔ abédídá?’ 32Íni aná ɔmátɔ́v butesrí gya ni. Mli Sí ámuú ɔbu ɔsúsú ámu yin ání íni fée de mli hián. 33Itɔ́a mli gyánkpa dunka gyí, Bulu iwíegyi pú mu yilébwe, fówun Bulu ɔbɔpɔ íni fée tsía mútɔ́ há mli. 34Mli másusúu ɔke iwɪ. Ɔketo asún igyi ɔke klé. Ekekegyíeketo asun wunhe ɔ́v há eke ámu.

### **Ulále**

(Luka 6:37-38, 41-42)

**7** 1“Mli mále ahá ulá, méni Bulu ɔméele mli ulá. 2Tsúfé alí ámuú mli dé ahá ulá le ámu a, alí Bulu ɔbéle mli ulá ní. Itɔ́a ɔpɔ́súsu ha fú bá á, mú kén Bulu ɔbɔ́pɔ́súsu ha fú é ní. 3Ntogyi sú fúde ipí tókúríibi wun fú bá nsíbisu, táme

fumedé ogyakpatín ání idun fú klésv mú wun? <sup>4</sup>Ntée ntogyi sù fúde fú bá bláa fée, ‘Ha mí andínki ipí fú nsíbisu?’ bréá ogyakpatín dun fú klésv? <sup>5</sup>Apinabwebí ɔbwepú! Gyankpa dínki ogyakpatín ámu fú nsíbisu, méni fówun ató wankláán, tálí dínki ipí ámu fú bá klésv.

<sup>6</sup>“Mlumápu Bulu atɔ wankíhé há ahá ání bugyi fé akíai, Bulu asón tamawá amú ogyá. Bénya ɔbló dámlí dun mli. Alí kén mlumápu mli abutó wulhe há ahá ání bugyi fé mprákuo ní. Tsúfé bétsatsáa músú, tsíá mú wá ɔdibatɔ.

### Atókulí Tsú Bulu Wá

(Luka 11:9-13)

<sup>7</sup>“Mlikoli Bulu, ɔbéha mli. Mlidunka, mlówun. Mlida mu klunsv, obéfínki mú há mli. <sup>8</sup>Tsúfé ɔhá ání ɔɔkúlí ató tenyá. ɔhá ání otodúnká ató towun. ɔhá ání ɔtedá klunsv bútefínki há. <sup>9</sup>Ma búv mlitɔá mu bi ɔkúlí mu bodobodo a, obótsu íbwi wá mu íbutɔ? <sup>10</sup>Ntée ní ɔkúlí mu iye a, ɔbékutá iwɔ wá mu íbutɔ? <sup>11</sup>Mli lakpan abwepú kúráá mlyin alíá butɔpú atɔ wankláán há mli abí. Ntogyi sù mli Sí ámuú ɔbu ɔsúsú ámu mú mɔɔpu atɔ wankláán há ahá ání bude mu kulí.

<sup>12</sup>“Bwe ha ahá alíá fudeklé fée bubwée ha fu. Íni Mose Mbli pú Bulu ɔnósú atɔípú amu atosunáhé deblí ní.

### ɔkpa Kplanhe Múa Teíhé

(Luka 13:24)

<sup>13-14</sup>“Mlitsun ɔkpa kplanhe amusu, mlóyɔ nkpa ání utamatátó. Ahá kpalobí pé tebí mú. Táme ní mlɔtsun téíhé ámuú íbu atsúnle amusu á, mlóyɔ ɔhíkpa. Ahá tsɔtsɔɔtsɔ tótson músú.

### Oyí Pú Mú Abi Swiehé

(Luka 6:43-44)

<sup>15</sup>“Mliki wankláán ahá ání butɔwá afunu bée, Bulu ɔnósú atɔípú bugyisu. Butepina bwe iwí fé akúfa ba mli wá, táme nkpatakuá bubu iyin búgyi. <sup>16</sup>Amú bwehé mlópubí amú. Butamakpótí kankaba okplóto oyísú, butamakpótí tsɔkpun é

tunkpa uflasu. <sup>17</sup>Oyi wankláán toswié abi wankláán. Oyi laláhe é toswié abi laláhe. <sup>18</sup>Oyi wankláán méetalí swié abi laláhe. Ali kén oyi laláhe é méetalí swié abi wankláán ní. <sup>19</sup>Oyíá utamaswié abi wankláán á, kún butokun mú dá, wá mú ogyá. <sup>20</sup>Mú ali su á, ɔ́nósú atɔ́pú afunupu anfi bwehé mlópubí amú.

### Bulu Iwíegýí Ámvtɔ Awiepú

(Luka 13:25-27)

<sup>21</sup>“Megýí ɔ́hagyíɔ́ha ání ɔ́tetí mí ɔ́bé, ‘Mí Wíé, mí Wíé’ obówie Bulu iwíegýí ámvtɔ. Mboún ɔ́há ání ɔ́ɔ́wé mí Sí ámúbú ɔ́bu ɔ́súsú ámu apé ɔ́ɔ́yɔ́ unu. <sup>22</sup>Bulu asún ogyíké amu a, ahá tsɔ́tsɔ́tsɔ́ béfité mí beé, ‘Mí Wíé, megýí fú dátó anuléblí Bulu ɔ́n asún, gya \*ɔ́ɔ́e laláhe lé ahátɔ, bwé ofúla é ní?’ <sup>23</sup>Unu néle bláa amú mbéé, ‘Mmeyín mli ɔ́kpagyíɔ́kpasu. Mlinati teti mísú, mli lakpan abwepú!’

### Butású pú Osublúto Obuyíi

(Luka 6:47-49)

<sup>24</sup>“Mú su ɔ́hagyíɔ́ha ání olonu mí asun blíhé anfi, olegyi músú á, ogyi fé ɔ́tiansipɔ ɔ́kuá oleyi mu obu dínká butású. <sup>25</sup>Nyankpu lótswié, ntsu lóbulá wa mú, atsufú lótsun wulí músú, táme imobwie. Tsúfé oleyi mú dínká butású.

<sup>26</sup>“Táme ɔ́hagyíɔ́ha ání olonu mí asun blíhé anfi, omegyi músú á, ogyi fé ɔ́ha mimláhe ání oleyi mu obu osublúto. <sup>27</sup>Nyankpu lótswié, ntsu lóbulá wá mú, atsufú é lótsun wulí músú. Obu ámu lobwie, ɔ́leda asi gbloo!”

### Túmiá Yesu Bu

<sup>28</sup>Bréá Yesu léblí asún ánfí tá á, mu atosunáhé leha ɔ́nó lobwie ɔ́ɔ́m amu. <sup>29</sup>Tsúfé olosuná amú ató túmisu. Omosuná mú fé Mose \*mbla asunápú amu.

### Ulo Pepe ɔ́lɔpú ɔ́ku Tsa

(Marko 1:40-45; Luka 5:12-16)

**8** <sup>1</sup>Bréá Yesu lékplí tsú ɔ́bu ámusu á, ɔ́ɔ́m kɔ́nɔ́kɔ́nɔ́kɔ́nti bobuo mu. <sup>2</sup>Unu á, \*ɔ́lo pepe ɔ́lɔpú ɔ́ku



léba beda akpawunu mu ayabito, kókóli mu obée, “Owíé! Ní fótulá á, fétalí há mí iwí béli.”

<sup>3</sup>Mú Yesu létunkí ibi da mu, bláa mu obée, “Natsúlá, fú iwí uplí!” Inunu mu iwí lépli. <sup>4</sup>Mú Yesu léda mu olá obée, “Mábla ohaa asún ánfí. Nati laa afupu fú iwí yosuná Bulu igyí ohapú, afuha mu iwígyurátó amúb Mose mbla losuná tsú ilo pepetsa iwí ámu. Igyi adánsie suna ahá ání fú iwí laplí.”

### Romafó Isá Akópú Ohande Osúmpú Oku Ilo Tsa (Luka 7:1-10)

<sup>5</sup>Yesu lówie Kapernaum wúluto. Romafó isá akópú ohande oku léba mu wá, bóbwií ipa há mu obée, <sup>6</sup>“Owíé, mí osúmpú délo. Alasin tsukole, oda wóyító ode iwíosun wúun dubi.”

<sup>7</sup>Mú Yesu lébláa mu obée, “Néba betsa mu ilo.”

<sup>8-9</sup>Táme ohande amu lébláa mu obée, “Owíé, mmofun ání féba mí wóyító. Fú mú bli asvanku, iwí bówa mí osúmpú amu onlun. Tsúfé mí é mbu ahande aku asi, isá akópú aku é bubu mí asi. Nelé onó mbée amútó oku onátí á, otenátí. Ní mbée obá é á, oteba. Tógyítóá nebláa mí osúmpú mbée obwée á, otobwé.”

<sup>10</sup>Bréa Yesu lónu asún ánfí á, onó lobwie mu, oledamí bláa ahá ámúb bubuo mu amu, obée, “Onokwali nde mli bláa, mmokówun oha ání obu hógyi kponkponi ánfí odu Israelfoto kúráá ku!” <sup>11</sup>Nde mli bláa mbée, “Ahá tsotsotsoto bótsu owí odalikpa pú owí okplíwíékpá ba, betsiá ató ogyíkpá Bulu iwígyí ámutó, amúa aní anáin \*Abraham, \*Isak pú \*Yakob aná bówa ibi gyi ató. <sup>12</sup>Táme béle Israelfo ámúb teki bugyi Bulu iwígyí ámutó atsiápú amu lé unu, tswi amú wá oklúnto. Inú isú múa kpisii bu ni.” <sup>13</sup>Mú oledabláa isá akópú ohande amu obée, “Nati, ibá mótó ha fu fú hógyi onó.”

Ali bré ámutó pépéépé osúmpú amu iwí lówa mu onlun.

### Alapu Tsotsotsoto Tsa (Marko 1:29-34; Luka 4:38-41)

<sup>14</sup>Yesu lóyo Petro wóyító. Oloyo á, owísó lakítá Petro mu sia tsíhé, oda. <sup>15</sup>Mú oleyékutá otsi ámu ibi. Inunu owísó amu lókusú musu, olobwe Yesu afóto.

16 Mú ntúpwesu á, bɔpu ahá tsɔtsɔtsɔcá \*ɔɲe laláhe dé amú háan ba Yesu. Ɖɔɔɔ gya ɔɲe laláhe amu, tsá alɔpu amu féé. 17 Ɔni léha asún ámú \*Bulu ɔɔsú ɔɔɔpú \*Yesaia léblí ámu leba mútɔ. Ɖbéé, “Mvlétsa anu ulɔ, tsú ipian kúsú anusu.”

### Ahá Ání Bɛ Bóbwe Yesu Abúopu

(Luka 9:57-62)

18 Yesu lówun ání ɔɔm babomlí mu, ɔlebláa mu \*akasípú amu ɔbéé, “Mliha afa Galilea ɔpu yɔ mú ɔbun.” 19 Ɔnu Mose mbla osunápú ɔku lébá mu wá, bebláa mu ɔbéé, “Osunápú, nóbuo fu yɔ ɔtínegyíɔtíneá fýɔ.”

20 Yesu lébláa mu ɔbéé, “Awíá bubu mbɔ, mbubwi é bubu asia, táme mí, Nyankpusa-Mu-Bi áni mú mma ɔtíneá nópu mí nwun tswi.”

21 Ahá ámú bubuo mu amɔɔ ɔku lébláa mu ɔbéé, “Owíé, ha mí anyopulá mí sí asa ambobuo fu.”

22 Táme Yesu lébláa mu ɔbéé, “Bobuo mi, afusi awupú abupula amú afúli.”

### Atsufú Asubá

(Marko 4:35-41; Luka 8:22-25)

23 Yesu lówie ɔkluntɔ, mu akasípú amu é bowie buo mu. 24 Bréá bɔyɔ á, afú kɔɔkɔɔkɔɔntu ku lówa tsúun bi. Mú su ntsu deda wíé ɔklun amɔɔ, ideklé ime, táme Yesu mú da ɔɔɔɔɔ. 25 Akasípú amu betsinkí mu, bláa mu bɛɛ, “Anu Wíé le anu. Anidé ntsu wie!”

26 Mú ɔlefuté amú ɔbéé, “Ntogyi sú mlidé ifú nya ali? Mli hógyi mɔtsɔ!” Ɔnu ɔɔkúsú lé ɔɔ wa afú múa ntsu ámu, unu féé ɔɔɔ.

27 Ifú lehie kítá amú, befuté aba bɛɛ, “Nyankpusa ɔmɔmu ni, afú múa ntsu kúráá tonú mu ɔme ali?”

### Ɖɲe Laláhe Gyáa Le Agbedépú Abanyótɔ

(Marko 5:1-20; Luka 8:26-39)

28 Bréá Yesu lówie Galilea ɔpu ɔbun, Gadarafo ɔsulúsu á, ayin abanyót akuá ɔɲe laláhe bu amótɔ bedali tsu afúli

opulákpá befia mu. Amú iyin su ɔhaa tamatálí tsun ɔkpa ámusu. <sup>29</sup>lnonu bɔkplón fité Yesu beɛ, “Bulu mu Bi, amansu igyi? Febá beputí anɪ atɔ asa Bulu ɪsɔbitíbu ɪfɔn?”

<sup>30</sup>Mprákuo tsɔtsɔɔtsɔ aku budegyí unu fún. <sup>31</sup>Mú su ɔɛ laláhe amu bokokóli Yesu beɛ, “Ní fégya anɪ lé ahá ánfɪtɔ á, ha ayowie mprákuo ánfɪtɔ.”

<sup>32</sup>Yesu lébláa amú ɔbéɛ, “Mhɔɔ.” lnonu bedali ayin ámutɔ yówie mprákuo ámutɔ. Amú féé besrí kplí okúku ku wíé ɔpu amutɔ, wúwu.

<sup>33</sup>Mprákuo ámu akpapú besrí yɔ wúlutɔ, yébláa ahá tógyítɔá ulaba ahá ámúú teki ɔɛ laláhe bu amúú ámusu. <sup>34</sup>Mú su wúlu amutɔ ahá féé bedali ba Yesu wá. Bréá bowun mu a, bokokóli mu beɛ, ɔdálɪ amú ɔsulúsu.

### Tsukule Osínpu Tsa

(Marko 2:1-12; Luka 5:17-26)

**9** <sup>1</sup>Mú su Yesu léyinkí wíé ɔkluntɔ, fá ɔpu amu yɔ wúlu amúú otsie múú ámusu<sup>e</sup>. <sup>2</sup>lnu á, aku bɔsɔrá tsukule osínpu akpasu ba mu. Bréá Yesu lówun ání bahɔ mu gyi a, ɔlebláa tsukule osínpu amu ɔbéɛ, “Mí bí, klun idí fú asi. Nasí fú lakpan kíé fú.”

<sup>3</sup>lnu Mose \*mbla asunápú akvá butsie unu, beblí wá nwuntɔ beɛ, “Oyin ánfɪ labɔ mbusuo.”

<sup>4</sup>Yesu lébi amú agywun. Mú su ɔlefíté amú ɔbéɛ, “Ntogyi sù mlidé inu odu gywún? <sup>5</sup>Mɔmu bówa ablílé dun? ‘Nasí fú lakpan kíé fú.’ ntéé ‘Kusu tsu fú akpa afunati?’ <sup>6</sup>Táme ndekléá mlibú ání mí, Nyankpɔsa-Mu-Bi ánfɪ mbu túmi ɔyí ánfɪtɔ sí ahá lakpan kíé amú.” lnu ɔlebláa tsukule osínpu amu ɔbéɛ, “Nde fú bláa mbéɛ, kusu. Tsu fú akpa afunati yɔ wóyítɔ!”

<sup>7</sup>lnu ɔɔkɔsú náti yɔ wóyítɔ. <sup>8</sup>lnu lówa amú féé wánwan, bekanfú Bulu ání alapú túmiá igyi alɪ há anyánkpɔsa.

<sup>e</sup>9:1 Mu wúlu gyí Kapernaum. Kɪ 4:13.

**Mateo Ti***(Marko 2:13-17; Luka 5:27-32)*

<sup>9</sup>Bréá Yesu lópu ɔ́y á, olowun \*lampóo ɔ́hópu ɔ́kuá butetí mu Mateo tsie lampóo ɔ́hókpa. Múy ɔ́lebláa mu ɔ́béé, “Bobuo mi.”

lnunu Mateo lókusú buo mu.

<sup>10</sup>Mateo létí Yesu mua mu akasípú ató ogyíkpá mu wóyító. Lampóo ahópu pú lakpan abwepú tsɔtsɔɔtsɔ beba ató ámu ogyíkpá. <sup>11</sup>\*Farisifo ámu benya wun amú alí, befíté mu akasípú amu beé, “Ntogyi sù mli osunápú mua ahá ánfí odu butɔwá íbí gyi ató?”

<sup>12</sup>Yesu lónu asún ánfí, ɔ́lebláa amú ɔ́béé, “Alɔpu léhián ílɔ ɔtsapú, megyí ahá ání íwí bu amú ɔnlín. <sup>13</sup>Mliyo amliyefíté Bulu asún ánfí bɔwanlín tswí anfi así. Beé, ‘Nwewúun ntekle, megyí igyíha.’ Mmɛba aha wankláán ɔtikpá, lakpan abwepú ɔtikpá neba.”

**Ɔnókli lwi Asun Futéhé***(Marko 2:18-22; Luka 5:33-39)*

<sup>14</sup>Ɛke ɔku Asú Ɔbɔpú Yohane akasípú beba Yesu wá befíté mu beé, “Ntogyi sù ania Farisifo \*anuteklí ɔnó, táme fú akasípú mú butamaklí ɔnó?”

<sup>15</sup>Yesu léle mú ɔnó ɔbéé, “Ɖtsi ɔkpaínpú anyawíeá bobu mu wá bégyi awirehɔ? Ɛkekeke! Táme ɛke ku béba ání békpa ɔká ɔtsiápu amu náti sí amú. Alí nke ámutɔ békli ɔnó ní.”

<sup>16</sup>“Ɖhaa tamapú tati pɔpwe tan tati dada. Tsufé tati pɔpwe amu békpikpú tsíí dáda amu ku lé, há ɔtánkpa unu bélatéí tsía. <sup>17</sup>Alí kén butamapú nta pɔpwe wá ɔwulú-kpákpá kente wuhétó ní. Nta pɔpwe amu íbófu fá kente amu, tsítsá, íbéyintá kente amu é. Íni su ɔwulú-kpákpá kente pɔpwetɔ búɔpú nta pɔpwe wá, méní mú anyɔ ámu féé bétsiá.”

**Ɖhande Ɖku Mu Bi Mva Ɖtsi Ɖku Ílɔ Tsa***(Marko 5:21-43; Luka 8:40-56)*

<sup>18</sup>Bréá Yesu détoí á, Yudafɔ \*ofíakpa ɔhande ɔku léba beda akpawunu mu ayabitɔ, kókóli mu ɔbéé, “Mí bí tsíhé

lawú sésééséí, táme ba afubɔpu ibi dínka musu onya nkpa.”

<sup>19</sup>Mú su Yesu lókvsú, mua mu akasípú bobuo ɔhande amu.

<sup>20</sup>Ɔtsi ɔkuá obugya de mu wulí nfi dúanyɔ ní lótsun yɔ Yesu ɔma, pú ibi da mu tati osiebí. <sup>21</sup>Tsúfé ɔleblí wá mu nwunto ɔbéé, “Ní nɔpú ibi da mu tati kpán á, ɔlɔ bési mí.”

<sup>22</sup>Yesu lédamlí kɪ mu, bláa mu ɔbéé, “Mí bí, klun ɪdí fú asɪ. Fú hógyi latsá fú ɔlɔ.” Inonu ɔtsi ámu ɪwɪ lówa mu ɔnlun.

<sup>23</sup>Bréá olowie ɔhande amu wóyítɔ a, olowun ɪkpe afulípú, nú awɪrehɔ agyípú amu okitikíti. <sup>24</sup>Olegya amú ɔbéé, “Mlɪdalɪ nfi! Otsibi amu mókúwú, didí ɔde.” Ahá ámu ɔmɔsɪ mu. <sup>25</sup>Bréá amú fée bedalɪ ba wunsúnésú a, Yesu lébitíwíé obu ámúú otsibi amu da mútɔ ámutɔ yéktá mu ibi, ɔlɔkvsú. <sup>26</sup>Asún ánfɪ lékleí wá ɔmá ámutɔ fée.

### Ansibi Abwiepú ɔlɔ Tsa

<sup>27</sup>Yesu lédalɪ ɔyɔ á, ansibi abwiepú abanyɔ aku bobuo mu, bude okitikíti surá kpólí mu beɛ, “Owíé \*Dawid mu na, wun anɪ nwe!”

<sup>28</sup>Bréá olowie wóyítɔ a, ansibi abwiepú ámu beba mu wá. Yesu léfité amú ɔbéé, “Mlɪlahogyi mlɪaa, nétalí há mlɪ ansíbi bóbwií?”

Bele mú ɔnɔ beɛ, “Anɪ Wíé, Ee!”

<sup>29</sup>Múú ɔlɔpu ibi dada amú ansíbi, bláa amú ɔbéé, “ɔbá mútɔ ha mlɪ, mlɪ hógyi ɔnɔ.” <sup>30</sup>Inu ɔɔwa atɔ wun bɪ. Yesu léda amú ɔlɔ ɔbéé, bumábláa ɔhaa.

<sup>31</sup>Táme bréá bedalɪ ɔyɔ á, beda mu ɔkan ɔmá ámu féeɔ.

### Omúmu ɔlɔ Tsa

<sup>32</sup>Benya nátí alɪ, ɔɔpu oyin ɔkuá \*ɔɔɔ laláhe bu mutɔ, su alatɔ omúmu ba Yesu. <sup>33</sup>Olenya gya ɔɔɔ laláhe amu lé oyin ámutɔ alɪ, ɔlɔwa tɔí bɪ. Ahá ámu fée bowun, su ɔnɔ lobwie amú. Mú su beblí beɛ, “Anɪmókúwun ɪnɪ odu Israelfɔtɔ kɪ!”

<sup>34</sup>Farisifɔ ámu beblí beɛ, “ɔɔɔ laláhe owíé túmɪ ɔdepuɔɔya ɔɔɔ laláhe lé ahátɔ.”

### Ahá Nwewúun

<sup>35</sup>Yesu léki awúlu pú nkuda fée asi, súná ató Yudafó ofiákpa. Ɖleda Bulu iwíegyí ámu iwí \*asun wankláan ɔkan. Ɖletsá uló kugyíku fée. <sup>36</sup>Bréá olowun ɔdɔm amu a, amú asún lówa mu nwe. Bugyi fé akúfa ání buma ɔkparú, tsúfé asún de amú háan, buma tɔtɔ bwetó. <sup>37</sup>Mú su ɔlebláa mu akasípú ɔbéé, “Ató kpótíhé amu itsɔ, táme mú akpótípú bumɔtsó. <sup>38</sup>Mú su mlíkokoli ndɔ mu wie, ɔwa ató akpótípú tsɔtsɔ abuba bɔkpótí ató ámu.”

### Akasípú Amu Adá

(Marko 3:13-19; Luka 6:12-16, 9:1-6)

**10** <sup>1</sup>Yesu létí mu \*akasípú dúanyɔ ámu, ɔleha amú túmi ání bugyíi ɔhe laláhesu. Bugyáa amú lé ahátɔ, abutsa uló mba iwɔsun kugyíku. <sup>2</sup>\*Sumbí ayɔpú dúanyɔ ámu adá ní: Ogyankparu gyí Simon ání butetí mu Petro mua mu pio Andrea. Yakobo mua mu pio Yohane ání bugyi Sebedeo abí; <sup>3</sup>Filipo, Bartolomeo, Toma, \*lampóo ɔhópu Mateo, Alfeo mu bi Yakobo, Tadeo, <sup>4</sup>Simon ání ogyi iwisutsiá adunkápú ɔpasuato ɔha pú Yuda Iskariot ání ɔlele Yesu há.

### Akasípú Dúanyɔ Ámu Sumbíwa

(Marko 6:7-13; Luka 9:1-6)

<sup>5</sup>Ɖɔwa \*sumbí ayɔpú dúanyɔ ámu sísí, wá mbla há amú ɔbéé, “Mlumáyo ahá ání bumegyí \*Yudafó ɔsulúv pú \*Samariafó awúlu kukusu. <sup>6</sup>Mboún mliyɔ Israelfó wá. Bugyi fé akúfa ání bafwí. <sup>7</sup>Ní mlyóy á, mlída asún ámu ɔkan mlíaa, ‘Bulu iwíegyí amu lawíé wóyí tá.’ <sup>8</sup>Mlitsa uló, amlitsinki afúli. Mlitsa \*uló pepe alɔpú, amligya ɔhe laláhe le ahátɔ. Mlumáhɔ amú tɔtɔ. Mlúbwe mú pukie amú, fé alá napúkíé mlí. <sup>9</sup>Mlumátsu sika kukuuku wá mlí akentetɔ. <sup>10</sup>Mlumátsu akpankogyo ání mlópu ató wá mútɔ há ɔkpa ámu tu. Mlumátsu atadie nyɔɔsi, ntukuta pú oyi yíahé. Tsúfé agyómá ɔyɔpú butehá atogyihe.

<sup>11</sup>“Ní mlyóy swí wúlu kugyíkusu á, mlíduka ɔha wankláan, amliswu mu wá. Mlitsia unv kpɛfun ekeá mlénatí.

12-13 Ní mlowié wóyító unu á, mliha amú itsiá mlihaa, ‘Bulu ɔhá mli iwilwii.’ Ní wóyí ámutɔfɔ bɔhɔ mli á, mli oyúla amu isín amúsú. Táme ní bumɔhɔ mli á, múmú mli oyúla amu isánki ba mli su. 14 Ní bumɔhɔ mli, ntée nú mli asún á, mlidali wóyí ntée wúlu amutɔ, amlɔkpakpa mli ayabito-ɩsu wuli unu. 15 Ɖnɔkwali nde mli bláa mbée, Bulu ɔbébutí amú ɩsu dun Sodom múa Gomorafɔ mu asún ogyíké amu.”

### Ɔwɔsun Ání Ibéba Sumbí Ayɔpú Ámusu

(Marko 13:9-13; Luka 21:12-17)

16 Ɖletrá bláa amú ɔbé, “Mlibi ání nde mli wa fé akúfa ání bɔyɔ nkpatakutɔ. Mlifwifwi ansí fé awɔ, amlɔha mli ɩwɩ ɩtun fé abróɔuma. 17 Mliki mli ɩwɩ wankláán anyánkɔpúsasu. Tsúfé békítá mli ya asún ogyíkpa, nwén mli ató amú \*ofiakpa. 18 Mí su békpa mli ya ɔmású agyípú pú awíe ansító, méni mlégyi mí ɩwɩ adánsɩe súná amúa ɔmátófɔ. 19 Ní bekítá mli ya a, mli mágywíun asún ání mléblí pú alá mléle mú ɔnɔ. Bópu asún ání mléblí bré ámutɔ wá mli ɔnɔ. 20 Tsúfé megyí mli ɔbótɔí. Mli Sí Ɖɔé ámu ɔbótɔí tsun mli su.

21 “Apíó béle amú apíó há lowu. Abí así béle amú abí há. Abí é bókusú líí amú akwípúsu, há bómo amú. 22 Mí su ahá féé bólu mli, táme ní mlétalí wá klɔn líí kínkíínkín yɔfun mú ɔnɔmú á, Bulu ɔbɔhɔ mli nkpa. 23 Ní budun mli su wúlu kutɔ á, mli sɩ yɔ wúlu bámbátó. Ɖnɔkwali nde mli bláa. Mli méeki Israel awúlu amu féésú tá asa mí, Nyankɔpsa-Mu-Bi ání náyinkí ba.

24 “Okasípú tamadun mu osunápú. Osúmpú é tamadun mu wie. 25 Ibwá alé ní ɔkasípú ɔbɔbwe fé mu osunápú, osúmpú é ɔbɔbwe fé mu wie. Ní batálí bude wóyí mu wie amu ɩ beɛ, ‘Ɖbunsám’ ntée ‘\*Beelsebul’ a, múmú ɩda laláhe mɔmu bumɔɔputí mu wóyító atsiápú mú?

### Ɖhá Ání Abénya Ifú

(Luka 12:2-7)

26 “Táme mli mánya ifú. Tɔtɔ má unvá babun ató músú ání bumóobwíí músú. Tógýító é ma unvá ileɔnain ání iméelin

ɔwan. <sup>27</sup>Ní nelé ató súná mli onyé á, mlikplun bli mú ɔpa. Mluda asún ání nébláa mli nklobító é ɔkan. <sup>28</sup>Mlumánya nyankpusa ifú. Ɖbétalí mós mli ɔyulúv, táme ɔméetalí mós mli ɔkláa. Mboún ɔhá ání mlunyá ifú gyí Bulu. Mu ɔbétalí yíntá ɔyulúv múa ɔkláa amu féé usbutí ogyá ání itamaduntó. <sup>29</sup>Megyí káple butefé akénsire anyɔ kéké? Táme amútó ɔkuku tamakpádá ɔsulúv ání mli Sí ámu méyín mú wɪ. <sup>30</sup>Tsúfé Bulu yin mli nwunsv-imi kóráá klátó. <sup>31</sup>Mú sv mlumánya ifú, tsúfé mlibu ibiá dun akénsire tsɔtsɔtsɔ.”

### Adánsɛgyí Pú Asónkiná

(Luka 12:8-9)

<sup>32</sup>“Ní ɔku létalí gyi mí wɪ adánsɛ ahátó á, mí é négyi mu wɪ adánsɛ súná mí Sí ɔsúsú. <sup>33</sup>Táme ní ɔku lékiná mí ahátó á, mí é nékiná mu mí Sí ansító ɔsúsú.

### Ipián Yesu Lóɔɔba, Megyí Iwilwii

(Luka 12:51-53; 14:26-27)

<sup>34</sup>“Imábwe mli fé iwilwii nɔɔɔba ɔsulúv anftsɔ. Megyí iwilwii, mboún ɔdayí ɪya anyɔ nɔɔɔba. <sup>35</sup>Tsúfé abi yinhé múa amú así nsuné báyintá. Abi tshé múa amú ayín é nsuné báyintá. Osia tshé múa mu sia tsíhényɔ é nsuné báyintá. <sup>36</sup>Ɖha alupú bótsu mu wóyító.

<sup>37</sup>“Ɖhá ání ɔtɔdwé mu si ntée mu yin dun mi mófun ání ɔbɔbwe mí ɔkasípú. Ɖhá ání ɔtɔdwé mu bi tsíhé, ntée mu bi yinhé dun mi é mófun ání ɔbɔbwe mí ɔkasípú. <sup>38</sup>Ɖhá ání omotsu mu \*oyikpalíhe bobuo mi é mófun ání ɔbɔbwe mí ɔkasípú. <sup>39</sup>Ní ɔku léprɪ mu nkpa á, ɔbɔhulú mú. Ní ɔku é lɔhulú mu nkpa mí sv á, obénya mú.

### Yilébwe Iwɪ Ukóká

(Marko 9:41)

<sup>40</sup>“Ɖhá ání ɔlɔɔ mli lahɔ mu. Ní ɔku lɔhɔ mu é á, alahɔ mí Sí ámúv ɔlɔɔa mí ámu. <sup>41</sup>Ní fɔhɔ \*Bulu ɔnósú ɔtɔípú ɔfɔv á, Bulu ɔnósú ɔtɔípú oyúla fénya. Ɖhá ání ɔlɔɔ yilé ɔbwepú é ɔfɔv obénya yilé ɔbwepú oyúla. <sup>42</sup>Ɖnɔkwali nde mli bláa.



Ḑhagyíḥa ání ɔleha mí \*akasípúṭo ɔkusv kúráá ntsu-owebi ɔbo olonu a, ɔmóɔhulí mu ipán.”

### Yesu Mva Asú Ḑbɔpú Yohane

(Luka 7:18-35)

**11** <sup>1</sup>Bréá Yesu lópu agyómá ánfí wá mu akasípú dúanyo ámu íbítɔ tá á, ɔɔyɔ yéki Galilea awúlusu, súná ahá ató, dá asón ámu é ɔkan.

<sup>2-3</sup>Asú Ḑbɔpú Yohane da obu, olonu \*Kristo bwehé. Mú sv ɔɔwa mu akasípú abanyó sísí Yesu ɔbéé, buyéfité mu bée, “Fúgyí ɔhá ámuú ɔbéba amu ni, ntée akí ɔha bambá ɔkpa?”

<sup>4</sup>Yesu lébláa amú ɔbéé, “Mlyinki yebláa Yohane asón ání mlɔlabonu pú atóá mlɔlabowun. <sup>5</sup>Mlɔlabowun ání ansibi abwiepú bude ató wun, abɔ buna. \*Uɔ pepe alɔpú iwí deplí. lsv atínpu bude asón nu. Afúli budetsinkí, ahíánfɔ é bude \*asun wankláán ámu nu. <sup>6</sup>Bulu obóyulá ɔhá ání mí bwehé mɔkusú líí musv.”

<sup>7</sup>Bréá Yohane akasípú ámu beyinkí bɔyó á, Yesu lówa tóí tsú Yohane iwí súná ɔɔm amu bí. Ḑbéé, “Bréá mlɔlédalɔ yɔ \*dimbísu ínu á, ntɔ ɔkíkpa mlɔlɔyɔ? Fítáa ání afú de mú tsúvun lóó? Ekekeke! <sup>8</sup>Ní megyí mú á, ntɔ kóún ɔkíkpa mlɔlɔyɔ? Ḑhá ání ɔdídí ntsrim? Ekekeke! Awíe wóyí atati ámu odu adídápú butetsiá. <sup>9</sup>Mlɔbla mí! Bulu ɔnósú ɔtɔípú mlɔlédalɔ yéki? Ee, Yohane ni. Ḑvun Bulu ɔnósú ɔtɔípú. <sup>10</sup>Mu iwí asón Bulu léblí ɔɔwanlín mú tswí bée, ‘Kí, nde obí wa gya fu nkpa. Mu ɔbéla ɔkpa há fú ní.’ <sup>11</sup>Ḑnɔkwali nde mlí bláa mbée, ɔhagyíḥa ání ɔha tsihé laken kwí mófɔn Asú Ḑbɔpú Yohane, táme mu é ɔmɔfɔn Bulu iwíegyí ámuṭo ɔkusv kúráá. <sup>12</sup>Tsú Yohane brésú ɔɔtv nde á, ahá bude Bulu iwíegyí ámu prú ɔwunlínúsú. Awunlínpú bude mú prú. <sup>13</sup>Tsúfé Bulu ɔnósú atɔípú amu pú Mose Mbla ámu ɔɔfɔn Yohanesv féé ɔtɔí tsú Bulu iwíegyí ámu iwí. <sup>14</sup>Ní mlóhɔ asón ámu gyi a, múmú mlébi ání muggyí \*Elia. Mu ɔbéba ni. <sup>15</sup>Ḑhá ání ɔbu asv onúu.

<sup>16</sup>“Séi ánfí á, amendí nɔpu ndemba-abí ánfí kápú? Bugyi fé nyebíá butsie dinsv bude aba kpolí, <sup>17</sup>blí bée, ‘Anɔlpléí

ansigyísú, mlimétsa. Mú su anlalá wá awireho ulu, táme mlimósu.’ 18Mligyí fé nyebí ánfu, tsúfé Yohane léba á, oletsia klí ɔnó, omonu ntá, táme mliaa, ‘Ōŋe laláhe bu mutó!’ 19Táme mí, Nyankpusa-Mu-Bi ánfu mú naba nde ató gyí, nde ntá núu. Mú é mliaa, ‘Mliki opotsuapu pú nta ɔbupú, lakpan abwepú pú \*lampóo ahópú onyawíe.’ Táme Bulu ɔha tsiátó telé mu nyánsa ɔwan.”

### **Ahá Ání Bumedamlí Kluntɔ Asúngyí**

*(Luka 10:13-15)*

20Yesu lópu ɔbló tóí tsú awúlu aku iwí. Awúlu amvá ɔɔbwe ofúla akpɔkpɔnti mótó, táme bumedamlí kluntɔ ámu. 21Ōbéé, “Korasinfo, mligyɔwi. Betsaidafɔ, mligyɔwi ní. Ní Tiro pú Sidon awúlu laláhe amutɔ nɔbwe ofúla akpɔkpɔnti ánfu nɔbwe mlitɔ á, teki bedamlí kluntɔ dododo. Teki buda akpekpetɔ, bakpá nsúó wá nwuntɔ púsúná ání badámli kluntɔ. 22Mliɔ ání Bulu ɔbébutí mli isu mu asún ogyíké dɔn Tiro múa Sidonfɔ. 23Mli Kapernaumfɔ, mlidéklé mliaa mlótsu iwí fúá alu yówo ɔsúsú? Ekekeeke! Bulu ɔbéba mli así yówie afúlitɔ. Tsúfé ní Sodom wúlutɔ nɔbwe ofúla akpɔkpɔnti ánfu odu á, teki wúlu amu itráa bu unu ɔɔtu nde. 24Mlikaɔn ání Bulu obówun Sodomfɔ nwe asún ogyíké amu dɔn mli.”

### **Mlibeda Ɔkpúnú Mí Wá**

*(Luka 10:21-22)*

25Alí bré ámutɔ á, Yesu lóbo mpáí blí ɔbéé, “Mí Sí, ɔsú mu así Owíé! Nedá fú ipán ání falé tóá fɔpuɔáín anyansapu pú asún abipú ɔwan súná ahá ání bumeyín ɔlala, bugyi fé nyebí. 26Ee, Mí Sí! Alí fudeklé fɛe íbá mótó ní.”

27“Mí Sí lópu tógyító wá mí íbutɔ. Ɔhaa méyín Obí ámu, nkéti Ɔsí ámu nkule. Ɔhaa méyín Ɔsí ámu é, nkéti Obí ámu pú ɔhá ání Obí ámu latsúlá ání ɔbéle mu súná mu.”

28“Mliɔa mí wá, mli ahá ání ilapián mli, mli atɔ suráhé de mli dúɔn. Néha mléda ɔkpúnú. 29Mliɔa iwiasí ha mí, amlusuan mí, tsúfé neba iwiasí, nolwíí, méni mlénya iwílwíi.

30Tsúfẹ mí wá tsiá bu atsiálé. Mí ato suráhé é mójodun mli surá.”

**Ɔkpónú Ɖdaké Mu Wie**  
(Marko 2:23-28; Luka 6:1-5)

Mat

**12** <sup>1</sup>Yesu mua mu akasípú bɔtsun ayó ndɔ kutɔ \*ɔkpónú ɔdaké. Akún de akasípú amu, su bɔpusáa ayó ámu ku wí. <sup>2</sup>Farisifɔ aku bowun amú, bebláa Yesu beɛ, “Kí, fú akasípú amu buɔde tɔ́a mbla meha ɔkpa bwe ɔkpónú ɔdaké!”

<sup>3</sup>Yesu léfité amú ɔbéɛ, “Mlumókúkla nu tɔ́a Owíe \*Dawid lɔ́bwe bréa akún de mua mu abúopu kí? <sup>4</sup>Olebitíwíé Bulu osúmka yótsu bodobodoá bapúhá Bulu igyí ba, mua mu abúopu amu begyi. Bulu igyí ahapú nkule beha ɔkpa, butegyí alí bodobodo amu. <sup>5</sup>Mlilakla Mose Mbla, nú ání Bulu igyí ahapú ámu butɔ́yɔ́ agyómá \*Bulu ɔtswékpa unu ɔkpónú ɔdaké, táme butamahá amú ipón. <sup>6</sup>Nde mli bláa mbéɛ, ɔhá ání ɔɔun Bulu ɔtswékpa amu búv nfi á. <sup>7</sup>Bulu asún lɛblí ɔbéɛ, ‘Nwewúun ntekle, megyí igyíha.’ Ní mlyin mú asi á, teki mluméha ahá ánti amú asún da ɔkpa ánti ipón. <sup>8</sup>Tsúfẹ mí, Nyankpusa-Mu-Bi ánti gyí ɔkpónú ɔdaké mu wie nu.”

**Uɔtsa Ɖkpónú Ɖdaké**  
(Marko 3:1-6; Luka 6:6-11)

<sup>9</sup>Yesu lénatí unu, ɔɔyɔ́ Yudaɔ́ ofiakpa. <sup>10</sup>Olowun oyin ɔkúá mu ibi kule lawú unu. Farisifɔ ámu buɔde Yesu tée. Mú su befité mu beɛ, “Mbla leha ɔkpa ání butsáa ulɔ́ \*ɔkpónú ɔdaké?”

<sup>11</sup>Múú Yesu léfité amú ɔbéɛ, “Ní mliɔ́ ɔku bu kufa, alakpáda wíé ibúntɔ́ ɔkpónú ɔdaké á, ɔméele mu? <sup>12</sup>Yée nyankpusa bu labi dun kufa a? Mú su mbla leha ɔkpa ání ɔha ɔbɔ́bwe yilé ɔkpónú ɔdaké.” <sup>13</sup>Múú ɔlebláa oyin ámúú mu ibi lawú ámu ɔbéɛ, “Tɔ́nki fú ibi amu.”

Olenya tɔ́nki mú alí pé, ɔhé lowie mútɔ́ fé nyɔ́ɔsi amu. <sup>14</sup>Táme mú ó á, Farisifɔ ámu bedali yékitá agywun alíá bɔ́bwe bómu Yesu.

### Osúmbi Ání Bulu Léle

15 Yesu lébi amú agywun. Mú su ɔlenatí unv. Ɖɔɔm bobuo mu, ɔletsá amú́tɔ́ alɔpu féé ulɔ. 16 Mú́ ɔleda amú ɔlá ɔbéé, bumáha ahá abubu mu. 17 Ínu léha asún amú́ Bulu ɔnósú ɔtɔ́pú \*Yesaia léblí yáí ámu léba mútɔ́ ní. 18 Ɖbéé,

“Kí, mí osúmpóá nalé ní.

Ntɔdwé mu, mi ansí tegyi mu iwɪ.

Nópu mí Ɖɛ Wankíhé wá mutɔ.

Ɖbébláa ɔmátɔ́fɔ ɔbéé, ‘négyi amú asún ɔnɔkwalsu.’

19 Omégyi nwéén, ɔmɔ́ɔkplún.

Ɖhaa móonu mu ɔnɔ brɔnusu.

20 Obénya klun há ahá ání amú hógyi ɔnɔ ma ɔnln, bábwé fé oyíá ɪlatá bia tá.

Ɖbówa awɪtɔle há ahá ání buma ɔwunlín,

bábwé fé ɔkandíéá nfo latá mútɔ́,

yɔ́fun bréá bébi ání ntegyi asún ɔnɔkwalsu.

21 Ahá ání bumegyí Yudafo bópu ansí dínká musu.”

### Yesu Mva Beelsebul

(Marko 3:20-30; Luka 11:14-23)

22 Inu bɔpu oyin ɔku ba Yesu, ɔɛ laláhe bu mutɔ. Mú su ɪleha mu ansíbi lobwie; álatɔ́ omúmu é. Yesu létsa mu ulɔ, ɔde atɔ́ wúun, ɔdetɔ́í é. 23 Ɖnɔ́ lobwie ahá ámu féé, befité beé, “Megyí Dawid mu na ámu ni?”

24 Táme Farisifo ámu bonu asún ánti á, beblí beé, “Ɖɛ laláhe owíe \*Beelsebul túmi ɔdepuɔɔya ɔɛ laláhe lé ahátɔ.”

25 Yesu lébi amú agywun. Mú su ɔlebláa amú ɔbéé, “Iwíe ogyíkpa ání ɪlaye anyɔ, buɔde aba kɔ bédɪda. Alí kén wúlu ntée wóyí oduá mútɔ́ atsiápú buɔde aba kɔ é itobwíé ní. 26 Mú su ní Ɖbunsám dé mu iwɪ gyáa a, mu iwíegyí bédɪda. 27 Ní Beelsebul túmi ndepuɔɔya ɔɛ laláhe lé ahátɔ á, mómú ma túmi mli abí é buɔdepuɔɔya ɔɛ laláhe lé ahátɔ? Mli abí ámu onutó obégyi mli asún. 28 Táme ínúá Bulu Ɖɛ ndepuɔɔya ɔɛ laláhe su á, mliabi ání Bulu iwíegyí ámu laba mli wá dodo.”

29 Ɔhaa méetalí wíe ɔwunlínpu wóyító yókulá mu ató, nkéti alagyankpá kíklí mu tswi, asa ɔbétalí kúlá mu ató fée.

30 Ɔhá ání omobuo mi dé mí lu. Ɔhá ání ɔmedé mí tsa akpa ahá ba Bulu é dé amú gyáa teía mi. 31 Ínu su nde mli bláa mbée, Bulu obési ahá lakpan pú abususu kugyíku kíe amú. Táme ní ɔku ɔblí \*Ɔɔɔe Wankíhé amu iwí abususu a, Bulu méesikíe mu ekekekeke. 32 Ní ɔku léblí mí, Nyankpusa-Mu-Bi ánti é iwí asun laláhe a, Bulu ɔbétalí sikíe mu. Táme ní ɔku léblí Ɔɔɔe Wankíhé amu iwí asun laláhe mú á, Bulu méesikíe ɔhá ámu nde ɔyi kehe, ntée bré ámúú íbá ámuú.

### Tsiátó Itsú Ukluntó

(Luka 6:43-45)

33 Oyi abí butɔpúbí mú. Oyi wankláán toswié abi wankláán. Oyi laláhe é toswié abi laláhe. 34 Mli awɔ abí-aná! Nkáli mli aha laláhe mlétalí blí asun wankláán? Tsúfé tóá idun ɔha klun a, mútédálí tsu mu ɔnó. 35 Ɔha wankláán teblí asun wankláán tsú mu kluntó, ɔha laláhe é teblí asun laláhe tsú mu kluntó.

36 Nde mli bláa mbée, ɔhagyíɔha ɔbéle asun laláhe kugyíkúá ɔleblí ɔnó Bulu asún ogyíké amu. 37 Tsúfé ɔha asun blíhé Bulu ɔbópohá mu asu ntée ipón.

### Bodunká Ofúla

(Marko 8:11-12; Luka 11:29-32)

38 Múú Farisifo pú Mose mbla asunápú amu aku bebláa Yesu bee, “Osunápú, anidéklé aníaa fubwée osúna ku suna aní.”

39 Ɔlebláa amú ɔbéé “Mli ndemba-abí laláhe ání mliladálí Bulu ɔma. Mlidé osúna dunká amluwun, táme mluóowun kukukukú dun Bulu ɔnósú ɔtɔ́pú \*Yona osúna amu. 40 Alí ámúú Yona létsiá bonsu iwíto nkensá, ɔpa múa onyé ámu a, alí mí, Nyankpusa-Mu-Bi ánti é nétsiá ɔsulúú ɔtɔ́tɔ́ nkensá, ɔpa múa onyé ní. 41 Niniwefo é bókusú Bulu asún ogyíké amu, há mli ndemba-abí ánti ipón. Tsúfé bréá Yona léda

Bulu asún ɔkan súná amú á, bedamlí kluntɔ ba Bulu wá. Mlɪkɪ, ɔhá ání ɔɔɔn Yona onutó líí nfi á. <sup>42</sup>Seba owíe tshé ɔbókú sù líí Bulu asún ogyíke, há mli ndemba-abí ání ɔɔn. Tsúfé olotsu ɔsaasi ɔmá ikvɔ kén gya ɔkpa ba, bonu <sup>\*</sup>Salomo nyánsa atosunáhé. Mlɪkɪ, ɔhá ání ɔɔɔn Salomo líí nfi á.”

### Ɔɔɔ Laláhe Yinkí Ba Ɔhato

(Luka 11:24-26)

<sup>43</sup>“Ní ɔɔɔ laláhe ɪdálí ɔhato á, iteyéki \*dimbísú dúnká ɔkpúnú ɔdakpá, táme utamanyá. <sup>44</sup>lɔn ɪteblí ání ɪbéyinkí yó mú wóyí dadatɔ. Ní ɪsánkí yó á, itowun ání baféí mútɔ, lá mútɔ wankláán, ɪda kpan. <sup>45</sup>Iteyínkí yékpá mú aba asienó ání butɔbwé laláhe dɔn mú, buteba betsiá ɪnɔ. lɔn ɔhá ámu tsiátɔ teyíntá dɔn alá igyi yáí. Alí ɪbéba ha mli ndemba-abí laláhe anfi ní.”

### Yesu Abusuanfɔ Onutó

(Marko 3:31-35; Luka 8:19-21)

<sup>46</sup>Bréá Yesu trá ɔɔɔe ahá ámu asún bláa a, mu yin mu mu apíó beba belú kpankpá, buɔdunká ání bébláa mu asún. <sup>47</sup>Ahá ámuɔɔ ɔku lébláa Yesu ɔbéɔ, “Kɪ, fú yín mu fú apíó bulú kpankpá. Buɔe fú dunká, abubla fu asún.”<sup>f</sup>

<sup>48</sup>Múú Yesu léfuté mu ɔbéɔ, “Amendi gyí mí yín mu mí apíó?” <sup>49</sup>lɔn ɔletinkí ɪbɪ sísí mu akasípú amɔ, blí ɔbéɔ, “Mlɪkɪ, mí yín mu mí apíó gyí ahá ání á. <sup>50</sup>Ɔhagyíɔha ání ɔɔɔbwé mí Sí ámuú ɔbu ɔsúsú ámu apé á, mu gyí mí yín múa mí píó ní.”

### Ató-abí Owunyápu ɪwɪ Yébi

(Marko 4:1-9; Luka 8:4-8)

**13** <sup>1</sup>Eke ámu kén á, Yesu léɔalɔ tsu wóyítɔ yétsiá ɔpu ɔnó. <sup>2</sup>Ɔɔɔm kpɔnkpɔnkpɔntɪ beba befiá bomlí mu.

---

<sup>f</sup>12:47 Mútsú yéɔ 47 ɪma nwulú dada amɔ akutɔ.

Mú su ɔɔɔwú wíé ɔkluntɔ, yétsiá ɔpu amusu, ahá ámu é bulí ɔpu ɔnɔ nu. <sup>3</sup>Lnu olosuná amú atɔ tsɔtsɔɔtsɔ ayébitɔ ɔbéé, “Ɖɔɔɔɔpu ɔku lɔyɔ atɔ-abí owunyákpa. <sup>4</sup>Bréá ɔde mú wunyáa a, iku lɔwulí ɔkpatɔ, mbubwi beba bɔtswetswée mú fée. <sup>5</sup>Iku é lɔwulí abutású, ɔtínéá usi kpalobí din. Mú su ulɔwa ɔsa kwe, <sup>6</sup>táme bréá owí lelun a, ulɔɔ mú mɔ, tsúfé mú nlín mɔyɔ ɔtɔtɔ. <sup>7</sup>Abí ámu ku lobun awutɔ, awu ámu lobulá kítá mú. Mú su umedan. <sup>8</sup>Táme abí ámu ku é lobun ɔsulɔb wankláánsú, ulɔkwe, dan, swie abí. Iku lafa (100), iku aduesie (60), iku é advasa (30).”

<sup>9</sup>Yesu lómɔ mu asún ɔnɔ ɔbéé, “Ɖha ání ɔbu asu onúu!”

### Tɔ́á Svá Yesu Lótɔ́í Ayébisu

(Marko 4:10-12; Luka 8:9-10)

<sup>10</sup>Mu akasípú amu beba befité mu beé, “Ntogyi sú fude amú asún bláa ayébisu?”

<sup>11</sup>Mú ɔlele mú ɔnɔ ɔbéé, “Mli mú á, Bulu lahá mli ɔkpa ɔbéé, mlibí mu \*iwíegyí ámu iwí asun ñáinhé, táme ɔmeha amú mú ali. <sup>12</sup>Tsúfé ɔhá ání odekléá obónu mí atosunáhé amu asi á, Bulu ɔbɔpu iku tsía mútɔ há mu, méni ɔbétra bi tsía mútɔ. Táme ɔhá ání omedékléá obónu mú asi á, Bulu ɔbɔswí mu kpalobí ámú alabí ámu kúráá. <sup>13</sup>Tɔ́á svá nde amú asún bláa ayébisu gyí, bude mú nu, táme bumédé mú asi nu. Bude mú wúun, táme bumédé mú bi. <sup>14</sup>Ahá ání sú Bulu ɔnɔsú ɔtɔ́ípú \*Yesaia asún ání ɔleblí tswí laba mútɔ ní. Ɖbéé,

‘Bónu lánú, táme bumóonu mú asi.

Béki láki, táme bumóowun mú.

<sup>15</sup>Tsúfé amú agywun lawú.

Batílá asu, bun ansíbi é.

Íni su bumóonu, bumóowun é.

Ní megyí ali á, teki bówun atɔ,

bónu asún, amú agywun bóbwií,

bédamlí ba mí wá, nétsa amú ulɔ.’

<sup>16</sup>“Táme mli mú á, Bulu layúlá mli. Mlétalí pú ansíbi wun atɔ, pú asu nú asún. <sup>17</sup>Ɖnɔkwali nde mli bláa. Bulu ɔnɔsú

atɔ́pú pú yilé abwepú tsɔtsɔɔtsɔ bekleá bɔ́pu amú ansíbi wun atɔ́ ánfí, abupu amú asu nu asún ánfí mlídenu, táme bumenya mó alí.

**Atɔ́-abí Owunyápu Yébi Amu Así**  
(Marko 4:13-20; Luka 8:11-15)

18“Mlínu atɔ́-abí owunyápu yébi amu así nga. 19Ahá ání bonú Bulu iwíegyí iwí asún ámu, táme bumonu mó así á, bugyi fé abí ámúú ilobun ɔkpatɔ́ ámu. ɔbunsám teba bele asún ámúú bodu wá amú kluntɔ́ ámu náti. 20Abí ámúú ɔlowulí abutású amu gyí ahá ámúú bonú asún ámu pé, baho mó ansigyísú, 21táme íniá buma nlín su á, itamatsíá amúú yó. Mú su ní budín amúú ntée iwɔɔsɔn ku itú amú asún ámu su á, ununu butedída. 22Abí ámúú ɔlowulí awutɔ́ ámu gyí ahá ámúú bonú asún ámu a, baho mó, táme ɔyí ánfítɔ́ atɔ́ hiánhe iwí gywíín pú múú atonyahé iwí ɔnsípe tegyi Bulu asún ámu su. Íni su butamaswíé abí. 23Abí ámúú ɔlowulí ɔsulú wankláánsú amu gyí ahá ámúú butonú asún ámu, nú mó así. Íni su itehá butɔ́bwé yilé fé alíá atɔ́-abí ámu loswie, iku lafa (100), iku aduesie (60), iku é advasa (30) ámu.”

**Atɔ́-abí Wankláán Pú Ifa Laláhe Iwí Yébi**

24Yesu létrá ha ahá ámu yébi ku ɔbéé, “Bulu iwíegyí ámu igyi fé ɔdɔ́ɔpu ɔkuá oloyódu ayó wankláán mu ndɔ́ɔ. 25Táme onyé, bréá ahá bedí á, mu olupú lóyódu ifa laláhe ání ilelian ayó ámu wá múú, ɔlenatí. 26Bréá ayó ámu lédan, idekwí á, ifá ámu é lelín ɔwan múú. 27ɔdɔ́ɔpu amu apafɔ́ botsu ndɔ́ ámuú ba befíté mu beé, ‘Aní wíé, megyi ayó fodu wá fú ndɔ́ ámuú? Nkúnú ifa laláhe é itsú múú?’ 28Múú ɔlebláa amú ɔbéé, ‘Mí olupú bwehé ní.’ lnu bebláa mu beé, ‘Ní fótulá á, ha ayetsitsíi mú le ayó ámuú.’ 29ɔlebláa amú ɔbéé, ‘Ó-o! Mlíha mú itsia. Ní mlídé mú tsií á, mlétsíi mí ayó ámu é ku tsítsá. 30Mlísi mú féé ilu yófun mú tɔ́nbí. Ní ifun a, nébláa mú atínpu mbéé, bugyánkpa saun ifa laláhe amu, abukli mú tswí ha mú ogyá wa, asa abutun ayó ámu yɔ́wa mí odudutɔ́.’ ”



### Takyí-akpin Ibí Yébi

(Marko 4:30-32; Luka 13:18-19)

31 Yesu létrá ha amú yébi ɔbéε, “Bulu iwíegyí ámu igyi fé takyí-akpin ibí, oyin ɔku lódu wá mu ndɔtɔ. 32 Múgyí túkúrííbi nyí-abí féé́tɔ nu, táme ní idan a, utɔbwé ífá fúáhé dun ífá kugyíku. Mú abámbi tekpíkpli, mbubwi butogyónká mósú.”

### Bodobodotu-afá Yébi

(Luka 13:20-21)

33 Yesu létrá ha amú yébi ku ɔbéε, “Bulu iwíegyí ámu igyi fé bodobodotu-afá ání ɔtsɪ ɔku lóputsiá bodobodo nfúó kente kule, íleha mú lotu.”

### Yesu Lótóí Ayébisu

(Marko 4:33-34)

34 Ayébi anfi odu tsɔtsɔtɔtsɔ oletsíá públáa ɔdɔm amu asún ní. Ɔmebláa amú asún kukvá imegyí ayébi ɔlɔputsí. 35 Ínu léha asún ámú Bulu ɔnósú ɔtɔípú ɔku léblí yáí ámu léba mútɔ. Ɖbéε,

“Nótóí ayébisu

pólé asún ání Bulu lópuháín tsú ɔyí asitsuábi ɔwan.”

### Ífa Laláhe Yébi Amu Asɪ

36 Yesu lénatí ɔdɔm amu wá ba wóyítɔ. Múú mu akasípú amu bɔyɔ mu wá yébláa mu beε, “Le ndɔ ámutɔ ífa laláhe ɪwɪ yébi amu asɪ suna anɪ.”

37 Múú Yesu léle mú ɔnɔ ɔbéε, “Mí, Nyankpusa-Mu-Bi ántɪ gyí atɔ-abí wankláán odupú ámu nu. 38 Nɔ ́ ámu gyí ɔyí ántɪ. Atɔ-abí wankláán ámu gyí Bulu iwíegyí ámutɔ abí. Ífa laláhe amu gyí Ɖbunsám abí. 39 Olupú ámú olodu ífa laláhe abí ámu gyí Ɖbunsám. Atótunbɪ amu gyí ɔyí ɔnómɔké. Ató atínpu amu é gyí Bulu-abɔpu.

40 “Alí ámúú besáín ífa laláhe amu, wá mú ogyá ámu a, alí kén íbéba ha aha laláhe ɔyí ɔnómɔké ámu nu. 41 Mí,

Nyankpusa-Mu-Bi ánfí n'ówa mí ab'opu békpa tógyít'á itehá ɔha t'ɔbwé lakpan pú lalahé abwepú f'éé lé mí iwíegyí amutɔ. <sup>42</sup>B'ótswi amú f'éé wá ogyá k'pɔnk'pɔntitɔ. Inú isú m'úa kpisíi bu ni. <sup>43</sup>Táme yilé abwepú mú b'ówankí fé owí amú Sí Bulu iwíe ogyík'pá unu. ɔhá ání ɔbu asu onúu."

### Siadɛ Méntíhé lwi Yébi

<sup>44</sup>Yesu létrá ha amú yébi ku é ɔbéé, "Bulu iwíegyí ámu igyi fé siadɛ kuá bopulá ɔsulúv kusu. Oyin ɔku léyémentí mú, lánjáin mú. Mú lwi ansigyí su á, ɔleyéfe mu at'ó f'éé p'úb'ɔhɔ ɔsulúv amu."

### Abutó Wólíhe lwi Yébi

<sup>45</sup>Bulu iwíegyí ámu utráa gyi fé ibiá ogyípú ɔkuá ɔna ɔde abutó wólíhe dunká ɔhɔ. <sup>46</sup>Bréá olowun butóbi wólíhe kule péá thíé bu ibiá á, ɔlefe mu at'ó f'éé p'úy'ɔhɔ butóbi amu.

### Asawu lwi Yébi

<sup>47</sup>Bulu iwíegyí ámu léla igyi fé asawu ání b'ɔtswi wa ɔputɔ lé aye ɔtsan-ɔtsan. <sup>48</sup>Bréá aye l'ɔbulá mú á, aye alepú ámu bebitíá mú ba ɔpu ɔn'ó. Betsiá asi, t'ósí gyíhe amu wá blanwét'ó, tswi múá butamagyi tsítsá. <sup>49</sup>Alí íbéba ɔyí ɔn'óm'óké ámu ni. Bulu-ab'opu béba b'ɔt'ósí aha laláhe lé aha wankláánt'ó. <sup>50</sup>F'ówun batswi aha laláhe amu wá ogyá k'pɔnk'pɔntitɔ. Inú isú m'úa kpisíi bu ni.

### Atonyahé P'ɔpwe M'úa Dáda

<sup>51</sup>Yesu léfité mu akasípú ɔbéé, "Mlulanú mú f'éé asi?"

Bee, "Ee, anlanú mú asi."

<sup>52</sup>M'ú ɔlebláa amú ɔbéé, "M'úmú mbla osunápú oduá alakásí Bulu iwíegyí ámu lwi asún é bí á, ogyi fé w'óyí mu wie oduá ɔtelé at'ó p'ɔpwe m'úa dáda f'éé tsú mu at'ó ɔyaík'pá."

### Bum'ɔhɔ Yesu Mu Wúluto

(Marko 6:1-6; Luka 4:16-30)

<sup>53</sup>Yesu lénya m'ó mu ayébi amu ɔn'ó alí, ɔlenatí unu. <sup>54</sup>Oleyinkí y'ó mu onutó wúluto Nasaret, oloyósuná at'ó

Yudafɔ ofiakpa. Mu atosunáhé leha ɔ́nɔ lobwie ahá ámu féé. Mú su befité aba bæ, “Nkúnú olenya nyánsa múa ofúlabwe túmi ánfɔ é tsú? <sup>55</sup>Megyí ató osrépú mu bi ámu ni? Megyí mu yin gyí \*Maria, mu apio yinhé gyí Yakobo mua \*Yosef pú Simon mua Yuda? <sup>56</sup>Yéé ania mu apio tshé tsie nfi á? Múú nkúnú olenya íni féé tsú?” <sup>57</sup>Íni su mu asún lókusú líí amúsú.

Yesu lébláa amú ɔ́béé, “Ahá butobú Bulu ɔ́nɔsú ɔ́táírpú ɔ́tínegyíɔ́tíne, táme mu onutó wúlutɔ́fɔ pú mu wóyítɔ́ ahá mú butamabú mu.” <sup>58</sup>Íniá bumɔ́hɔ mu gyi su á, ofúla kpalobí ku pé ɔ́ɔ́bwe inu.

### Asú Ɖɔ́pú Yohane Lowu

(Marko 6:14-29; Luka 9:7-9)

**14** <sup>1</sup>Galilea ɔ́má́sú ogyí́pú \*Herode lónu Yesu iwɔ́ asún alɔ́ bré ámutɔ́. <sup>2</sup>Múú ɔ́lebláa mu asúmpú ɔ́béé, “Asú Ɖɔ́pú Yohane amu ni. Múlákúsú tsú afúlítɔ́. Mú sú ɔ́de ofúla anfi odu bwe ní.”

<sup>3-4</sup>Bré kutɔ́ á, Yohane létsiá bláa Owíe Herode ɔ́béé, mbla meha ɔ́kpa ání otsiá mu pio Filipino mu ka Herodia. Íni su Herode léha bekitá Yohane, wá mu ikan, pú mu wá obu. <sup>5</sup>Ɖɔ́bwe agywun ání ɔ́bómɔ́ Yohane, táme olenya ahá ámu ifú, tsúfé butobú Yohane ání Bulu ɔ́nɔsú ɔ́táírpú ogyí.

<sup>6</sup>Táme eke ɔ́kuá Owíe Herode dé mu ɔ́kwíké gyí a, mu ka Herodia mu bi tshé lóbowie ɔ́buntɔ́ tsa Herode mua mu ahande ansítɔ́. Mu itsáa amu lówa owíe amu ansigyí. <sup>7</sup>Mú su ɔ́leka ntam ɔ́béé, ɔ́béha mu tógyítáá odeklé.

<sup>8</sup>Otsibi amu mu yin léha mu ɔ́lebláa Herode ɔ́béé, “Ndekléá fupú Asú Ɖɔ́pú Yohane nwun dunka ulínsú ha mi sésééséi.”

<sup>9</sup>Asún ánfɔ léhie han Herode, táme mu ntam amú ɔ́leka, pú ahá amúú bubu inu ámu su á, ɔ́leha mu ahá ɔ́tínpu ɔ́kpa ɔ́béé, ɔ́bwéé tɔ́á otsibi amu lafité ha mu. <sup>10</sup>Ahá ɔ́tínpu amu léyetɔ́n Yohane nwun obu ɔ́dikpá inu. <sup>11</sup>Múú ɔ́ɔ́pu nwun ámu dínká ulínsú ba otsibi amu, mu é ɔ́ɔ́puya mu yin Herodia. <sup>12</sup>Asú Ɖɔ́pú Yohane akasírpú beba botsu mu satin yópulá. Mú ɔ́ma a, ɔ́yɔ́ yébláa Yesu asún ání ulaba.

### Ahá Mpím-nu Atogyihe Ha

(Marko 6:30-44; Luka 9:10-17; Yohane 6:1-14)

13 Yesu lénya nú asún ámu alí, olowie ɔkluntɔ, fá ntsu yétsiá ɔtineku mu nkule. Táme ɔɔm ámu bebu ɔtínéá ɔyɔ. Mú su benatí ayabitɔ tsú amú awúlusu gya mu nkpá. 14 Bréá ɔlekplí dalí ɔklun amutɔ, wun ɔɔm kpɔnkpɔnkpɔntí á, amú asún lɔwa mu nwe. Mú su ɔletsá amútɔ alɔpu.

15 Owí lɔpɔn a, akasípú amu beba mu wá bebláa mu beɛ, “Dimbísú nfi gyí, owí é deta. Mú su ha amú abuyɔ awúluá ibu bomlí nfi así ɔɔhɔ tɔku gyí.”

16 Táme Yesu léle mú ɔnɔ ɔbéɛ, “Imehián ání bóyɔ. Mludunka tɔku ha amú abugyi.”

17 Mu akasípú amu bebláa mu beɛ, “Tɔ́á anibu féé gyí bodobodo apin anu pú ntsutso iye bwáhé anyɔ pé.”

18 Yesu lébláa amú ɔbéɛ, “Mlitsu ba mu.” 19 Múú ɔleha ahá ámu betsiatsiá ifa ɔɔbwe amusu. Inu olotsu bodobodo anu pú ntsutso iye bwáhé anyɔ ámu. Inu olotsu ansí fúá kí ɔsúsú, ɔleda Bulu ipán. Múú olebiabía bodobodo amutɔ há akasípú amu, amú é beye mú ha ahá ámu féé. 20 Amú féé begyi mwe sian. Akasípú amu ɔtɔsí síanhe amu. Uɔbulá alakpá dúanyɔ. 21 Ayin ání begyi atɔ́ ámu nkule bugyi fé mpím-nu (5,000). Bumekla atsi múa nyebí mú.

### ɔpusu Natí

(Marko 6:45-52; Yohane 6:15-21)

22 Múú Yesu léha akasípú amu ɔbéɛ, bowie ɔkluntɔ, abugyankpa fa ɔpu amu ɔɔ mú ɔbun. Mu mú olesin ɔma sí ahá ámu ɔkpa. 23 Bréá olesi amú ɔkpa tá á, ɔɔɔdu yɔ busu ɔɔɔ mpái. Mu nkule oletsíá inu ɔɔfun owi tahé. 24 Alí bré ámutɔ á, ɔklun amu lawíé ntsu nsiné. Ilefia afú kpɔnkpɔntí ku, ɔpu amu lɔwa dabi.

25 Bake-bake a, Yesu lénatí ntsu ámusu ayabitɔ buo amú. 26 Bréá bowun mu, ɔna ɔpu amusu á, benya ifú súra okitikíti, blí beɛ, “Fúli ogyi.”

27Táme ɔlɔwa ɔsa bláa amú ɔbéε, “Mlɔwa klun. Mí ní. Mlɔmánya ifú.”

28Petro lébláa Yesu ɔbéε, “Mí Wíé, ní fú ní mú á, ha mí é annati ɔpu amusu ɔtu fú.”

29Yesu lébláa mu ɔbéε, “Nati ba.” Petro lédalɔ ɔklun amuto ɔna ɔpu amusu ɔyó Yesu wá. 30Táme bréá olowun alíá afú ámu ɔnó bu ɔnlun á, ifú lowie mu ayeto. Mú su ɔlɔwa me bi. Múú ɔlɔkplón kpolí Yesu ɔbéε, “Mí Wíé, ho mi!”

31Inunu Yesu létunkí ibi kítá mu, bláa mu ɔbéε, “Fú hógyi mɔtsó. Ntogyi sù fúde nwéen gyí?”

32Benya dú wíé ɔklun amuto alɔ, afú ámu léka itin. 33Inu ahá ámúú bubu ɔklun amuto ámu beda akpawunu Yesu ayabito, blí beε, “Lélé, Bulu mu Bi fúgyi.”

### Genesaretfo Alɔpu Tsa

(Marko 6:53-56)

34Yesu mua amúnɔɔ befa ɔpu amu yési Genesaret osubúnɔ. 35Bréá unfo bebi ání mu ni á, ɔɔwa abí ya amú awúlu féésú, há amú ɔɔpu alɔpu féé ba mu. 36Bokokóli Yesu beε, ɔhá alɔpu amu abupu ibi da mu atadie ɔdanú kpán. Amúá ɔɔpu ibi da mú féé benya ulɔtsá.

### Atitifo Amándié

(Marko 7:1-13)

**15** 1Mú ɔma a, Farisifo pú Mose mbla asunápú aku botsu Yerusalem ba Yesu wá, befité mu beε, 2“Ntogyi sù fú akasípú amu butamagyi anɔ anáin amándíésú. Butamafwí ibi amándié ɔkpasu asa butegyi ató?”

3Yesu léle mú ɔnó ɔbéε, “Ntogyi sù mli é mli anáin amándié su mlimédé Bulu mbla ámusu gyí? 4Mose lówanlín wá Bulu mbla ámuto ɔbéε, ‘Bu fú sí mua fú yín,’ ɔletrá wanlín ɔbéε, ‘Ní ɔku léblí asukpan tsú mu si ntée mu yin iwí á, bumóɔ mu?’ 5-6Táme mli mú mliáa, ɔha ɔbétalí bláa mu si ntée mu yin ɔbéε, ‘Tóá teki nópohá fú á, napóhá Bulu. Imehián ání nétrá ki fu.’ Mli anáin amándié su mlútráa

mlumédé Bulu mblasu gyí. <sup>7</sup> Apinabwebí abwepú! Onokwali Bulu onósú otópú Yesaia léblí tsú mli iwí tswí obée,

<sup>8</sup> ‘Ahá ánti budepu amú onó bú mí,  
táme amú klun bu ifó mí wá.

<sup>9</sup> Kpaali bude mí sum,  
tsúfé basí Bulu mbla tswí, yó bude anyánkpósa  
mbla suná.’ ”

### Tsá Itokpóí Oha Bulu Ansító

(Marko 7:14-23)

<sup>10</sup> Yesu létrá ti otom amu ba mu iwí wá, olebláa amú obée, “Mliyaa asu, méni mlónu íni asu. <sup>11</sup> Megyí tsá oha tegyi tókpóí mu Bulu ansító, mboún múá itedáli tsu mu onó tókpóí mu.”

<sup>12</sup> Inu mu akasípú amu beba mu wá befité mu beé, “Fuyin ání fú asun blíhé anfi lawo Farisifo ámu?”

<sup>13</sup> Yesu léle mú onó obée, “Bópulí oyígyíoyí ání megyí mí Sí ámúú obu otósú ámu lóswíe tsítsá. <sup>14</sup> Mlisi Farisifo ámu asún. Ansibi abwiepú bugyi, bude ansibi abwiepú kpa. Ní nsibi obwiepú dé nsibi obwiepú kpa á, otótó amú abanyó butekpá wíe.”

<sup>15</sup> Múú Petro lébláa mu obée, “Le yébi amu asu suna anu.”

<sup>16</sup> Yesu léfité amú obée, “Mú su mli é mlutamanú asún asu? <sup>17</sup> Mluméyín ání tsá iwíé oha onó á, mu iputo itowíé, otéyéle mú wá okpunto? <sup>18</sup> Asúngyíasún ání itedáli tsu oha onó á, mu klunto itedáli tsu. Mútokpóí mu Bulu ansító ní. <sup>19</sup> Tsúfé oha klunto ágywun laláhe tedáli tsu. Mútéhá otomó oha, otótó mbua, otowá atsi múa ayin asún, otowí ató, otowá afunu, otetsii oha. <sup>20</sup> Inu aná tókpóí oha, támé ní oha mófwi ibi amándié okpasu asa olegyi ató á, itamakpóí mu Bulu ansító.”

### Otsi Okvá Omegyí Yudayin Hógyi

(Marko 7:24-30)

<sup>21</sup> Yesu lénatí unu yó Tiro múa Sidon nsáunto.

<sup>22</sup> \*Kanaanyintse okvá otsie unu léba Yesu wá. Ode okitikíti surá, olokokóli Yesu obée, “Dawid mu na, wun mi nwe! Ohe laláhe bu mí bí tsíhétó. Ide mu háan dubi.”

23Táme Yesu mékpla mu. Inu mu akasípú amu bobwií ipa há mu bee “Ha ɔtsi ámu ɔnati, tsúfé obuo aní ɔde okitikíti surá dɔbi.”

24Yesu lébláa ɔtsi ámu ɔbéé, “Israel akúfa fwihé pé wá Bulu lówa mí.”

25Táme ɔtsi ámu léda akpawunu mu ayabito, bláa mu ɔbéé, “Mí Wíé, gyi mi buale.”

26Yesu lébláa mu ɔbéé, “Ima aláá fóswií nyebí atogyihe púhá akíai.”

27ɔtsi ámu léle mú ɔnó ɔbéé, “Owíé, ibu mútɔ alí, táme akíai é butegyí atogyihe mpupubi ání utekpákpa bun amú wíe ɔpúnúasi.”

28Múy Yesu lébláa mu ɔbéé, “ɔtsi, fú hógyi lomóní. lbá mútɔ ha fu aláá fudeklé.” Inunu iwí lówa mu bi ámu ɔnlín.

### Ahá Tsɔtsɔɔtsɔ Uɔ Tsa

29Tsú inu á, Yesu lótsun Galilea ɔpu ɔnó, dú yétsiá okúku kusu. 30Ahá tsɔtsɔɔtsɔ bɔpu abubúpu, ansibi abwiepú, abɔ, amúmu pú uɔ bámbá alɔpú bobun Yesu ayabiasí, ɔletsá amú féé. 31Ahá ámu ɔnó lobwie amú bréá bowun amúmu budetɔí, abubúpu iwí lawá amú ɔnlín, abɔ buna, ansibi abwiepú é bude ató wúun, bekanfú \*Israel Bulu ámu.

### Ahá Mpím-na Atogyihe Ha

(Marko 8:1-10)

32Yesu létí mu akasípú, bláa amú ɔbéé, “Ahá ánfí asón de mí nwe wa. Nde eke sáásí ɔpá bubuo mi, butráa buma tɔtɔá bégyi. Ní nehá amú bɔpú akún nátí á, ansítɔ béyebi amú ɔkpatɔ.”

33Mu akasípú amu befité mu bee, “Nkúnú abénya atogyihe há ɔɔm anfi \*dimbí ánfusu?”

34Yesu léfité amú ɔbéé, “Bodobodo afinu mlibu?”

Bele mú ɔnó bee, “Asienó pú aye pútúpútú kpalóbí ku.”

35Yesu léha ɔɔm amu betsiá asi. 36Múy olotsu bodobodo asienó pú aye amu, dá Bulu ipán, olebiabía mútɔ há akasípú amu, beye ha amú. 37Amú féé begyi mwe. Bɔtɔsí síanhe amu

búlá alakpá yílé asienó. <sup>38</sup>Ayin ání begyi ató ámu nkule bugyi mpím-na (4,000). Bumekla atsi múa nyebí.

<sup>39</sup>Ínu Yesu lési ahá ámu okpa, olowie okluntó fá ɔpu yó Magadanfó ɔsulósu.

### Farisifo Bodunká Ofúla

(Marko 8:11-13; Luka 12:54-56)

**16** <sup>1</sup>Èke ɔku \*Farisifo pú \*Sadukifo aku beba Yesu ɔsókikpa. Mú su bebláa mu beɛ, ɔbwée osúna pusuna amú ání lélé otsú Bulu wá. <sup>2</sup>Yesu lébláa amú ɔbéɛ, “Ní owí ɔpon, nsantó ipé á, mliteblí mliaa, ‘Ɔke nsantó bédú.’ <sup>3</sup>Ní nyankpu obílá tuun nyanki a, mliteblí mliaa, ‘Nde nyankpu obótswie tsun afú.’ Mlitetálí kɪ nsantó, bí t́á íbéba. Ntogyi sù mlimétálí nú t́á mlidéwúun séi ánfɪ mú asi.<sup>8</sup> <sup>4</sup>Mlɪ ndemba-abí laláhe ání mlɪladáli Bulu ɔma, mlidé osúna dunká amlɪwun, táme mlimóowun kukukuku dɪn Bulu ɔnósú ɔtɔ́pú Yona osúna amu odu.”

Ínu su ɔlenatí sí amú.

### Farisifo Pú Sadukifo Bodobodotu-afá

(Marko 8:14-21)

<sup>5</sup>Yesu akasípú amu bumekain tsú bodobodo kítá asa befa ɔpu amu yó ɔbun. <sup>6</sup>Yesu léda amú ɔlá ɔbéɛ, “Mlɪkɪ wankláán Farisifo pú Sadukifo Bodobodotu-afású.”

<sup>7</sup>Akasípú amu befuté aba beɛ, “Bodobodo amúú anumédé ámu sù ɔde asún ánfɪ blí lóó?”

<sup>8</sup>Yesu lónu asún ání budeblí. Múú ɔlebláa amú ɔbéɛ, “Óo, mlɪ hógyi mót́sú. Ntogyi sù mlidéblí mliaa bodobodo ámúú mlimédé ámu su? <sup>9</sup>Imɔkúwánkí mlɪ kɪ? Mlɪlatan bodobodo apin anu ámúú neha ahá mpím-nu (5,000) begyi amusu? Alakpá afɪnɪ lésían mlɪlót́ɔsí? <sup>10</sup>Ntée mlɪlatan bodobodo apin asienó ámúú neha ahá mpím-na (4,000) begyi amusu? Alakpá afɪnɪ lésían mlɪlót́ɔsí?” <sup>11</sup>Ntogyi sù imɔkúwánkí mlɪ ání megýí bodobodo ɪwɪ asún ndeblí? Bláa

<sup>8</sup> 16:2-3 Mót́ ɔ́ yée 2 múa 3 uma nwulú dada amu akutó.



nde mli bláa mbée, “Mliki wankláán Farisifo pú Sadukifo Bodobodotu-afású.”

12 Inu asa iwankí amú ání megyí Bodobodotu-afású cde, mboún amú atosunáhé.

### **Ɖhá Ání Yesu Gyí**

*(Marko 8:27-30; Luka 9:18-21)*

13 Bréá Yesu lówie Kaesarea Filipi nsáuntɔ á, cɔfíté mu akasípɔ cɔbée, “Ma ahá bee mí, Nyankpusa-Mu-Bi ánti ngyi?”

14 Bele mú ɔnɔ bee, “Aku bee, fúgyí Asú Ɖɔɔpú Yohane. Aku bee, Bulu Ɖnɔsú Ɖɔɔpú \*Elia. Aku é bee, \*Yeremia ntée Bulu ɔnɔsú ɔɔɔpú bambá ɔku.”

15 Mú cɔfíté amú cɔbée, “Mli é mé? Mli mígyí ma?”

16 Simon Petro léle mú ɔnɔ cɔbée, “Fúgyí Kristo, (ɔhá á mú Bulu ladá mu ofúli amu) ni. Bulu Ɖkɔankpɔpɔ amu mu Bi.”

17 Inu Yesu lébláa mu cɔbée, “Bulu layúlá fú Simon, Yona mu bi, tsúfé megyí nyankpusa ɔkuku léle ɔnɔkwali anfi ɔwan súná fú. Mí Sí á mú ɔbu ɔsúsú ámu ni. 18 Inu su mí é nde fú bláa mbée, fú dá gyí Petro. Mú asi gyí, ‘Butá. Butá ánti su néyi mí ɔpasua dínká ní. Lowu túmi méetalí gyí músú ekekekeke. 19 Nɔpɔ Bulu iwígyí ámu asáafi wá fú ibtɔ. Asúngyíasún ání fékiná ɔsulú anfi su á, Bulu é obékiná mú ɔsúsú. Múá fótsulá á, Bulu é obótsulá músú ɔsúsú.”

20 Inu cɔleda amú ɔlá kpákpáákpa cɔbée, bumábláa ɔhaa ání mugyí Kristo amu.

### **Yesu Iwɔɔsin Pú Mu Lowu Iwɔ Asún Blí**

*(Marko 8:31–9:1; Luka 9:22-27)*

21 Tsú bré ámu su á, Yesu léfi asi cde asúntɔ le súná amú cɔbée, “Ilehián ání mɔyɔ Yerusalem yówun iwɔɔsin tsɔtsɔtsɔ Yudafo ahande, Bulu \*igyí ahapú dehen pú Mose mbla asunápú ibtɔ. Bómɔ mu, táme Bulu ɔbélakúsúa mu eke sáásí tsú afúlitɔ.”

22 Mú su Petro létu mu ya utsétɔ, yéka mu itin cɔbée, “Mí Wíé, Bulu ogyáa mú téi ya fú iwɔ. Inu mába fusu ekekekeke.”

<sup>23</sup> ɪnu ɔledamlí bláa Petro ɔbéɛ, “\*Satan, nati tei mísú! Fude mí ɔkpa tíin. Megyí t́á Bulu dégywúin fudegywúin, anyánkpusa klé fudegywúin.”

<sup>24</sup> Múú ɔlebláa mu akasípú amu ɔbéɛ, “Ní ɔku dékléa obóbuo mi á, osíi t́á otekle bwe, otsu mu \*oyikpalíhe bobuo mi. <sup>25</sup> Tsúfé ní ɔku lépru mu nkpa á, ibóhulí mu. Táme ní ɔku lési mu nkpa há mí su á, ɔbélanya nkpa ání itamatá. <sup>26</sup> Ní ɔku onyá ɔyító ató féé, táme ɔhúli mu ɔkláa a, labi mɔmu ulowa há mu? Ntéɛ ntu ɔha ɔbétalí pútse mu nkpa? <sup>27</sup> Tsúfé mí, Nyankpusa-Mu-Bi ání ńeba mí Sí numnyamtɔ, mía mu abɔpu. ɪnú ńeka ɔhagyíɔha iku alá mu tsiátó gyi ní. <sup>28</sup> Ɖnɔkwali nde mli bláa. Aku bubu mlitɔ nfi ání bumóowu, yófun bréá bawun ání mí, Nyankpusa-Mu-Bi ání ńeba mí iwíe ogyíkpá.”

### Yesu lwutsée

(Marko 9:2-13; Luka 9:28-36)

**17** <sup>1</sup> Nkensié ɔma a, Yesu lékpa Petro mua Yakobo pú mu pio Yohane, bɔdu yó ibu kusu. <sup>2</sup> Amú ansító unu á, Yesu iwí letse. Mu ansító lówankí fé owí, mu atadiɛ é ledamlí fútútúútú. <sup>3</sup> ɪnu mu akasípú abasá ámu bowun ání Mose mua \*Elia bele iwí ɔwan, amúa Yesu budetóí. <sup>4</sup> Múú Petro lébláa Yesu ɔbéɛ, “Mí Wíé, ibu alá abétsiá nfi. Ní fótsulá á, ha ada abú asa. Fú klé kule, Mose klé kule, Elia é klé kule.”

<sup>5</sup> Bréá ɔde asún ání blí á, agyinde wánkíhé ku lobobun amúsú. ɪnu ɔme ku ledali tsu agyinde ámutɔ ɔbéɛ, “Ɖni gyí mí B́i ɔdwepúá olegyi mi ansí ní. Mlunu mu ɔme.”

<sup>6</sup> Ifú lehie kítá amú bréá bonu asún ání. Mú su ɔɔwa ɔsa mlí bun ɔsulótɔ. <sup>7</sup> Múú Yesu léba ɔɔpu ibi dada amú, bláa amú ɔbéɛ, “Mlucusu, mlumánya ifú.” <sup>8</sup> ɪnu ɔɔwa ansí kɪ a, bumetrá wun ɔhaa dun Yesu nkule.

<sup>9</sup> Bréá bude ibu ámu kplí á, Yesu léda amú ɔlá ɔbéɛ, bumábláa ɔhaa t́á bayówun, yófun ekeá Bulu ɔbókusúa Nyankpusa-Mu-Bi ámu tsú afúlito.

<sup>10</sup> Mu akasípú amu befíté mu beɛ, “Ntogyi śú Mose mbla asunápú amu beɛ, ilehián ání Elia obéyinkí bá asa Kristo amu ɔbéba?”

<sup>11</sup>Ɔlele mú ɔnɔ ɔbéɛ, “Ɔnɔkwali igyi. Elia obégyankpá bá bela tógyítɔ yái wankláán. <sup>12</sup>Nde mli bláa mbéɛ, Elia layínkí bá dodoodo, táme ɔhaa mébu mu. Bɔwa mu amumuyɔ. Alí kén mí, Nyankpusa-Mu-Bi ánfɔ é nówun iwɔɔsun amú ibɔtɔ ní.”

<sup>13</sup>ɔnu á, ulɔwankí akasípú amu ání Asú Ɔbɔpú Yohane iwɔ asón ɔdeblí.

### Uɔ Dídahe Ɔbɔpú Tsa

(Marko 9:14-29; Luka 9:37-43a)

<sup>14</sup>Bréá beyinkí kplí bowie ɔɔɔm amu wá á, oyin ɔku léba beda akpawunu Yesu ayabitɔ, bláa mu ɔbéɛ, <sup>15</sup>“Mí Wíé, wun mí bí ánfɔ nwe, tsúfé ulɔ dídahe de mu háan. Otetsiá dida wíé ntsu múa ogyátɔ. <sup>16</sup>Nɔpu mu ba fú akasípú amu, táme bumetalí tsá mu ulɔ.”

<sup>17</sup>Yesu léle mú ɔnɔ ɔbéɛ, “Ndemba-abía mli má hógyi, mli tsiátɔ ma ale. Alí nétsiá mli wá yɔ ekekegyíɛke ní? Nnyá klun ha mli yɔfun ɔmenke? Mlikpa kebi ámu ba mi!” <sup>18</sup>ɔnu ɔɔkplón gya ɔɔe laláhe amu. Uledali kebi ámutɔ, iwɔ lówa mu ɔnlun.

<sup>19</sup>Mú ɔma a, akasípú amu befité Yesu utsétɔ beɛ, “Ntogyi sú anɔ mú animétalí gya ɔɔe laláhe amu dáli kebi ámutɔ?”

<sup>20-21</sup>Mú ɔlebláa amú ɔbéɛ, “Mli hógyi mɔtsɔ kúráá. Mbláa mli ɔnɔkwali. Ní mli hógyi lomoní fé takyí-akpin ibí á, tekɔ mlétalí bláa ibu ánfɔ mli aa ipúli. Lélé ibópulí, tɔɔɔɔ mɔɔɔɔn mli bwe.”<sup>h</sup>

### Yesu Lowu Iwɔ Asón Blí Otse Nyɔɔsi

(Marko 9:30-32; Luka 9:43b-45)

<sup>22-23</sup>Bréá akasípú amu féé beba befia Galilea ɔmátɔ á, Yesu lébláa amú ɔbéɛ, “Béle mí, Nyankpusa-Mu-Bi ánfɔ há adón bóɔm mí, táme Bulu ɔbɔkɔsúa mi eke sáásí.”

Asón ánfɔ lehɛ han akasípú amu.

<sup>h</sup> 17:21 Mútsɔ yéɛ 21 bu nwló dada amu akutɔ: Táme ínu odu mú á, nkéti mpá múa ɔnɔklí pé mlétalí pógya mú.

### Bulu ɔtswékpa Ofí Iko

24 Yesu mva mu akasípú beba Kapernaum wúluto. Iwu  
\*Bulu ɔtswékpa ofíko ahópu aku beba befité Petro be, “Fú  
wíe teká Bulu ɔtswékpa ofí iko?”

25 Petro lébláa amú ɔbé, “Ɖteká.”

Bréa Petro lóyo wóyító a, Yesu légyankpá fíté mu ɔbé,  
“Simon, nkáli gyí fú agywun? Amendi téká dúte mba  
lampoo há awíe? Afóó ntée wúlu awíe?”

26 Petro lébláa mu ɔbé, “Afóó teká.”

Mú Yesu lébláa mu ɔbé, “Yéé múmú wúlu awíe bagyi  
wu ní? 27 Táme mmedéklé mbée, abókusú líí amúsú su á,  
tsu odadwa afuyó ɔpu ɔnó yotswi. Ki klemetí gyankpapu  
ání féle ɔnótó. Fénya kóba ání ibófun aní abanyó ofíko ámu  
ka. Le mú, afuyeka ha amú.”

### Ma ɔbówe ɔhande?

(Marko 9:33-37; Luka 9:46-48)

**18** 1 Beba Kapernaum wúluto, akasípú amu beba Yesu wá  
befité mu be, “Ma gyí ɔhande Bulu iwíegyí ámutó?”

2 Yesu létí kebi ɔku belí amú ansító, 3 ɔleblí ɔbé,  
“Ɖnɔkwali nde mli bláa. Ní mli métse, bwe wu fé nyebí á,  
mli móowie Bulu iwíegyí ámutó. 4 Ɖhagyíoha ání ɔleba  
wiasí fé kebi ántí á, mgyí ɔhande Bulu iwíegyí ámutó ní.  
5 Ɖhagyíoha ání ɔlɔho kebiá ogyi ali mí dátó laho mi.

### ɔha Kpa Wá Lakpantó

(Marko 9:42-48; Luka 17:1-2)

6 “Ní ɔku léha ahá ántí bumɔkúdan mísú hógyito ántíto ɔku  
lóbwe lakpan á, ní beda nfúókwebu síán mu ɔmetó, tswi mu  
wá ɔpu okluklúkpá, mó mu pó á, ibu alé dun. 7 Ɖyító atsiápú  
bugyówi ní. Tsúfé itóá itehá ɔha ɔbwe lakpan bu wu. Ibéba  
ali, táme ɔhá ání una musu mu ba lóbwe lakpan ɔgyówi ní.

8 “Mú su ní fú ibi ntée fú yabi téhá futedida hógyito á, ka  
mú le, afutswi mú tsalifwi. Ibu aléá fópu ibi kule ntée yabi  
kule nyá nkpa ání utamatá, dun ání fópu ibi anyo ntée ayabi

anyo wíe ogyá ání utamaduntɔ. <sup>9</sup>Ní fú nsíbi téhá fútɔbwé lakpan á, loti mú le, afutswi mú tsalífwí. Ibo aláá fɔpu nsibi kule nyá nkpa ání utamatá, dɔn ání fɔpu ansibi anyo wíe ɛsubití ogyá ání utamaduntɔ.

**Kufa Fwihé**  
(Luka 15:3-7)

<sup>10-11</sup>“Mlíki wankláán ání mlíméeki nyebí pútúpútú ánfító ɔkuku ansító kótíkótí. Nde mli bláa mbéé, bubu Bulu-abɔpu ání butɔkósi pú amú asún ya mí Sí ɔsúsú.<sup>i</sup>

<sup>12</sup>“Mliyo asún ánfító amlíki. Ní ɔku bu akúfa lafakule (100), amútsɔ ɔkule ɔfwí á, nɔ ɔhá ámu tɔbwé? Megyí si otesí adukwebá-kwebá (99) atráhe amu líí okúku amusu, yódunká ɔkule pé ámúbú alafwí ámu? <sup>13</sup>Ɔnɔkwali nde mli bláa. Ní owun mu a, mu ansí bégyi mu iwí dɔn adukwebá-kwebá atráhe amúbú bumɔfwí ámu. <sup>14</sup>Alí kén mli Sí ámúbú ɔbu ɔsúsú ámu médékle ɔbéé, nyebí pútúpútú ánfító ɔkuku é ɔfwí ní.

**Ní Fú Bá Ɔpú Ilá Gyi Fu**

<sup>15</sup>“Ní fú bá ohógyipu ɔpú ilá gyi fu á, yo mu wá, mli abanyó pé amlíbli mú. Ní olonu iwiasí á, falányá opió. <sup>16</sup>Táme ní omonu iwiasí á, kpa ɔbakúle ntée abanyó manta iwísu amlíyo mu wá, méni bégyi asúngyíasún ání mléblí iwí adánsíe fé alhá Bulu asún leblí. <sup>17</sup>Ní omonu amú asún é á, pu asún ámu ya mli ɔpasuafɔ. Táme ní omonu amú asún é á, múmú bu mu ɔmátóyín ntée lampóo ɔhópu.

**Asúnkiná Pú Músú Tsulá**

<sup>18</sup>“Ɔnɔkwali nde mli bláa. Asúngyíasún ání mlékiná ɔsulúbú anífu á, Bulu obékiná mú ɔsúsú. Múá mlótsulá á, Bulu obótsulá músú ɔsúsú.

---

<sup>i</sup>18:11 Mótó yée 11 bu nwulú dada amu akɔtɔ: *Tsífé mí, Nyankpusa-Mv-Bi ánfí nɛba ání nɔhɔ ahá ámúbú bafwí ámu nkpa.*

19“Ntráa ndeblí mbée, ní mli abanyó mlɔbwé agywun kule ɔsulúv anfisv kúlí tɔku á, mí Sí ámúv ɔbv ɔsúsú ámv ɔbɔbwe mú há mli. 20Tsúfé ɔtínegyíɔtíne ání ahá abanyó-abasá befia mí dátɔ á, mbv amú wá.”

**Osúmpú Owuntɔlɔnv lwi Yébi**

21Múv Petro léba befité Yesu ɔbée, “Mí Wíé, tsefinv nsíkíe mí bá ní ɔpú ulá gyi m? Tse sienó lóó?”

22Yesu lébláa mv ɔbée, “Ó-o, megyí tse sienó fésikíe mv, tsé aduesienó (70) aku asienó. 23Ínv sv Bulu iwíegyí ámv igyi fé asún ánfí. Owíe ɔkv lɔbwe agywun ání mvv asúmpú bóbu akúnta. 24Bréá olefí mú así á, mv asúmpú bekpa amúv ɔkvá ɔde mv ɔkv mpím-mpímúv ba mv. 25Táme osúmpú amv má tɔtɔá ɔbɔpɔká ɔkv ámv sv á, owíe amv léha ɔbée buféev mvv ka, mv abí pú mv ató féé púkítá ɔkv ámvúv. 26Ínv á, osúmpú amv lɔkusú dá akpawunu owíe amv ayabítv, bwíí ɔpa há mv ɔbée, ‘Mí Wíé, nya klvn ha m. lbwé néka fú ɔkv ámv féé.’ 27Mv asún lɔwa mv wíe amv nwe. Mú sv olesi ɔkv ámv féé kíe mv, há mv ɔlenatí.

28“Táme bréá osúmpú amv lédalí unv á, ɔlɔyótuv mv osúmba ɔkvá ɔde mv ɔkv kpalobí kv. ɔlekítá mv ba ámv ɔmetv



*ɔlekítá mv ba ámv ɔmetv kínkínkín, bláa mv ɔbée, ‘Pv mí kɔba ha m!’ (Mateo 18:29)*

kínkínkín, bláa mv ɔbée, ‘Pv mí kɔba ha m!’ 29Mv osúmba amv é léda akpawunu bwíí ɔpa há mv, bláa mv ɔbée, ‘Nya klvn ha m. lbwé néka fú kv.’ 30Táme osúmpú anfv mú mótsulá. ɔleha ání bupúv mv yɔwa obu yófun ekeá ɔbéka mv ɔkv ámv. 31Mv asúmba bowun tɔá alapúgyi mv ba ámv a, ilowie amú iwúv. Mú sv bɔyɔ yébláa amú wíe asún ámv féé. 32Múv amú wíe amv léha betí osúmpú amv ba, ɔlebláa mv ɔbée, ‘Osúmpú

owuntɔlɔnpv, fú ipabwií sv nesi ɔkɔ tsɔtsɔɔtsɔ ámuú fúde mí ámu fée kíe fú. <sup>33</sup>Uma alá fú mú fówun fú bá ámu nwe fē alá nowun fu nwe?’ <sup>34</sup>Ɖbls lekitá owíe amu. Mú sv ɔleha ɔbé, buwáa mu obu, abupiti mu ató yófun ekeá ɔbéka ɔkɔ ámu fée.

<sup>35</sup>“Alí mí Sí ámuú ɔbu ɔsúsú ámu ɔbóbwe mlito okugyíɔkuá omesi mu ba lakpan kíe mu tsú mu klontɔ ní.”

### Ɖkákíná lwi Atosunáhé

(Marko 10:1-12)

**19** <sup>1</sup>Bréa Yesu lótoí tá á, ɔlenatí Galilea ɔmátó yó Yudea ɔmátó Yordan ntsu ámu ɔbun. <sup>2</sup>Ɖɔm kɔnɔkɔnɔkɔnti bobuo mu, ɔletsá amú ɔlɔ unv.

<sup>3</sup>Farisifo aku beba mu wá ɔɔɔ mu ki, fíté mu be, “Anu Mbla léha ɔkpa ání oyin ɔbétalí kíná mu ka ɔkpagyíɔkpasu?”

<sup>4</sup>Yesu lébláa amú ɔbé, “Mlunókókla Bulu asún ámu ki ání bré ámuú Bulu léfi ɔyí asi á, ɔtsi múa oyin ɔlɔbwe? <sup>5</sup>Bulu léblí ɔbé, ‘Íni sv oyin obótu sí mu si mua mu yin yémantá mu kasu, amú abanyó ɔbóbwe ɔyulúv kole ni.’ <sup>6</sup>Mú sv nde mli bláa mbée, butráa bumegyí abanyó, táme babwé ɔbakúle. Ahá ání Bulu labwé amú ɔkule a, ɔhaa mámaín amú abasu.”

<sup>7</sup>Farisifo ámu befíté mu be, “Ntogyi sú Mose lówa mbla ɔbé, oyin ɔbétalí wánlín ɔkákíná ɔwulú pókíná mu ka?”

<sup>8</sup>Yesu lébláa amú ɔbé, “Mli klontɔ odwin sú Mose léha mli ɔkpa ɔbé, mlíkína mli aká, teki megýí alí Bulu lóbwe mú bréa olefi ɔyí ámu asi ní. <sup>9</sup>Táme nde mli bláa mbée, ní oyin okíná mu ka láyétsiá ɔtsi bámbá á, alató mbua. Ɖkpa oduásúá oyin ɔbétalí kíná mu ka pé gyí aladál mu ɔma.”

<sup>10</sup>Múv mu akasípú amu beblí be, “Ní alí okúlu mua ɔká abatsiátɔ asún igyi ní mú á, múmú uma aláá oyin mua ɔtsi bétsiá aba pó.”

<sup>11</sup>Yesu lébláa amú ɔbé, “Megýí ahá fée ɔbétalí ho atosunáhé anfi. Nkétí ahá ání Bulu lópuhá amú pé. <sup>12</sup>Tsúfé una ɔkpa tsɔtsɔɔtsɔsv ayin aku butamatsiá aká. Ayin ámu aku á, alí ɔkwí amú ní. Aku é anyánkpúsa láflo amú. Aku é basin kpanku Bulu iwíegýí ámu sv. Ɖhá ání ɔbétalí á, ɔhó mí atosunáhé anfi.”

### Nyebí Yulá

(Marko 10:13-16; Luka 18:15-17)

13Aha aku bekpa nyebí ba Yesu bee, ɔpúu ibi dinka amúsú, ɔkuli Bulu oyúla ha amú. Táme akasípú amu bowa tɔyɔn wá amú. 14Múú Yesu lébláa akasípú amu ɔbéé, “Mliha nyebí ámu ɔkpa abuba mí wá. Mlumátin amú ɔkpa, tsúfé ahá ánfɔ odu bú Bulu iwíegyí ámu nɔ.”

15Múú ɔɔpɔ ibi díndínka amúsú, ɔlenatí unu á.

### Atonyahé Iwi Atosunáhé

(Marko 10:17-31; Luka 18:18-30)

16Eke ɔku oyin ɔku léba Yesu wá befité mu ɔbéé, “Osunápú, yilé mɔmɔ nóbwe asa nénya nkpa ání itamatá?”

17Yesu léfité mu ɔbéé, “Ntogyi sù fude mí yilé iwi asún fité? Ɖbakúle pé gyí ɔha yilé. Mugyí Bulu. Táme ní fudekléa funyaá nkpa ání itamatá á, múmú gyi Bulu mbla asún ámusu.”

18Oyin ámu lélafité mu ɔbéé, “Múts mɔmɔ?”

Yesu lébláa mu ɔbéé, “Mámɔ ɔha, máts mbua, máwi ató, máka asún dínká fú bású. 19Bu fú sí mua fú yín, afudwe fú bá fé fú iwi.”

20Ɖyasubi ámu lébláa Yesu ɔbéé, “Ntegyi mú féésú. Nto é ntráa bwe?”

21Yesu lébláa mu ɔbéé, “Ní fudekléa fɔfun mú á, yefe fú iwisu ató féé, afuye kóba amu ha ahiánfɔ, ménɔ fénya siadie ɔsúsú. Fɔbwé mú tá á, ba afubobuo nɔ.”

22Bréa ɔyasubi ámu lónu asún ánfɔ á, ulehíe han mu, ɔlenatí díín, tsúfé ɔhíe ɔbu ató.

23Múú Yesu lébláa mu akasípú ɔbéé, “Ɖnɔkwali nde mli bláa mbée, ibéhíe wá ɔnlun asa iwi onyapú obówie Bulu iwíegyí ámutɔ. 24Ntráa nde mli bláa mbée, ɔpɔɔn ha \*kpósó ání ɔbótsun ɔbun-atɔ ɔbótó, dun ání iwi onyapú obówie Bulu iwíegyí ámutɔ.”

25Akasípú amu bonu asún ánfɔ á, ɔnó lobwie amú. Inu su befité bee, “Mómú ma mee Bulu ɔbóhɔ nkpa?”



26 Inu Yesu lélí kɪ amú alu. Múú ɔlebláa amú ɔbéé, “Anyánpúsato mú á, ɔhaa méetalí bwé ínu, táme Bulu mú tetálí bwé tógyító.”

27 Múú Petro léfité mu ɔbéé, “Íniá anulasí tógyító tswi bobuo fu á, nto abénya tsú fú búoto?”

28 Yesu lébláa amú ɔbéé, “Ɖɔɔkwali nde mli bláa. Bréá Bulu ɔbwé ɔyí ɔɔpwe amu, mí, Nyankpusa-Mu-Bi ánti netsiá mí numnyam owíe obíá ámusu á, mli ahá ánti mli buo mu ánti é mlétsiá awíe mbíá dúanyɔsu, gyi \*Israel abusuan dúanyɔ ámu asún. 29 Ɖhagyíɔha ání alanátí sí mu wóyí, mu apíó, mu si mua mu yin, mu abí ntée ɔsulúv mí su á, Bulu ɔbéla há mu mú tsé dú tsé lafa, trá lahá mu nkpa ání itamatá. 30 Táme agyankpawu aku béba bemlí amawu, amawu amu aku é bébemlí agyankpawu.”

### Nɔɔto Agyómá Ayɔpú lwi Yébi

**20** 1 Yesu létrá bláa amú ɔbéé, “Mú su Bulu iwíegyí ámu igyi fé asún ánti. Ɖɔɔtoɔpu ɔku létsiá. Eke ɔku ɔɔkusu nyanki-nyanki ɔyɔ ipa agyípu odunkákpá, abuyɔyɔ agyómá mu ndɔto. 2 Mwa amúnyɔ begyi bíá ání ɔbéka amú alíá butɔɔ ekewóle, ɔɔpu amú sísí agyómá ámu ɔyɔkpá. 3 Dokwebátɔ a, ɔledali yɔ dɔnsu, oloyówun aku é bulí, bumédé tɔto bwe. 4 Olotsu amú é ɔbéé buyɔyɔ agyómá mu ndɔto ha mu. Ibwé ɔbéka amú tɔá iɔ alé. Mú su ɔyɔ. 5 Dódúanyɔ pú ɔɔsato é á, ɔletrá pu aku sísí ndɔ ámutɔ. 6 Ntúpwe donuto, bréá ɔledali a, ɔletrá wun akwá bulí kpaali. Múú ɔlefité amú ɔbéé, ‘Ntogyi sú nde féé mlíí nfi, mli médé tɔto bwe?’ 7 Bebláa mu beé, ‘Ɖhaa mókúbɔ amu ipa.’ Múú ɔlebláa amú ɔbéé, ‘Múú mli é mli ɔtsun yɔyɔ agyómá mí ndɔto.’

8 “Bréá owí lɔpon a, ɔɔtoɔpu amu léti mu agyómású ɔkípu bláa mu ɔbéé, ɔtí ipa agyípu ámu féé, ɔkáa amú akɔ. Ɖkáa amú tsu amawu amusu alu ɔto agyankpawu amu. 9 Bréá ipa agyípu amu beba a, agyómású ɔkípu amu léka ahá ámutú ɔyɔ donuto ámu alíá butɔɔ ekewóle. 10 Bréá ɔto agyankpawu amu a, buki beé bénya dun ali, táme ali kén

ɔleka amú é ní. <sup>11</sup>Mú su ɔleka amú ako tá á, agyankpapu amu bowa tɔtɔi ɔɔɔɔɔɔ amusu bi. <sup>12</sup>Beblí bæ, ‘Amapu anfi mú á, dɔnhwírí kule pé bɔyɔ agyómá. Aní mú anlalíí owí krankpli ánfisu yɔ agyómá, táme faká ania amúnɔ fée ako kule.’

<sup>13</sup>“Ɔɔɔɔɔɔ amu lébláa amútɔ ɔkule ɔbé, ‘Agya, yée mmɔkútafá fu o! Megyí itɔ ámúbú mía funɔ aniléblí ámu napúhá fú á? <sup>14</sup>Pu fú atɔ natí. Mídéklé mbée, néha amapu amu alíá naká fú. <sup>15</sup>Mma ɔkpa ání nɔpu mí kóba bwé tɔá ndeklé? Ntée mí awitɔlewa dé fú iwitɔ wie?’

<sup>16</sup>“Alí amapu bóbwe agyankpapu, agyankpapu é bóbwe amapu ni.”

### Yesu Lowu Iwí Asón Blí Otse Saasi

(Marko 10:32-34; Luka 18:31-34)

<sup>17</sup>Bréá Yesu ɔyɔ Yerusalem a, ɔlekpa akasípú dúanyɔ ámu ya utsétɔ bláa amú ɔbé, <sup>18</sup>“Mlínú! Ayɔ Yerusalem. Inu á, béle mí, Nyankpɔsa-Mu-Bi ánfí há Bulu \*igyí ahapú dehen pú Mose mbla asunápú. Béha mí lowu ipón. <sup>19</sup>Bópu mí wá ahá ání bomegyí Yudafɔ ibitɔ bóbwe mí ahinlá, bónwen mí mpli, dá mí mántá \*oyikpalíhesu. Táme Bulu ɔbélakúsúa mi eke sáásí tsú afúlito.”

### Abí Oyín Ɔku Atɔ Kulíhé

(Marko 10:35-45)

<sup>20</sup>Múbú Sebedeo mu ka lékpa mu abi anyɔ beba, ɔleda akpawunu Yesu ayabito, kúlí mu ɔbé, ɔbwée tɔku ha mu.

<sup>21</sup>Yesu léfité mu ɔbé, “Ntɔ fudeklé?”

Ɔtsi ámu lébláa mu ɔbé, “Ha mí abi anyɔ ánfito ɔkule otsia fú gyɔpɔsu, ɔkule é otsia fú binasu bréá fúde \*iwíe gyí.”

<sup>22</sup>Yesu lébláa amú ɔbé, “Mluméyín tɔá mludékulí.” Ɔlefuté Yohane muu Yakobo ɔbé, “Mlétalí wun iwɔsun ámúbú nebá bowun amu?”

Bebláa mu bæ, “Ee, abétalí.”

<sup>23</sup>Múbú ɔlebláa amú ɔbé, “Mlówun iwɔsun ámu mú, táme mma túmi ání néle ahá ání bétsiá mí gyɔpɔsu ntée mí

binasu. Otsiákpá unu ida gyo ahá ámúú mí Sí Bulu lalá unu yáí há ámu.”

24Bréá akasípú dú atráhe amu bonu asún ánfí á, Yakobo mva Yohane iwí lówa amú ɔbló. 25Múú Yesu létí amú, bláa amú ɔbéé, “Mliyin ání ɔmátófwosu agyípu butehíé amú ahá, amú ahande é butenyá túmi amúú. 26Táme mlitɔ mú á, umába alí. Dhagyíɔha ání odekléá ɔbɔbwe mlitɔ ɔhande a, ɔbwée mu iwí osúmpú ha mu aba atráhe. 27Dhá ání odekléá ɔbɔbwe mli nkpa ogyápu ɔbwée mli ɔkpábi. 28Alí kén mí, Nyankpusa-Mu-Bi ánfí é mmeba mbée, busúm mí ní. Ahá osúmkpá neba, ampu mí nkpa ho ahá tsɔtsɔwtsɔ nkpa.”

### Ansibi Abwiepú Abanyó Uo Tsa

(Marko 10:46-52; Luka 18:35-43)

29Bréá Yesu mva mu akasípú buɔɔɔɔɔɔɔɔ Yeriko wúlutɔ ɔyóy á, ɔɔɔm kpɔnkpɔɔnkpɔntí bobuo amú. 30Ansibi abwiepú abanyó aku butsie ɔkpa ámutɔ, bonu ání Yesu détsúun. Inu ɔkplón blí beé, “Aní Wíé, \*Dawid mu na, wun aní nwe.”

31Ɔɔɔm amu ɔkplón wa amú beé bukpá ɔnɔ bun. Táme belakplón dun alí beé, “Aní Wíé, Dawid mu na, wun aní nwe!”

32Múú Yesu lési líí, tí amú, ɔlefíté amú ɔbéé, “Ntɔ mlúɔklé mlíaa, mbwée ha mli?”

33Bebláa mu beé, “Aní Wíé, ha aní awun ató.”

34Inu amú asún lówa Yesu nwe, ɔɔɔpu mu ibi dada amú ansíbi. Inunu bowun ató, bekplá buo mu.

### Bɔho Yesu Fé Owíe Yerusalem

(Marko 11:1-11; Luka 19:28-40; Yohane 12:12-19)

**21** 1-2Bréá Yesu mva mu akasípú bebéen Yerusalem wúlu, beta Betfage wúlu ání ibu Nfɔ-nyíbu<sup>1</sup> ámu asu wie tá á, ɔɔwa mu akasípú abanyó gyankpá. Ɔlebláa amú ɔbéé, “Mliɔ wúlu anfi ida mli ansító ánfísu. Ní mlowíé

<sup>1</sup>21:1 Nfɔ-nyíbu igyi obubwí kuá ibu mantáa Yerusalem, butetí mú Olifbu.

wúlu amu ɔnɔ á, mlówun afrímú tsíhé ɔkuá ɔda ɔfétɔ, mu bi líí mu wá. Mlɔsankɩ mu, amlɩkpa amó ba mi. <sup>3</sup>Ní ɔku ɔfíté mli asvanku á, mlibla mu mliaa, ‘Ani Wíe dé amó hián.’ lɩnɩ ɔbéha mlópu amó ba mi.”

<sup>4</sup>Ínɩ léha Bulu asún amóú ɔleblí tsvn mu ɔnɔsú ɔtɔ́púsv amu léba mótɔ. ɔbéé,

<sup>5</sup>“Mlibla \*Sionfɔ mliaa,

Mlɩkɩ, mli Wíe ɔbá mli wá.

Ololwií, ɔdɩn afrímúsú.

ɔdɩn afrímú ibí yínhésú ɔbá.”

<sup>6</sup>Yesu akasípú abanyó amu ɔyɔ́bwe alɩ amóú Yesu lébláa amó amu. <sup>7</sup>Beɩpa afrímú mva mu bi amu ba, beyaí amó atati dínká amóú, ɔɔɔɔ bian musu. <sup>8</sup>ɔɔɔm kɔɔnkɔɔnkɔɔntɩ beyaí amó atati tswɩ ɔkpatɔ, aku é bebiabía afítáa bunbun ɔkpa amú. <sup>9</sup>ɔɔɔm amóú bugya Yesu nkɔ́pá múa ɔma amu ɔɔsurá okitikítɩ beé, “\*Hosiána há Dawid mu na amu! Bulu oyúla owíe anfi ɔbá mu dátɔ ánfɩ! Hosiána bu ɔsúsúsú!”

<sup>10</sup>Bréá Yesu lówie Yerusalem a, wúlu amú ɔ féé leda kɔkɩti, budefíté beé, “Ma gyí ɔhá ánfɩ?”

<sup>11</sup>ɔɔɔm amóú bubuo mu amu bele mú ɔnɔ beé, “Ónɩ gyí Yesu, Bulu ɔnɔsú ɔtɔ́pú amóú otsú Nasaret wúluá ɩbu Galilea ɔmátɔ amu nɩ.”

### Yesu Bulu ɔtswékpa Yo

(Marko 11:15-19; Luka 19:45-48; Yohane 2:13-22)

<sup>12</sup>Móú Yesu lóyɔ \*Bulu ɔtswékpa wunsinésú ɩnu, yégya ató afepú pú ató ahópu féé dali. Olowuwíta kɔ́ba atsépu mpúnú dá, súnsúnki abrɔ́ɔma afepú é mbíá dá. <sup>13</sup>ɔlebláa amó ɔbéé, “Bɔwanlín wá Bulu asún amú beé, ‘Béti mí ɔtswékpa beé, mpái ɔɔkɔ́pá.’ Táme mliɩapú ɩnu mli awikplu ɔɔaínkɔ́pá.”

<sup>14</sup>Ansibi abwiepú pú abubúpu aku beba mu wá Bulu ɔtswékpa wunsinésú ɩnu, ɔletsá amó ɩɔ. <sup>15</sup>Bréá Bulu \*igyí ahapú dehen pú Mose mbla asunápú amu bowun ofúla ání Yesu débwe, pú alíá nyebí budekplón Bulu ɔtswékpa wunsinésú ɩnu beé, “Hosiána há Dawid mu na amu!” a, ɔbló

lekítá amú. <sup>16</sup>Mú su befíté Yesu bæe, “Fumedénu asún ání nyebí ánfí buðéblí?”

Yesu léle mú ɔ́nɔ́ ɔ́béé, “Ndenu. Mlumókúkla asún ání Bulu asún wanlínhé amu léblí? Ɖbéé, ‘Fasúná nyebí pú amúá buwɔ́kútun nyɔ́pu alá bukánfu fú.’ ”

<sup>17</sup>Yesu lédaɔ́ wúlu amuɔ́ sí amú yó Betania. Inú ɔ́ledí eke ámu ni.

### **Pɔ́ntɔ́ Oyí Lwí**

*(Marko 11:12-14, 20-24)*

<sup>18</sup>Ɖyi kehe nyanki, bréá Yesu léyinkí ɔ́bá Yerusalem a, akún de mu. <sup>19</sup>Mú su bréá olowun pɔ́ntɔ́ kuá ilí mantáa ɔ́kpa á, ɔ́lebaí yó mú asi. Ɖɔ́yɔ́ á, omowun abí kuku mútɔ́, afítáa sɔ́n bu músú. Inu ɔ́lebláa pɔ́ntɔ́ ámu ɔ́béé, “Tsú nde fuméétrá swie abí ekekekeke!” Inuɔ́ oyí ámu lówu.

<sup>20</sup>Mu akasípú amu bowun alá oyí ámu labwé á, ɔ́nɔ́ lobwie amú. Mú su befíté bæe “Ntogyi sú oyí ánfí lawú ɔ́tsáwule pé alí?”

<sup>21</sup>Yesu lébláa amú ɔ́béé, “Ɖnɔ́kwali nde mli bláa. Ní mlɔ́hɔ́ Bulu gyi, mlumégyi nwéen a, mlétalí bwé itɔ́ ánfí nabwé oyí ánfí pú múá idun mú. Mlétalí bláa ibi ánfí mlíaa, ‘Puli yowie ɔ́putɔ́.’ Ibópulí yó. <sup>22</sup>Ní mlɔ́hɔ́ Bulu gyi, mlɔ́kúlí mu tógyítɔ́ á, mli ibi béda mú.”

### **Yesu Túmi lwi Asun Futéhé**

*(Marko 11:27-33; Luka 20:1-8)*

<sup>23</sup>Yesu léyinkí bowie Bulu ɔ́tswékpa wunsunésú unu. Bréá ɔ́de atɔ́ suná á, Bulu igyi ahapú dehen pú Yudafo ahande amu beba mu wá. Befíté mu bæe, “Ma léha fú ɔ́kpa, fúde ntobí ánfí bwe? Ma léha fú túmi?”

<sup>24</sup>Yesu léle mú ɔ́nɔ́ ɔ́béé, “Mí é nfíte mli asun kua kule. Ní mlelé mú ɔ́nɔ́ á, nébláa mli túmi oduá ndepubwé ntobí ánfí. <sup>25</sup>Bulu wá Asú Ɖbɔ́pú Yohane lénya túmi púbó ahá \*asú, ntée nyankpusa?”

Amú wulewule ɔ́yɔ́ asún ánfíɔ́ bæe, “Ní ablí aníaa itsú Bulu wá á, ɔ́béfíté aní ɔ́béé, mú ntogyi sú anímóhɔ́ mu gyi?”

<sup>26</sup>Ntée ablí aniaa, anyánkprósa wá itsú.” Táme bude tóá ahá tsotsɔɔtsɔ ámu bɔ́bwe amú ifú nya. Tsúfé amú fée bohogyi ání Bulu ɔ́nɔ́sú ɔ́tɔ́pú Yohane gyí. <sup>27</sup>Mú su bele mú ɔ́nɔ́ bee, “Ohwée! Anuméyín ɔ́tínéá olenya mu túmi tsú.”

Mú Yesu é lébláa amú ɔ́bée, “Mómú mí é mméébláa mli túmi oduá ndepubwé ntobí ánfí.”

### Oyin Ɔku Abi Anyo lwa Yébi

<sup>28</sup>“Mliyo asón ánfito amlíki. Oyin ɔku mua mu abi anyo betsiá. Eke ɔku ɔkyo yébláa ɔdéhén ɔbée, ‘Mí bí, nde yɔyo agyómá mí ndɔɔ ha mi.’ <sup>29</sup>Ɖlebláa mu si ɔbée, ‘Mmɔ́kyo.’ Mú ɔma a, ɔlelatse mu agywun, yó ndɔ́ ámutɔ. <sup>30</sup>Amú sí lénatí yó ɔkusu amu é wá yébláa mu alí kén. Ɖkusu amu lótsulá ɔbée, ‘Mí sí, nɔ́yo.’ Táme ɔmɔ́yo.” <sup>31</sup>lwo Yesu léfité ahá ámu ɔbée, “Abi anyo ámutɔ ɔmɔ́mu lɔ́bwe dínká mu si asúnsú?”


Yudafɔ igyí ahapú dehen pú Yudafɔ ahande amu bebláa mu bee, “Ɖdéhén amu.”

Mú Yesu lébláa amú ɔbée, “Ɖnɔkwali nde mli bláa. Lampóo ahópu pú obu-ɔnɔ́ atsiápú bówie Bulu iwíegyí ámutɔ sí mli. <sup>32</sup>Tsúfé Asú Ɖbɔpú Yohane lóbosuná mli tsiátó oduá ida ɔkpa Bulu ansító, táme mliwóhɔ mu gyi. Lampóo ahópu pú obu-ɔnɔ́ atsiápú bɔhɔ mu gyi. Ɖma mliwóhun ání amú kúráá batse a, mliwétse mli agywun hɔ mu gyi.

### Apafɔ Laláhe Aku

(Marko 12:1-12; Luka 20:9-19)

<sup>33</sup>“Mliwu yébi iku é. Ɖɔɔɔpu ɔku lóɔɔ \*wáun ndɔ. Olegyi iban bómlí mú. Olokwi wáun amu onyimékpá. Ɖɔɔpwe obu fúáhé ku há ndɔ́ ámu agyópu. Mú ɔɔpu ndɔ́ ámu wá apafɔ ɔbɔɔ, olotu ɔkpa yó ɔmá ɔkutɔ. <sup>34</sup>Bréá wáun-abí amu kpɔ́tɔ́bɔ lófun a, ɔlwa mu asúmpú apafɔ ámu wá ɔbée, buyóhɔ mu ogyíkpá ba mu. <sup>35</sup>Táme apafɔ ámu bekitá amú, dá ɔkule, mɔ́ ɔkule, dá ɔkule é abwi. <sup>36</sup>Nɔɔ mu wie amu létrá wa mu asúmpú bámbá ání butɔɔ dun agyankpapu amu. Apafɔ ámu ɔɔbwe amú é alí kén. <sup>37</sup>Mú tráhe kúráá á, ɔleblí ɔbée, ‘Oo, bóbu mí bí kwíthé mú.’ Mú su ɔlwa mu é. <sup>38</sup>Táme bréá



Mat

*Wáun Ndo ní. (Mateo 21:33)*

apafɔ ámu bowun mu bi ámu sísí á, bebláa aba bee, ‘Ónu obégyi mu si ató ní. Mlha amɔ mu, méni ndo ámu ibémlí aní klé.’<sup>39</sup>Mú sv bekítá mu, bítía mu dáli ndo ámuɔ yómɔ mu.”

40“Ní ndo mu wie ɔbá á, nɔ mlilahogyi mlhaa, ɔbɔbwe apafɔ ánfí?”

41Yudafɔ igyi ahapú dehen pú Yudafɔ ahande amu bele mú ɔnɔ bee, “Ɖbéha aha laláhe anfi bówu lowu sínsín, ɔbélapú ndo ámu wá apafɔ bámbá ibitɔ. Amúá bétsiá pú mu ató-abí ba mu mú kpótíbi.”

42Mú Yesu léfuté amú ɔbéé, “Ntée mlumókúkla Bulu asun wanlínhé amu kí? Bɔwanlín bee,

‘Ibwi ámuú obu ayípu bekiná ámu  
lébemlí okonkísóbwi ní.

Bulu lóbwe mú alí.

Ibu wánwan.’

43“Mú sv nde mlí bláa mbéé, Bulu ɔbɔhɔ mu \*iwíegyí ámu lé mlí ibitɔ púhá ɔmá aní ɔbɔwe tɔá otekle.

44“Ínu sv ɔhá aní ɔledɪda ibwi ámu sv obébiabía blúblúblúblú. Ní ibwi ámu isúnkí dá ɔkusv é á, ibókwe mu

fíkófíkófíkó fé nfúó.<sup>k</sup> 45Bréá Bulu igyi ahapú dehen pú Farisifo ámu bonu Yesu ayébi anfi á, ulowankí amú ání amú ɔde. 46Teki bekleá békutá mu, táme benya ifú, tsúfé ɔɔm amu butobú Yesu ání Bulu ɔnósú ɔtɔírú ogyi.

### Ɔtsikpaín Iwí Yébi

(Luka 14:15-24)

**22** 1-2Yesu létrá bláa Yudafɔ igyi ahapú pú Yudafɔ ahande amu asún yébitɔ ɔbéé, “Bulu iwíegyí ámu igyi fé asún ání. Owíe ɔku dé ɔtsi kpaín há mu bi, 3ɔleti ahá ɔbéé, bubá nke ámu asi. Bréá owíe ámu lóbwe tá á, ɔlɔwa mu asúmpú ɔbéé, buyéti ahá ámu abuba, táme bekiná bá. 4Mú su ɔlɔlawá mu asúmpú bámbá ɔbéé, ‘Mlitra yebláa ahá ámu mliaa, nabwé tógyítɔ tá. Bamó mí nnantswie akɔnkpɔnti ámu pú amúá bawá nfo, níná atɔ ámu féé tá. Mú su bubá ɔtsi ɔkpaínkpá unu.’ 5Táme ahá ámú beyéti ámu bumekplá amú. Benatí sí amú yó amú agyómású. Aku benatí yó amú ndɔtɔ. Aku é benatí yó amú ibiá ogyíkpá. 6Amú atráhe bekutá asúmpú amu, dá amú, mó amú. 7Bréá owíe amu lónu asún ání á, ɔbls léhié kítá mu. Mú su ɔlɔwa mu usá akɔpú, bɔyómɔ ahá ámú bɔmɔ mu asúmpú amu, wá amú wúlu ogyá. 8Múú ɔlebláa mu asúmpú bámbá ɔbéé, ‘Baníná ɔtsikpaín atogyihe amu tá, táme ahá ámú neti ámu bumɔfun ha mí wóyítɔ ba. 9Mú su mliwie awúlutɔ, amliti ɔhagyíɔha ání mlówun, ɔba ɔtsi ɔkpaínkpá unu.’ 10Inu asúmpú amu bowie awúlutɔ. Beti ɔhagyíɔha ání bowun, aha wankláán pú aha laláhe féé. Mú su ahá ɔɔbulá ɔtsi ɔkpaínkpá unu dédéédé.

11 “Táme bréá owíe amu lébeki ahá ámú batí ámu a, olowun oyin ɔkúá ɔmɔwa ɔtsikpaín nketo atadié. 12Múú ɔlefuté mu ɔbéé, ‘Agya, nkáli ulɔbwe fumɔwa ɔtsikpaín nketo atadié asa feba nfi?’ Oyin ámu métalí lé mú ɔnó. 13Múú owíe amu lélabláa mu asúmpú ɔbéé, ‘Mlikli mu ayabi pú mu ibi, amlitswi mu wa oklún amutɔ. Inú isú múa kpisíi bu nu.’”

<sup>k</sup> 21:44 Múts yéé 44 uma nwulú dada amu akutɔ.



14 Yesu lómɔ mu asún ɔnɔ ɔbéɛ, “Bulu tetí ahá tsɔtsɔɔtsɔ, táme ahá kpalobí pé ɔtelé.”

### Lampóoka

(Marko 12:13-17; Luka 20:20-26)

15 Farisifo ámu bɔyɔbwe ɔnɔ-ɔkule ání bétetéɛ Yesu ɔnɔ́tɔ asún nú, abunya mu akutálé. 16 Mú su bɔwa amú akasípú pú Owíe \*Herode ahá Yesu wá beɛ buyéfité mu beɛ, “Osunápú, anyin ání ɔnɔkwaliɔ fuyi, fútosúná Bulu asún ámu é ɔnɔkwaliɔ. Futamahá ɔhaa ɔtse fú agywun, tsúfé futamaku ɔhaa ansítú. 17 Mú su anidé fú fité anu. Aní mbla léha ɔkra ání akáa lampóo ha Roma owíe dehen Kaesare, ntée anumáka?”

18 Táme Yesu lówun amú agywun laláhe amu. Mú su ɔlefíté amú ɔbéɛ, “Apinabwebí abwepú, ntogyi sú mlidé mí sɔ́ɔ kí? 19 Mlitsu kóba amú butɔpóká lampóo amu iku ba mi anki.”

Bɔɔba mu, 20 ɔlefíté amú ɔbéɛ, “Ma nwun pú mu dá dín mósú?”

21 Bele mú ɔnɔ beɛ, “Kaesare.”

Mú ɔlebláa amú ɔbéɛ, “Múmú mliɔ t́á igyi Kaesare klé ha Kaesare, amlɔ mu á igyi Bulu klé é ha Bulu.”



Lampóoka kóba ni.  
(Mateo 22:19)

22 Yesu mbuai ánfí lóbwie amú ɔnɔ́. Mú su benatí.

### Kusú Tsú Afúlitɔ lwi Asun Futéhé

(Marko 12:18-27; Luka 20:27-40)

23 Eke ámu kén á, \*Sadukifo aku beba Yesu wá. Buggy ɔpasua kvá buteblí beɛ, kusú tsú afúlitɔ má unu. Befíté mu beɛ, 24 “Osunápú, Mose lówanlín tswi aní ɔbéɛ, ‘Ní ɔku mu mu ka bumɔkwí asa olowu sí mu ka ámu a, mu pio otsú mu ka ámu tsia, féki ɔkwu ha owupú ámu.’ 25 Oyin ɔkule abí abasiénɔ́ aku betsiá. Amótɔ ogyankpau létsiá

ɔká, táme ɔmɔkwí asa olowu. Mu pio lótsu ɔsurapuka amu tsía, <sup>26</sup>táme mu é ɔmɔkwí. Ɔsaasi lótsu ɔtsi ámu tsía. Mu é ɔmɔkwí. Alu yótu osienósí amu. <sup>27</sup>Ɔma-ɔma a, ɔsurapu mu é lóbowu. <sup>28</sup>Afúli ɔkusóké a, amótɔ ɔmɔmu ɔbóbwe mu kulu? Tsúfé amó abasiénó ámu féé betsiá mu.”

<sup>29</sup>Múú Yesu léle mú ɔnɔ ɔbéé, “Megyí mli ológyi. Mluméyín Bulu asun wanlínhé amu ntée Bulu túmi. <sup>30</sup>Ní afúli bókúsú á, bóbwe fé Bulu-abɔpu. Buméetsiá aká mba akúlu. <sup>31</sup>Mlumókókla asún ání Bulu onutó lébláa mli tsú afúlikusú iwɛ? <sup>32</sup>Bulu asun wanlínhé léblí ɔbéé, ‘Mígyí mli anáin \*Abraham mba \*Isak pú \*Yakob Bulu ámu ni.’ Ɔni su megyí awupú Bulu ógyi, akɛankpapu Bulu ógyi.”

<sup>33</sup>Bréá ɔɔm amu bonu asún áni á, mu atosunáhé anfi leha ɔnɔ lobwie amó.

### **Bulu Mbla Ámuto Múá Ɔɔn**

*(Marko 12:28-34; Luka 10:25-28)*

<sup>34</sup>Bréá Farisifo bowun ání Yesu lalé Sadukifo ámu asún ɔnɔ, asún lawú wá amó ɔnɔ á, bekpa aba ya Yesu wá. <sup>35</sup>Amótɔ ɔkuleá ogyi mbla osunápú léfuté Yesu asún, ɔpusɔ mu ki. <sup>36</sup>Ɔlefuté Yesu ɔbéé, “Osunápú, Bulu mbla ámuto mɔmu dún?”

<sup>37</sup>Yesu lébláa mu ɔbéé, “ ‘Pu fú klɔn, fú ɔkláa pú fú agywun féé dwe fú Wíe Bulu.’ <sup>38</sup>Ɔni gyí mbla ámuto gyankpapu áni Ɔɔn mú féé ní. <sup>39</sup>Nyɔɔsi é igyi fé mú. ‘Dwe fú bá fé fú iwɛ.’ <sup>40</sup>Mose Mbla pú Bulu ɔnɔsú atɔpú amu atosunáhé féé luí mbla anyɔ ánfisu.”

### **Ma Gyí Kristo Amu?**

*(Marko 12:35-37; Luka 20:41-44)*

<sup>41</sup>Ɔníá Farisifo ámu bebefia sí bulí su á, Yesu léfuté amó ɔbéé, <sup>42</sup>“Nkálɛ mlidé Kristo, (ɔhá ámú Bulu ladá mu ofúli amu) iwɛ gywúin? Ma mu na ní?”

Bebláa mu beɛ, “Owíe Dawid mu na ní.”

<sup>43</sup>Ɔlelafuté amó ɔbéé, “Mú ntogyi sú Ɔɔe Wankíhé léha Owíe Dawid létɛ mu ɔbéé ‘Mí Wíé?’ Tsúfé Owíe Dawid léblí ɔbéé,

44 ‘Ani Wíe Bulu lébláa mí Wíe ɔbée,

Tsia mí gyɔpisu nfi

yɔfun bréá néha fétsatsáa fú alupósú?’

45 Ní Owíe Dawid onutó létí ɔhá ánfí Bulu ladá ofúli anfi ɔbée, mu wie a, nkáli sù ɔtráa ogyi mu na?”

46 Amútó ɔkuku métalí lé mú ɔnó. Tsú eke ámu a, ɔhaa métrá wa klɔn futé mu asvansu.

**Mose Mbla Asunápú Pú Farisifo Tsiátó**

(Marko 12:38-39; Luka 11:43, 46; 20:45-46)

**23** <sup>1</sup>Asún ánfí ɔma a, Yesu lébláa ɔɔm amu pú mu akasípú amu ɔbée, <sup>2</sup>“Mose mbla Farisifo pú Mbla asunápú amu budesuná. <sup>3</sup>Mú su mligyi amú asun blíhé féésú, táme mlumátsiá amú atsiábi. Tsúfé butamagyi amú onutó asun blíhésu. <sup>4</sup>Butɔpú atɔ dwindwín sùrá ahá, táme amú onutó butamapú osrebi ɔkule kùráá tsá amú tsu. <sup>5</sup>Butɔbwé amú tógyító ahá ansísú. Butɔwánlín Bulu asún dínká tati téihésu, púklí amú ɔsukpi pú amú bina ɔbasu. Butɔlú nfé tíntíntín síansían amú atadié ɔnó. <sup>6</sup>Butekle otsiákpá yilé tsiá nke ogyíkpá pú Yudafɔ Ofiakpa. <sup>7</sup>Bedáli yɔ dɔnsu á, butekle beé ahá butíi amú beé, ‘Asunápú,’ abubun ha amú itsiá. <sup>8</sup>Mli féé á, apíó mligyí. Mú su mlumáha abuti mlitɔ ɔhaa osunápú. ɔbakúle pé gyí mli osunápú. <sup>9</sup>Ali kén mlumáti ɔhaa mli sí ɔsolúu anfisú ní. Tsúfé ɔsí ɔkule pé mlibu, ɔbu ɔsúsú. <sup>10</sup>Tráhetráhe a, mlitɔ ɔhaa máha abuti mu nkpa ogyápu. Tsúfé nkpa ogyápu ɔkule pé mlibu. Mɔgyí Kristo, (ɔhá ámúú Bulu ladá mu ofúli amu). <sup>11</sup>Mlitɔ ɔhande ɔbwée mli osúmpú. <sup>12</sup>Tsúfé



Farisiyin ni. (Mateo 23:5)

fúá fotsu iwí á, Bulu ɔbéba fu asu. Fúá feba iwiasí é á, Bulu obótsu fu fúá.

### Apinabwebí Abwepú

(Marko 12:40; Luka 11:39-42, 44, 52; 20:47)

13-14“Mli Farisifo pú Mose mbla asunápú, apinabwebí abwepú, mligyɔwi ní. Mlulatin Bulu iwíegýí ámu ɔkpa wá ahá. Mli onutó mlímédékléá mlówie unu, mludé ahá ání bude mbódí bɔ beɛ bówie unu é ɔkpa tíin.<sup>1</sup>

15“Mli Farisifo pú Mose mbla asunápú, apinabwebí abwepú, mligyɔwi ní. Tsufé mlitefá lun fá ɔpu, dú ibu kplí ibu há ɔha tedámlí kluntɔ. Táme ní ɔdámlí kluntɔ tá á, mlitelábwé mu otemlí usubutí ogyá ání itamaduntɔ ɔyɔpú dun mli onutó.

16“Ansibi abwiepú ání mludé ahá kpa, mligyɔwi ní. Mliteblí mliaa, ‘Ní ɔku ɔká Bulu ɔtswékpa obu ámu ntam a, imehián ání obégyi músú. Táme ní ɔká sika pepe atɔ́a ibu ɔtswékpa obuto unu mú ntam a, ilehián ání obégyi músú.’  
17 Ansibi abwiepú! Aha mimláhe! Mútɔ́ mɔ́mu bu labi dun? Sika pepe atɔ́ ámu lóó, ntée Bulu ɔtswékpa obu ámú ɔlahá sika ámu lamlí Bulu klé amu? 18 Mlitetráa blí mliaa, ‘Ní ɔku ɔká \*afɔ́ɔɔɔ-asubwi ntam a, imehián ání obégyi músú. Táme ní ɔká afɔ́ɔɔɔ-abɔ́tɔ́ ámu ntam mú á, ilehián ání obégyi músú.’  
19 Ansibi abwiepú! Mútɔ́ mɔ́mu bu labi dun? Afɔ́ɔɔɔ-abɔ́tɔ́ ámu ntée afɔ́ɔɔɔ-asubwi ámú ɔlahá mú ɔlamlí Bulu klé amu? 20 Ní feká afɔ́ɔɔɔ-asubwi amu ntam a, faká ibwi ámu pú atɔ́a ɔdun músú féé ntam. 21 Ní feká Bulu ɔtswékpa amu ntam a, faká Bulu mua mu otsiákpá ntam. 22 Ní feká ɔsúsú ntam a, faká Bulu mua mu owíe obíá ntam.

23“Mli Farisifo pú Mose mbla asunápú, apinabwebí abwepú, mligyɔwi ní. Mliteye mli ɔtsutsú pú kpántánkplámá

<sup>1</sup>23:14 Mútɔ́ yée 14 bu nwólú dada amu akutɔ́: Mli Farisifo pú Mose mbla asunápú, apinabwebí abwepú, mligyɔwi ní. Mlitelí ahátɔ́ b́ mpáú t́nt́t́nt́n, táme mlitɔ́swlí asvrapv amó wóyí pú amó atɔ́ féé é. *Íni su Bulu ɔbébutí mli isv dun aha tráhe.*

aná féétó idú, pú \*idúsí há Bulu. Táme mlimédé Bulu mbla amúú ihé dehián, igyi asúngyí ɔɔkwalisu, aba nwewúun pú ɔɔkwaliwa ámusu gyi. Múdéhián ni, táme mlimákiná iyétó dúsí amu é ha. <sup>24</sup>Ansibi abwiepú ání mludé ahá kpa, mligyowí ní. Mlitɔtsrɔ mbépi lé oputsútó, táme mlitemé mbéwun.

<sup>25</sup>“Mli Farisifo pú Mose mbla asunápú, apinabwebí abwepú, mligyowí ní. Tsúfé mlitɔfwí mli nwe pú mli nlepe ɔma wankláán, táme atóá mlilapú owi múa ɔnsipe swíí ahá sɔ́n bu mótó. <sup>26</sup>Farisifo ansibi abwiepú, mligyankpa fwí nwe múa nlepe ámutó, mú ɔma é bétun.

<sup>27</sup>“Mli Farisifo pú Mose mbla asunápú, apinabwebí abwepú, mligyowí ní. Mlilabwé fé ntsán ání bakpá mú afá futútúútú, mú iwí lawá akíle. Táme mótó mú á, afúli awú pú ató plóhé sɔ́n bó mú. <sup>28</sup>Alí kén mligyí ní. Ahá buteki mli ání mligyí yilé abwepú. Táme mli kluntó mú á, apinabwebíbwé múa lalahébwé sɔ́n bó mú.

### Bulu Isobití

(Luka 11:47-51)

<sup>29-30</sup>“Mli Farisifo pú Mose mbla asunápú, apinabwebí abwepú, mligyowí ní. Tsúfé mlitɔpwé Bulu ɔ́nsú atóipú pú yilé abwepú ámúú betsiá ámu ntsán, lá mú iwí wankláán, blí mlíaa, ‘Ní anulétsiá aní anáin brésú asa ɔ́mɔ Bulu ɔ́nsú atóipú anfi á, teki anumówa ibi mótó.’ <sup>31</sup>Mli asun blíhé anfi désuná ání mligyí Bulu ɔ́nsú atóipú amɔpú ámu abí-aná ní. <sup>32</sup>Mliwuna yɔ́ mósú, amlumɔ mli anáin bwehé ámu ɔ́nó. <sup>33</sup>Awɔ́, abe abí-aná! Mlétalí srí sí ipón ámúú Bulu ɔ́béha mli, kpá mli wá isobití ogyá ámúú itamaduntó ámu? <sup>34</sup>Mú su nde Bulu ɔ́nsú atóipú, anyansapu pú Mose mbla asunápú wa sísí mli. Táme mlómɔ aku, dá amútó aku mántá oyikpalíhesu. Mlónwen amútó aku mpli mli ofiakpa, dínká akusu tsú awúlusu yó awúlusu. <sup>35</sup>Íni su yilé abwepú ámúú mlíaa mli anáin mlílamó tsú \*Habelsu ɔ́ɔfun Sakaria, ogyi Barakia mu bi ámúú mlílamó Bulu ɔ́tswékpa obu múa \*afɔ́dɛ-asubwi amu nsné ámu féé obugya béba mliu.

<sup>36</sup>Ɔnɔkwali nde mli bláa. Ínu aná fée su Bulu ɛsubití béba mli ndemba-abí ánfisu ní.

### Yerusalemfo lwi Ɔdwe

(Luka 13:34-35)

<sup>37</sup>“Óo Yerusalemfo, Yerusalemfo! Mlitómó Bulu ɔnósú atɔ́pú, dá abí ání Bulu lawá sísí mli abwi mó ní. Ntekleá nóbun mli abísú brégyíbré, fé alá bate tobun mu abísú, táme mlitamahá mí ɔkpa. <sup>38</sup>Mluki, Bulu obési mli ɔtswékpa tswi mli, ibédi kpan. <sup>39</sup>Tsúfé nde mli bláa mbée, mli méetrá wun mi ekekeeke, yófun ekeá mléblí mliáa, ‘Bulu oyúla ɔhá ámúú ɔbá mu ɛdátó.’ ámu.”

### Bulu Ɔtswékpa Amu Bwie

(Marko 13:1-2; Luka 21:5-6)

**24** <sup>1</sup>Bréá Yesu lédali Bulu ɔtswékpa unu ɔyó á, mu akasípú amu benatí yótu mu, súná mu ɔtswékpa unu mbu ámu. <sup>2</sup>Múú ɔlebláa amú ɔbéé, “Mlilawun mbu akpɔnkpɔnkpɔnti ánti fée? Ɔnɔkwali nde mli bláa. Bóbwie mó fée bun. Ibwi kule kúráá méesian dinká mó bású.”

### lwiɔsun Múá Iklán

(Marko 13:3-13; Luka 21:7-19)

<sup>3</sup>Bréá Yesu tsie Nfɔ-nyíbu ámuɔ, ɔde Bulu ɔtswékpa amu kú a, mu akasípú amu nkule befíté mu beɛ, “Bla aní, bré mɔmɔtɔ ínu fée béba? Osúna mɔmu é ɔbéba, ibósuná ání fú bábu pú ɔyí ɔnómóké lafun?”

<sup>4</sup>Ínu Yesu léle mú ɔnó ɔbéé, “Mluki wankláán, ménu ɔhaa méemlé mli. <sup>5</sup>Tsúfé ahá tsɔtsɔtsɔ bópu mí dá ba beɛ, amúgyí Kristo, (ɔhá ámúú Bulu ladá mu ofúli amu) ni. Bémlé ahá tsɔtsɔtsɔ bófwi ɔkpa. <sup>6</sup>Ní mlonúá usá ladá mantáa mli ntée ɔtunekú á, opúni mátsíí mli. Tsúfé lehián ání ínu aná fée béba, táme imedésuná ání ɔyí ɔnómóké ámu lafun. <sup>7</sup>Tsúfé ɔmá bóko aba. Awíe bókusú líí abasú. Akún béba, ɔsulúú békpunkí ntíné-ntíné. <sup>8</sup>Ínu fée igyi fé lwiɔsun ání ɔtsi towun bréá ikwú de mu dwiín.

9“Alí bré ámutɔ á, mí su ɔmá-ɔmá bólu mli. Bédinká mli su, pú mli há bówa mli amumuyɔ, mɔ mli. 10Mli ɔ ahá tsɔtsɔɔtsɔ bédida hógyitɔ. Bólu aba, lé aba há. 11Afunu awapú béblí bée, Bulu ɔnɔsú atɔ́pú bɔgyi tsɔtsɔɔtsɔ béba bemlé ahá tsɔtsɔɔtsɔ, há amú bófwɔ ɔkpa. 12Lalahebwe bómoní. Mú su ahá tsɔtsɔɔtsɔ buméetrá dwe aba. 13Táme ɔhá ání ɔletalí líí kínkíínkín yɔ́fun ɔyí ɔnɔmɔké á, Bulu ɔbɔ́hɔ mu nkpa. 14Mú óó á, ahá béda Bulu iwíegyéí ámu iwɔ asun wankláán ánfɔ ɔkan ɔyítɔ fée, ménɔ ahá fée bónu mú, asa ɔyí íbɔ́mɔ ɔnɔ.

### ᐱᐱᐱᐱᐱ Wúunbɔ

(Marko 13:14-23; Luka 21:20-24)

15“Ní mlowun akisítɔá itobwíé ɔmá, ida ɔwankíkpa unu, ɔde Bulu ɔtswékpa unu kpɔ́í, fé alíá Bulu ɔnɔsú ɔtɔ́pú Daniel léblí tswɔ a,—Aklápu, mlinu mú asú!— 16múmú ahá ání bubu Yudea ɔmátɔ busrú yɔ abusu. 17ɔhá ání ɔdɔn obusu mákpli ɔbéé, moyótsu tɔtɔ obuto. 18ɔhá ání ɔbu ndɔtɔ é ɔmáyínkí ba wóyítɔ botsu mu tati. 19Amenyapú pú abí-ayín ání bɔpia abi ɔɔbwe alí bré ámutɔ, bɔgyɔ́wɔ ní. 20Mlikokoli Bulu mliáa, mli ɔsríké amu umábwe nyankpu mɔ́a atsalíbí ntée \*ɔkpúnú ɔdaké. 21Tsúfé tsú ɔyí asitsuábɔ a, asun wunhe ání íbéba alí bré ámutɔ odu kuku mɔ́kúba kí. Mú odu kuku é méetrá ba ekekeke. 22Ní Bulu médunkí nke ámusu á, tɔkɔ ɔhaa méesian ɔyítɔ. Táme ahá ámúú alalé púbwé mu kle amu su aladínkí nke ámusu.

23“Alí bré ámutɔ á, ní ɔku lébláa fu ɔbéé, ‘Kí, Kristo, (ɔhá ámúú Bulu ladá mu ofúli amu) bu nfi ntée nána’ á, máhogyi. 24Tsúfé ahá ání bée amógyí Kristo amu pú ahá ání bówa afunu bée, Bulu ɔnɔsú atɔ́pú bɔgyi tsɔtsɔɔtsɔ béba ɔyítɔ. Bóbwé ofúla pú osúna akpɔnkpɔntɔ púmlé ahá. Ní bétalí kúráá á, bémlé ahá ámúú Bulu lalé ámu é. 25Mlinu, nde mli ɔlá da yáí asa íba.

26“Ní ɔku ɔbláa mli ɔbéé, ‘Kí, Kristo amu laba ɔbu dimbísú’ a, mli mádalɔ yéki. Alí kén ní béblí bée, ‘ɔbu obutótɔ’ é mli máhogyi nɔ. 27Tsúfé mí, Nyankpusa-Mu-Bi

ánfi ɔbáke ɔbɔbwe fé alí á múú nyankpu tɔfwí ɔbɔ, butowun mú tsú owí ɔdalukpa yédalí owí ɔkplwíékpa amu.

28“Ɔtínéá ɔtɔ wuhé da a, ɔnó alása butefia.

### Nyankpusa-Mu-Bi Ámu ɔbábi

(Marko 13:24-27; Luka 21:25-28)

29“Ɔwɔsun wúun amu ɔma a, owí ɔbéta, ɔtsra é ɔmétrá féi. Ntsrakpabi békpa tsú ɔsúsú beda. Nwulótáa múa mútɔ atɔ féé békpunkí. 30Mú ɔma a, mlówun mí, Nyankpusa-Mu-Bi ánfi ɔbábi ɔsúsú. Ɔyítɔ ahá féé bósu. Ɔhagyísha obówun ání mí, Nyankpusa-Mu-Bi ánfi napú túmi múa numnyam kpɔnkpɔnti mbu nwulótáatɔ tsú ɔsúsú nebá. 31Inu á, ɔkpe ku ɔbélun kúklúkúú, Bulu ɔbówa mu abɔpu béyekpa mu ahá á múú alalé ámu tsú ɔyí afunka ana ámu féésú.

### Ɔyí Ɔnómɔ ɔwɔ Osúna

(Marko 13:28-31; Luka 21:29-33)

32“Mlɔpuki pɔntɔ ɔyí. Ní mú abámbi depɔí, ide ate pɔpwe le á, mlɔtébí ání awikpan bré lafun. 33Alí kén, ní mlowun ání ntobí ánfi féé ide mútɔ bá a, mlébi ání mí, Nyankpusa-Mu-Bi ánfi ɔbábi lafun ta ní. Nawíé wóyí ámu ɔnɔ tá. 34Ɔnɔkwali nde mli bláa mbéé, ndemba-abí ánfi féé bumóowu tá asa ínu féé béba mútɔ. 35Ɔsú múa así féé bótsun, táme mí asun blíhé móɔtsun ekekekeke.

### Nyankpusa-Mu-Bi Ámu Ɔbáke

(Marko 13:32-37; Luka 17:26-30, 34-36)

36“Ɔhaa méyín eke ntée bréá ntobí ánfi féé ɔbába. Bulu-abɔpu bumeyín. Bulu mu Bi ámu é méyín, nkétí aní Sí á múú ɔbu ɔsúsú ámu nkule pé yin. 37Alí á múú ilegyi \*Noa brésú amu a, alí ɔbégyi mí, Nyankpusa-Mu-Bi ánfi é ɔbábi ní. 38Tsúfé asa ntsubulábí amu ɔlafun a, ahá betsiá búde atɔ gyí, búde ntá núu, búde aká tsiá, búde atsi kítá há akúlu alu yɔfun ekeá Noa lówie mu dáka kpɔnkpɔnkpɔnti ámutɔ. 39Ɔhaa mébi tɔá ide músú yɔ, kpéfun bréá ntsu ámu ɔbulá



súrá amú fée náti. Alí kén buméebi mí, Nyankpusa-Mu-Bi ánfí íbábi ní. <sup>40</sup>Alí bré ámutó á, ní ayin abanyó bulí ndó kuletó bude agyómá yó á, Bulu obótsu ɔkule sí ɔkule. <sup>41</sup>Ní atsi abanyó bude nfúó kwe á, Bulu obótsu ɔkule sí ɔkule.

<sup>42</sup>“Mlídinka ansí iwísu, tsúfé mlíméyín ekeá mli Wíe ɔbéba. <sup>43</sup>Táme mlinu asún ánfí. Ní wóyí mu wie yin onyé bréá owikplu ɔbéba mu wóyító a, tekti ologyo mu wóyí, owikplu móbwie wíé, wí mu ató. <sup>44</sup>Mú su mli é mligyo, tsúfé mí, Nyankpusa-Mu-Bi ánfí néba bréá mli ansí medín mísú.

### Osúmpú Wankláán Pó ɔlaláhe

(Luka 12:41-48)

<sup>45</sup>“Ma mee gyí osúmpúá ɔletin ansí, ɔbu ɔnɔkwali? Mu íbitó mu wie tɔpú mu aba atráhe wá, ɔbéé ɔhá amú atogyihe dinka brésú. <sup>46</sup>Ansí bégyi osúmpú amu, ní mu wie amu ɔbá bowun ání lélé ɔde mú bwe. <sup>47</sup>Ɔnɔkwali nde mli bláa. Mu wie amu ɔbópu mu ató fée wá mu íbitó. <sup>48</sup>Táme ní osúmpú laláhe ogyi, ɔleblí wá nwuntó ɔbéé, ‘Mí wíe méeba séi.’ <sup>49</sup>Ínu su olefi así ɔde mu aba asúmpú da, mva ntá abupú bude ató gyí sí amú, bude ntá núu bu á, <sup>50</sup>mu wie amu ɔbéba bófwie mutó ekeá ɔmedín ansí. <sup>51</sup>Mu wie amu ɔbéhie títi mutó, trá butí mva apinabwebífo ámu asu kékée. Ínú isú múa kpisíi bu ní.

### Mbitebí Dú Aku lwi Yébi

**25** <sup>1</sup>“Bulu iwíegyí ámu íbóbwe fé mbitebí dú akúá botsu amú nkandíe dálú beyéfia ɔká pɔpwe otsiápu ɔku. <sup>2</sup>Amótó abanú bemímláa, abanú é betin ansí. <sup>3</sup>Aha mímláhe amu botsu amú nkandíe, táme bumotsu nfó kuku kítá. <sup>4</sup>Táme atiansipu amu botsu nfó wá atótó kítá. <sup>5</sup>Ɔká otsiápu amu mókɔsí ba. Mú su mbitebí ámu fée bɔgyɔsí, tsun mútó dídi.

<sup>6</sup>“Ɔyí-nsiné á, ɔku lósurá okitikíti ɔbéé, ‘Ani pi, ɔká otsiápu amu ɔbá o! Mlídali yefia mu!’ <sup>7</sup>Ínu mbitebí ámu fée bókusú nywé amú nkandíe. <sup>8</sup>Aha mímláhe amu bebláa atiansipu amu bee, ‘Ani nkandíe dedúun. Mú su mlíha ani



*Mbitebí ámu fée bókusú nywé amú nkandíe. (Mateo 25:7)*

nfɔ kpalobí awa aní kléto.' 9Múú atiansipɔ amú bebláa amú beɛ, 'Ó-o, umɔtsú. Imɔ́ɔfun ania mlɔnyɔ. Mliɔɔ afepú wá, amliɔɔho mli klé.' 10Bréá aha mimláhe amú bɔpu ɔkpa bɔyɔ á, ɔká otsiápu amú léba. Amú ámúú beda iwɔsu ámu bobuo ɔká otsiápu amú wíé ɔká otsiákpá unu, oyin ámu asúmpú befin obu ámu.

11“Mú ɔma a, mbitebí atráhe amú é beba belí klɔn ɔma, blí beɛ, ‘Ani sí, finki ha aní awie.’ 12Táme ɔká otsiápu amú lébláa amú ɔbéɛ, ‘Ɔnɔkwali nde mli bláa, mmeyín mli ɔkpagyíɔkpasu.’ ”

13Yesu lómɔ mú ɔnɔ ɔbéɛ, “Ínu su mlɔda iwɔsu, tsúfé mí, Nyankpusa-Mu-Bi ánfɔ néba bréá mli ansí medín mísú.

### **Asúmpú Abasá Iwɔ Yébi**

*(Luka 19:11-27)*

14“Nyankpusa-Mu-Bi ámu íbábi bóbwe fé ɔkuá ɔde ɔkpa tu, ɔleti mu asúmpú, ye mu atɔ há amú ɔbéɛ, bukú músú ya mu. 15Ɔlɔpu sika pepe akente anu há ɔkule, pú akente anyo

há onyɔɔsi, ɔɔpu kente kule é há ɔsaasi. Ɖleha okugyɔku mu ɔwunlín ɔnɔ asa ɔlenatí. <sup>16</sup>Osúmpú á múú olenya akente anu ámu lówa ɔsa pú kɔba amu fi ibíágyí asi. Mú su umowa ɔpá kuku, olenya akente anu dínká múú. <sup>17</sup>Onyɔɔsi amu é lédamlí ibi mu sika pepe akente anyɔ ámu su alí kén. Mú su olenya akente anyɔ dínká múú. <sup>18</sup>Táme ɔsaasi amúú olenya kente kule amu mú lóyókwi ɔbɔ, pú mu wie sika pepe amu ɣáín mútɔ.

<sup>19</sup>“Uowa ɔpá asa amú wie amu lótsu mu ɔkpa ámu ba, ɔleti amú ɔbéé, muva amúnyɔ bóbu akúnta. <sup>20</sup>Osúmpú á múú olenya sika pepe akente anu ámu lótsu múba múú ɔdínka akente anu ámu ba mu wie, bebláa mu ɔbéé, ‘Mí wíé, feha mí sika pepe akente anu. Mí é nanyá akente anu dínká múú. Mú ní.’ <sup>21</sup>Mu wie amu léda mu ipán, blí ɔbéé, ‘Fabwé atɔ. Osúmpú wankláán fúgyi. Íniá fawá ɔnɔkwali atɔ túkúrííbi ánfuto su á, nɔpu fú yáí mí atɔ tsɔtsɔɔtsɔ ɔnɔ. Ba afubetsiá mí wá, anya ansigyí.’

<sup>22</sup>“Osúmpú onyɔɔsi amúú olenya sika pepe akente anyɔ ámu é lébláa mu wie ɔbéé, ‘Mí wíé, sika pepe akente anyɔ feha mí. Mí é nanyá anyɔ dínká múú. Mú ní.’ <sup>23</sup>Mu wie amu léda mu ipán, blí ɔbéé, ‘Fabwé atɔ. Osúmpú ɔnɔkwali pu fúgyi. Íniá fawá ɔnɔkwali atɔ túkúrííbi ánfuto su á, nɔpu fú yáí mí atɔ tsɔtsɔɔtsɔ ɔnɔ. Ba afubetsiá mí wá, anya ansigyí.’

<sup>24</sup>“Múú osúmpú amúú olenya sika pepe kente kule amu é lébebláa mu wie ɔbéé, ‘Mí wíé, nyin ání fú asón bu ɔnlun. Futɔkpótí atɔ ɔtínéá fumodu; futekpá atɔ-abí ɔtínéá fumefutá. <sup>25</sup>Mú su nenyá ifú pú fú sika pepe amu ɣáín ɔbɔtɔ. Mú ní, ho fú atɔ.’

<sup>26</sup>“Inu mu wie amu lébláa mu ɔbéé, ‘Osúmpú laláhe, ɔwuliyɔpú fúgyi. Fuyin ání ntɔkpótí atɔ ɔtínéá mmodu, ntekpá atɔ-abí ɔtínéá mmefutá atɔ. <sup>27</sup>Íniá fuyin mú alí á, teki fɔpu yɔtswi sika ɔyaíkpá. Íniá naba a, teki nɔyɔho múba múú abí.’ <sup>28</sup>Múú oyin ámu lébláa mu asúmpú amu ɔbéé, ‘Mlusu mu sika pepe kente kule amu ha ɔmuamúú alanyá akente idú ámu. <sup>29</sup>Tsúfé ɔhá ání ɔbu tsɔtsɔ á, betrá pu ɔku tsía mútɔ há mu, obénya tsɔtsɔɔtsɔ. Táme ɔhá ání ɔma á,

bóswí mu kpalobíbiá ɔbu, <sup>30</sup>amlutswi osúmpú anfi ɔma labi ánfí wa oklúntɔ. Inú isú múa kpisíi bu ni.'

### Asúngyí

<sup>31</sup>"Ní mí, Nyankpusa-Mu-Bi ánfí nebá mí iwíe ogyíkpa, Bulu-abɔpu fée bɔbuo mi á, nétsiá mí ɔsúsú numnyam owíe obíású. <sup>32</sup>Békpa ɔyítɔ ahá fée befia mí ansítɔ. Inu nótɔsí amótɔ, fé alá mbwi ɔkparú tótɔsí akúfa lé akpalátɔ. <sup>33</sup>Fówun nahá akúfa amu balíi mí gɔɔpɔsu, akpaláa amu é balíi mí binasu. <sup>34</sup>Inu mí ánfí ngyi Owíe anfi nébláa ahá ámúbú bulíi mí gɔɔpɔsu ámu mbée, 'Mli ahá ánfí mí Sí layúlá ánfí mliɔba, amlibetsiá iwíegyí ámúbú ɔlayálí há mli tsú ɔyí asutsuáɔi ɔpá ámutɔ. <sup>35</sup>Tsúfé akón lekitá mí á, mliléha mí atɔ negyi. ɔmewóli lekitá mí, mliléha mí ntsu nonu. Nɔbwe ɔfɔɔ, mliɔhɔ mi ɔfɔɔ. <sup>36</sup>Nenatí yayá, mliléha mí tati nedidá. Nɔɔ, mliléki mi. Nedi obu, mlilébá beki mi.'

<sup>37</sup>"Inu yilé abwepú ámu béfité mí bee, 'Ani Wíe, ɔmenke anulówun ání akón de fú, anuléha fú atɔ fegyí? ɔmewóli de fú, anuléha fú ntsu fonu? <sup>38</sup>Fɔbwe ɔfɔɔ, anulóhɔ fu ɔfɔɔ? ɔmenke fenatí yayá, anuléha fú tati fedidá? <sup>39</sup>ɔmenke fɔɔ, ntée fedí obu, anulébá beki fu?'

<sup>40</sup>"Inu mí ánfí ngyi Owíe ánfí nébláa amú mbée, 'ɔnɔkwali nde mli bláa. Tógyítɔá mliɔbwe há mí apíó ánfí ahá butamabú amú wá ahátɔ ánfítɔ ɔku á, mí mliɔbwe mú há á.'

<sup>41</sup>"Inu nébláa ahá ámúbú bulíi mí binasu ámu é mbée, 'Mlikpukpe tei nfi. Bulu lalwíi mli. Mliɔɔ ogyá ámúbú utamadun, Bulu lélayálí há ɔbunsám múa mu abɔpu amutɔ. <sup>42</sup>Tsúfé akón lekitá mí, mliíméha mí atogyihe. ɔmewóli lekitá mí, mliíméha mí ntsu annu. <sup>43</sup>Nɔbwe ɔfɔɔ, mliímɔhɔ mi ɔfɔɔ. Nenatí yayá, mliíméha mí tati andida. Nɔɔ, nedi obu; mliíméki mi.'

<sup>44</sup>"Inu amú é béfité mí bee, 'Ani Wíe, ɔmenke anulówun ání akón de fú, ɔmewóli de fú, fugyi ɔfɔɔ, funa yayá, fudelo ntée fuda obu; anumébeke fu?' <sup>45</sup>Inu mí ánfí ngyi Owíe anfi nébláa amú mbée, 'ɔnɔkwali nde mli bláa. Ali ámúbú mliímɔbwe mú há mí apíó ánfí ahá butamabú amú wá ahátɔ ánfítɔ ɔku á, mí

mlumɔbwe há á. <sup>46</sup>Bulu ɔbéha amú bóyo iwɔsun ání utamatátɔ, táme yilé abwepú ámu mú bénya nkpa ání utamatá.”

### Bektlíú Yesu Nwunsu

(Marko 14:1-2; Luka 22:1-2; Yohane 11:45-53)

**26** <sup>1</sup>Bréá Yesu lósuná atɔ ánfɔ fée tá á, ɔlebláa mu akasípú amu ɔbéɛ, <sup>2</sup>“Mliyin ání ulasí nkenyɔ bégyi Israelfɔsu \*Katsun Nke. Nke ámutɔ á, ɔku ɔbɔpu mí, Nyankpusa-Mu-Bi ánfɔ wá mí alupú ɔbutɔ, béda mí mántá \*oyikpalíhesu.”

<sup>3-4</sup>Alɔ bré ámutɔ á, Yudafo Bulu igyí ahapú dehen pú amú ahande befia igyí ɔhapú dehen Kaiifa wóyítɔ, kítá agywun ɔkpa ání bótsun músú kítá Yesu ɔaintɔ, mɔ mu. <sup>5</sup>Táme beblí beɛ bumɔɔbwe mú nke ámutɔ, méni kpokiti méeda ɔmá ámutɔ.

### Ofobí Fánfánfán Pwólí Yesu

(Marko 14:3-9; Yohane 12:1-8)

<sup>6</sup>Bréá Yesu bu Betania wúlutɔ, Simon ɔkuá alalɔ \*ɔlɔ pepe ki wóyítɔ ɔde atɔ gyí a, <sup>7</sup>ɔtsɔ ɔku léba mu wá. ɔde prentva wankláán kuá ofobí fánfán ání ɔbu bíá bɔ mú, ɔletséí ofobí ámu wólí Yesu nwuntɔ. <sup>8</sup>Yesu akasípú amu benya ɔblɔ bréá bowun íni. Mú su befité beɛ, “Ntogyi sɔ ɔtsɔ ánfɔ layíntá ofobí fánfán ánfɔ? <sup>9</sup>Abétalí fé mú íbíá kpékplé, pú kɔba amu há ahiánfɔ.”

<sup>10</sup>Yesu lébi ání ɔblɔ lakítá amú. Mú su ɔlebláa amú ɔbéɛ, “Ntogyi sɔ mlidé mu háan? ɔtɔ yilé alabwé há mí. <sup>11</sup>Ahiánfɔ bétsiá mlɔtɔ ekekegyíeke, táme mí mú mméetsiá mli wá yó. <sup>12</sup>Alatséí ofobí fánfán ánfɔ wólí mí, pólá mí ɔyulúv yáí há mí opuláké. <sup>13</sup>Ɔnɔkwali nde mli bláa. Ɔyítɔ ɔtínegyíɔtíneá béda Bulu asun wankláán ámu ɔkan a, beblí tɔ ánfɔ ɔtsɔ ánfɔ labwé ánfɔ púkáín musu.”

### Yuda Iskariot Lótsulá Ání Ɔbéle Yesu Há

(Marko 14:10; Luka 22:3-6)

<sup>14</sup>Mú ɔma a, mu akasípú dúanyɔ ámutɔ ɔkuá butetí mu Yuda Iskariot lóyo Bulu igyí ahapú dehen amu wá. <sup>15</sup>Ɔleyéfíté amú ɔbéɛ, “Ní nelé Yesu há mli á, ntɔ mléha mí?” Mú su

bekla sika futútú advasa (30) wá mu ibuto. <sup>16</sup>Tsú bré ámutò ɔlɔwa ɔkpa dunká ání ɔbótson músú lé Yesu há amú.

### Katsun Atogyihe Gyí

(Marko 14:12-21; Luka 22:7-14, 21-23; Yohane 13:21-30)

<sup>17</sup>Israelfò \*Bodobodo Mátúhé \*Nke ámutò eke gyankpapu a, akasípú amu beba Yesu wá befité mu beɛ, “Ani Wíé, obu mòmuto ayela ha fu, afugyi Israelfòsu Katsun Nke atogyihe amu?”

<sup>18</sup>Yesu lébláa amú ɔbéɛ, “Mliyo asímasi wá wúluto, amliyébláa mu mlíaa, ‘Osunápú amu ɔbéɛ, mí bré lafun. Ínu su mía mí akasípú abá begyi Israelfòsu Katsun Nke ámu fú wóyító.’ ”

<sup>19</sup>Mú su akasípú amu ɔyɔɔbwe ali ámutú Yesu lébláa amú ámu pépéépe. Bela obu ámutò, bwé Katsun Nketò atogyihe amu yái nu.

<sup>20</sup>Bréá nsaintò deklúun a, Yesu mua mu akasípú beba betsiá ɔpúnú ámu asi. <sup>21</sup>Ató ámu ogyíkpa a, Yesu lébláa amú ɔbéɛ, “Ɔnɔkwali nde mli bláa, mlito ɔkule ɔbéle mí há.”

<sup>22</sup>Asún ánfí léhie han akasípú amu. Mú su befi asi bude mu fité kulekule beɛ, “Mí Wíé, mí ní lóó?”

<sup>23</sup>Yesu lébláa amú ɔbéɛ, “Ɔhá ámutú mía munyo anidé ibi wa ɔlepe ɔkuleto ámu ɔbéle mí há. <sup>24</sup>Mí, Nyankpusa-Mu-Bi ánfí nówu fé alíá ɔwanlín tswí, táme ɔhá ámutú ɔbéle mí há ámu ɔgyówu ní. Ní bumetepí kwíí mu kúráá á, teki ibu alé há mu.”

<sup>25</sup>Yuda Iskariot ámutú ɔlele mu há ámu é léfité mu ɔbéɛ, “Osunápú, mí ní lóó?” Mú Yesu lébláa mu ɔbéɛ, “Ee, fablí.”

### Yesu Ntópwe Atogyihe Tráhe

(Marko 14:22-26; Luka 22:14-20; 1 Korintofo 11:23-25)

<sup>26</sup>Bréá bude ató ámu gyí a, Yesu léle bodobodo ipín, ɔleda Bulu ipán, bíábía mótó púhá mu akasípú amu, blí ɔbéɛ, “Mliho amlgyi. Mí ɔyulúu nu.”

<sup>27</sup>Ínu olotsu ntá-ewe, ɔleda Bulu ipán, púhá amú ɔbéɛ, “Mli féé mliho amlínu. <sup>28</sup>Mí obugya nu. Mú Bulu dépusí

mu ntam<sup>m</sup> ání alaká há ahásv ní. Bétseí mú wólí asi, méni obési ahá tsɔtsɔwtsɔ lakpan kíé amú. <sup>29</sup>Nde mli bláa mbéé, mméetrá nu \*wáun-abí ntá ánfí alu yófun ekeá mía mlinyo abélanu mú pópwe mí Sí \*iwíegyí ámutɔ.”

<sup>30</sup>Benya wá ilu dá Bulu ipán tá alí, benatí yó Nfɔ-nyíbu ámusu.

### Petro Ɖbóswí Ɖbéé Múmeyín Yesu

(Marko 14:27-31; Luka 22:31-34; Yohane 13:36-38)

<sup>31</sup>Bréá bowie Nfɔ-nyíbu ámusu á, Yesu lébláa amú ɔbéé “Mli féé mléyinkí mí ɔma onyenu. Tsúfé bowanlín wá Bulu asún ámutɔ beé, ‘Néda akúfa ɔkparú ámu lédá, mu akúfa bédasáín.’” <sup>32</sup>Múú ɔletrá blí ɔbéé, “Táme ní Bulu ɔkúsúa mu tsú afúlitɔ á, négya mli nkpá yó Galilea ɔmátɔ. Inu mlóɔɔtu mí ní.”

<sup>33</sup>Petro lébláa mu ɔbéé, “Ní amú féé beyinkí fú ɔma kúráá á, mí mú mméeyinkí ekekekeke.”

<sup>34</sup>Yesu lébláa mu ɔbéé, “Ɖnɔkwali nde fú bláa. Onyenu, asa bate ɔbéle ɔnɔ á, fúswí pú ibi wá ogyá tse sa fee fumeyín mí.”

<sup>35</sup>Inu Petro lébláa mu ɔbéé, “Ní lowu ígyi kúráá á, mméekiná fú ekekekeke.” Alí kén akasípú atráhe amu é beblí ní.

### Mpáibɔ Getsemane

(Marko 14:32-42; Luka 22:39-46)

<sup>36</sup>Yesu mua mu akasípú ɔyɔ ɔtinekuá butetí unu Getsemane. Bréá bowie unu á, ɔlebláa amú ɔbéé, “Mlitsia nfi, nɔyɔ nkpá yóɔɔ mpáú.” <sup>37</sup>Ɖlekpa Sebedeo abi anyɔ, bugyi Yakobo mua mu pio Yohane pú Petro ya. Inu asún lehié han mu, mu ansí lepe. <sup>38</sup>Múú ɔlebláa amú ɔbéé, “Asún ihíé de mí háan, ideklé unɔ mí. Mlitsia nfi, mía mlinyo agyo.”

<sup>39</sup>Inu ɔlenatí yó nkpá kpalobí, ɔleda akpawunu pú ansítɔ bun ɔsulúɔ, kókóli Bulu ɔbéé, “Mí Sí, ní ibówa alé á, ha

<sup>m</sup> 26:28 Ntam pópwe bu nwuló dada amu akutɔ.

ntá-ewe ánfí" utsun musu. Táme megyí tóá ndeklé, mboún múbá fudeklé íbá mótó."

<sup>40</sup>Múbú oleyinkí ba akasípú amu wá bowun ání budedídi. Íni su ɔlefíté Petro ɔbéé, "Múbú su mlimétalí tsíá, mía mlinyɔ agyo dɔnhwírí kule kpán? <sup>41</sup>Mlɔgyo amlíkókoli Bulu, méni mlimóowie ɛsókito, tsúfé mli ɔhé deklé, táme nyankpusa-oyí lɔpɔn."

<sup>42</sup>Yesu létrá yókokóli Bulu ɔbéé, "Mí Sí, ní ntá-ewe ánfí mɔɔtsun musu, íbwé alágyíalíá nónu múbú á, múbú tóá fudeklé íbá mótó." <sup>43</sup>Ɖletrá yinkí ba bowun ání akasípú amu butráa budedídi, tsúfé dídí de amú bu.

<sup>44</sup>Múbú su ɔlenatí sí amú, trá yókokóli Bulu otse saasi, bí asún ámu kén. <sup>45</sup>Oleyinkí ba akasípú amu wá, befíté amú ɔbéé, "Mlulatráa si mlida mlidé ɔkpúnú da? Mlíki, bré ámu lafun ání bɔpu mí, Nyankpusa-Mu-Bi ánfí wá lakpan abwepú íbɔɔ. <sup>46</sup>Mlíkusú ayɔ. Mlíki, ɔhá ámúbú ɔde mí le há ámu ná á."

### Yesu Kítá

(Marko 14:43-50; Luka 22:47-53; Yohane 18:3-12)

<sup>47</sup>Yesu ɔnó mesi asa \*akasípú dúanyɔ ámutɔ ɔkuleá butetí mu Yuda lóbowie unu. Ɖɔɔm kpɔnkpɔnkpɔntíá bude ndayí pú nkpotí bubuo mu. Bulu igyí ahapú dehen pú Yudafo ahande amu lówa amú. <sup>48</sup>Yuda amúbú ɔbéle Yesu há ámu lébláa ɔɔm amu yái ɔbéé, "Ɖhá ámúbú nélatá pútá ámu gyí ɔhá ámu ni. Mlíkita mu."

<sup>49</sup>Íni su ɔlenatí laa yéha Yesu itsíá ɔbéé, "Osunápú, tsia ní!" Ɖlelatá mu pútá.

<sup>50</sup>Múbú Yesu lébláa mu ɔbéé, "Agya, bwe tóá ɔbwekpá feba."

Unu ahá ámu benatí tó Yesu, kítá mu kínkíínkín. <sup>51</sup>Unu Yesu akasípú amutɔ ɔkule lɔtswi mu ɔdayí, kpá Bulu igyí ɔhapú dehen osúmbi ɔku ɛsu lé. <sup>52</sup>Múbú Yesu lébláa mu ɔbéé, "Yinkia fú ɔdayí wa múbú ɔfletɔ. Tsúfé ɔhá ání ɔtenatí kítá ɔdayí á,

<sup>n</sup> 26:39 Ntá-ewe ánfí igyi iwɔsun ání Yesu obówun.



ɔdayí ɔnɔ otesin. <sup>53</sup>Fumeyín fɛɛ nétalí kókóli mí Sí ɔbéha mu abɔpu tsɔtsɔɔtsɔ akú dúanyɔ béba bɔkɔ ho mi? <sup>54</sup>Táme ní ibá alí á, nkáli ɔbɔwe asa Bulu asun wanlínhé amu ɔbéba mútɔ?”

<sup>55</sup>ɛnu Yesu léfité amú ɔbéɛ, “Ogyo otswapú ngyi, sù mlulatsú nkpotí pú ndayí mlebá mí ɔkutákpá? Ntsie mli wá Bulu ɔtswékpa unu ekekegyíeke nde mli atɔ suná, mli mékítá mí ekekeeke. <sup>56</sup>Táme ínɛ fée laba mútɔ, méni Bulu ɔnɔsú atɔpú asún wanlínhé amu ɔbéba mútɔ.”

ɛnu akasípú amu fée besrí sí mu.

### Yudafɔ Ahande Ansító Lú

(Marko 14:53-65; Luka 22:54-55, 63-71;

Yohane 18:13-14, 19-24)

<sup>57</sup>Mú Yesu akítápú amu bekpa mu ya Bulu igyí ɔhapú dehen Kaiafa. ɛnú mu Mose mbla asunápú pú Yudafɔ ahande amu befia ni. <sup>58</sup>Táme Petro lépetí obuɔ amú ɔma tsútsúútsú alu bowie igyí ɔhapú dehen wóyítɔ unu. Oleyétsiá amú agyópu wá, méni obówun alá asún ámu ɔbɔmɔ ɔnɔ. <sup>59</sup>ɛnu Bulu igyí ɔhapú dehen amu mu Yudafɔ asún agyípú amu fée bodunká ahá ání béka asún dínká Yesusu, méni béli mútú mú mu. <sup>60</sup>Afunupu tsɔtsɔɔtsɔ bedali ba, táme amú fée ɔnɔ ɔtsun ɔtsan. Mú ɔma a, ahá abanyɔ bedali belí ahande amu ansítɔ, <sup>61</sup>blí beɛ, “Oyin ánfɛ lébli ɔbéɛ, ‘Néталí bwíé Bulu ɔtswékpa amu, lápú nkensá yi mú.’ ”

<sup>62</sup>Mú Bulu igyí ɔhapú dehen amu ɔkúsú líí fíté Yesu ɔbéɛ, “Fuma ɔnɔ lé? Fuma asvansu bí pólé fú ɛwɛ?” <sup>63</sup>Táme Yesu móbwíí ɔnɔ. Bulu igyí ɔhapú dehen amu lélabláa Yesu ɔbéɛ, “Neká Bulu ɔkɔankpapu amu, ní fúgyí Kristo, (ɔhá á múú Bulu ladá mu ofúli), ogyi Bulu mu Bi ámu a, bláa anu.”

<sup>64</sup>Mú Yesu lébláa mu ɔbéɛ, “Mú fablí á. Táme mli bí ání tsú nde púya a, mlówun mí, Nyankpusa-Mu-Bi ánfɛ ntsie Bulu Otúmípu gyɔpɛsu ánfɛ, ndin ɔsúsú nwlótáasu nebá.”

<sup>65</sup>Mú Bulu igyí ɔhapú dehen amu lékítá mu atadiɛ báli mú kɛaan,<sup>o</sup> bí ɔbéɛ “Alabɔ mbusuo! Adánsɛ mɔmu antráa

<sup>o</sup>26:65 Ilosuná ání asún ámu lawíé mu twɛtɔ dubi.

anigyó? Yéé mlilanú abususu ání alablí. <sup>66</sup>Nkálí gyí mli agywun?”

Bebláa mu beε, “Ilehián ání obówu!”

<sup>67</sup>Ἰησοῦς botutúu atsonó wulí mu ansító, πῶς μὲν μὲν atswε. Aku é bedadáa mu asuto, <sup>68</sup>Ἰησοῦς mu beε, “Bulu onósú otóipó Kristo, ma ladá fú? Bla aní.”

### Petro Lóswú Obéε Mmeyín Yesu

(Marko 14:66-72; Luka 22:56-62; Yohane 18:15-18, 25-27)

<sup>69</sup>Petro tsie wunsinéésú unu, otsibi oku lóbotu mu. Obebláa Petro obéε, “Fúá Yesu Galileayin amu nyo ná.”

<sup>70</sup>Támε Petro lówa onólí ahá ámu féé ansító obéε, “Mmeyín asún ánfí fudeblí ánfí iwí kukukú.” <sup>71</sup>Mú oma wóyí onó unu é á, otsibi oku é lébi Petro. Mú su obébláa ahá ání bulú unu obéε, “Oyin ánfí muá Yesu Nasaretyin amunyó ténátí.”

<sup>72</sup>Ἰησοῦς Petro lópu onólí ká ntam, blí obéε, “Mmeyín mu.”

<sup>73</sup>Mú oma a, ahá ámú bulú unu ámutu aku beba bebláa Petro beε, “Lélé mú á, anyin ání fúá Yesunyó ná, tsúfé fú tótu de aní suná alí.”

<sup>74</sup>Ἰησοῦς Petro lówa ntam kakáa bí obéε, “Neká tógyító, mmeyín oyin ámú mlidé mu iwí asún blí ámu!”

Ἰησοῦς bate lókon. <sup>75</sup>Petro lékaín ání Yesu lébláa mu obéε, “Fóswú tse sa féε fómeyín mí asa bate obéε onó.” Ἰησοῦς obedali híé yósu.

### Yesu Kpa Ya Pilato

(Marko 15:1; Luka 23:1-2; Yohane 18:28-32)

**27** <sup>1</sup>Ἰησοῦς kehe nyanki-nyanki a, Bulu igyí ahapú dehen pú Yudafo ahandε amu bekitá agywun beε, bómo Yesu. <sup>2</sup>Mú su beklí mu, pú mu yówa Pilato ibuto. Mogyí Roma onandéá ode Yudea omású gyí ní.

### Yuda Iskariot Iwí Sián

(Gyumagyihe 1:18-19)

<sup>3</sup>Yuda amú obéε Yesu há ámu lówun ání bahá Yesu onó. Ulehan mu. Mú su oleyinkía sika futútúu aduasa ámu

ya Bulu igyí ÷hapú dehen pú Yudafɔ ahande amu. <sup>4</sup>Ɔlebláa amú ɔbé, “Nalé ÷há ání ɔmɔkúbwé lakpan kuku há. Mú su nabwé lakpan.”

Mú bēbláa mu bē, “Animéyín mú iwí kuku. Fú asón igyi.”

<sup>5</sup>Mú su Yuda lótswi sika futútú ámu sísí amú Bulu ɔtswékpa wunsinésú unu, náti yésían iwí.

<sup>6</sup>Bulu igyí ahapú dehen amu bɔtɔsí kóba amu, blí bē, “Ani mbala meha ɔkpa ání apúu kóba anfi odu wa Bulu ɔtswékpa kóbatɔ, tsúfé mú iwí metun. Obugya kóba igyi.”

<sup>7</sup>Mú su bɔbwe agywun, pú kóba ámu yóho ató ɔpwepú ɔku ɔsulú, pú unu bwé afɔɔ ání bubu Yerusalem opulákpá. <sup>8</sup>Ínu su bɔtu nde butetí unu bē, “Obugya ɔsulú.”

<sup>9-10</sup>Ínu léha Bulu asón ámúú ɔleblí tsun mu ɔnɔsú ɔtɔipú \*Yeremiasu ámu léba mútɔ. Ɔbé, “Botsu sika futútú advasa ámúú Israelfɔ begyi mu ibía, ho mu amu yóho ató ɔpwepú ɔku ɔsulú fé alía Bulu lébláa mi.”

### Yesu Líí Pilato Ansítɔ

(Marko 15:2-5; Luka 23:3-5; Yohane 18:33-38)

<sup>11</sup>Yesu líí ɔmáasú ɔkípu Pilato ansítɔ. Mú Pilato léfuté mu ɔbé, “Fúgyí Yudafɔ owíe amu ni?”

Yesu lébláa mu ɔbé, “Ee, mú fablí á.” <sup>12</sup>Táme bréá Bulu igyí ahapú dehen pú Yudafɔ ahande amu beka asón dínká Yesusu á, ɔmele kuku ɔnɔ.

<sup>13</sup>Mú Pilato léfuté mu ɔbé, “Fumedé asón ánfí bakla dínká fúsú ánfí nu?”

<sup>14</sup>Táme Yesu métepi bwíí ɔnɔ. Mú su ilobwie Roma ÷hande amu ɔnɔ.

### Yesu Lowu Ipón Ha

(Marko 15:6-15; Luka 23:13-25; Yohane 18:39–19:16)

<sup>15</sup>Ofífyíofí, ní bude Israelfɔsu \*Katsun Nke gyí a, Roma ÷hande amu tesí obu ɔdipú ɔkuleá ɔdɔm amu budeklé há amú. <sup>16</sup>Alí bré ámutɔ á, obu ɔdipú ɔkúvá alahɔ dá, butetí mu Baraba da obu. <sup>17</sup>Mú su bréá Yudafɔ ámu féé bebefia

a, Pilato léfuté amú ɔ́bée, “Ma nsíi ha mli? Baraba lóó, ntée Yesu, butetí mu Kristo amu?”<sup>18</sup> Tsúfě Pilato yin ání Yesu wu olu sù Bulu igyí ahapú dehen pú Yudafɔ ahande amu bakítá mu ba mu.

<sup>19</sup>Bréá Pilato tsie ɔ́de Yesu asún ámu gyí a, mu ka lówa obí mu wá ɔ́bée, “Mábwe oyin ánfɔ mu asún da ɔ́kpa ánfɔ tɔtɔ. Tsúfě ígye onyé á, nokun okude wun mu, ifú lehié kítá mí.”

<sup>20</sup>Táme Bulu igyí ahapú dehen pú Yudafɔ ahande amu beha ɔ́ɔm amu ɔ́nɔ́ bée, bukókoli Pilato osi Baraba, abumu Yesu. <sup>21</sup>Mú su Roma ɔ́handede amu lélafíté ɔ́ɔm amu ɔ́bée, “Ahá abanyɔ́ ánfɔtɔ ɔ́mɔmu nsíi ha mli?”

Botsu ɔ́nɔ́ bée, “Baraba!”

<sup>22</sup>Mú Pilato létrá futé amú ɔ́bée, “Ntɔ mbwée Yesu, butetí mu Kristo, (ɔ́há ámú Bulu ladá mu ofúli amu)?”

Amú féé bebláa mu bée, “Ha abuda mu manta oyikpalíhesu!”

<sup>23</sup>Pilato léfuté amú ɔ́bée, “Ntogyi su! Tsitsa mɔmu alabwé?”

lnu belakplún kúklókú bée, “Ha abuda mu manta oyikpalíhesu!”

<sup>24</sup>Bréá Pilato lówun ání alabwé kásíán, kpokiti mboún deklé ida inu á, olotsu ntsu fwí ibi amú ansítɔ́ inu, bláa amú ɔ́bée, “Mí ibi anyɔ́ uma oyin ánfɔ lowutɔ. Mli asún igyi.”

<sup>25</sup>Yudafɔ ámu féé bebláa mu bée, “Mu lowu isubítí íbá anu aní abí-anású!”

<sup>26</sup>lnu Pilato lési Baraba há amú, ɔ́leha mu isá akɔ́pú bepití Yesu atɔ́, ɔ́ɔpu mu wá amú ibutɔ ɔ́bée, buyéda mu manta oyikpalíhesu.

### Yesu Ahinlá Bwe

(Marko 15:16-20; Yohane 19:2-3)

<sup>27</sup>lnu ɔ́má sù ogyí pú amu isá akɔ́pú bekpa Yesu ya mu wóyítɔ́. Beti amú aba isá akɔ́pú atráhe amu féé, beda Yesu ɔ́bun. <sup>28</sup>Bɔwɔ́ Yesu atadié, pú ligá pepe ku wá mu. <sup>29</sup>Bɔlu obungyo-awu, bwé mú owíepa bun mu nwun. Bɔpu oyí ku wá mu gyɔ́pɔ́ ibutɔ, fé akɔ́nfra. Beda akpawunu mu

ansító, bude mu ahinlá bwe bee, “Yudafɔ Owíe, fú nkpasu ɔnlinsu!” <sup>30</sup>Botu atsunó wúlí Yesu, swíí mu oyí ámu púpítí mu nwuntɔ. <sup>31</sup>Bɔbwe mu ahinlá tá á, bɔwɔí amú ligá pepe amu, yínkía mu onutó atadiɛ wá mu, bekpa mu dálɔ bɔyɔ abuyɛda mu manta oyikpalíhesu.

### Yesu Da Mántá Oyikpalíhesu

(Marko 15:21-32; Luka 23:26-43; Yohane 19:17-27)

<sup>32</sup>Bréá bɔyɔ á, befia Kireneyin ɔkuá butetí mu Simon. Isá akɔpú ámu beka mu híe bee, ɔhɔɔ oyikpalíhe amu sɔra. <sup>33</sup>Boyówie ɔtinekuá butetí unu Golgota. Mú asi gyí, “Nwun Okokobi Otsiákpá.” <sup>34</sup>Bɔpu afá kítákítá wá ntátó tin Yesu ɔnɔ bee onúu, táme bréá ɔleda mú ɔnɔ á, olekiná nu.

<sup>35</sup>Beda mu mántá oyikpalíhe amusu tá á, beye mu atadiɛɔ. Inu bɔtsɔwɔ abi púkɔ ɔhagyíɔha ogyíkpá. <sup>36</sup>Besi butsie unu, bude mu iwɔ gyóo. <sup>37</sup>Múu bɔwanlín tɔá svá bude mu da mántá oyikpalíhesu, dá mántá mu awunso bee, “YESU, YUDAFɔ OWÍE AMU NI.” <sup>38</sup>Beda awikplu abanyó é mántá nyikpalíhesu tsía mutɔ. Ɔkule bu mu gyɔpɔsu, ɔkule é bu mu binasu.

<sup>39</sup>Inu atsunpu bɔkpukpúu nwuntɔ, blí Yesu iwɔ abususu bee, <sup>40</sup>“Yéé fú fɛé fétalí bwíé Bulu ɔtswékpa amu, lápwe mú nkensá owító ní? Hɔ fú iwɔ! Ní lélé Bulu mu Bi fúgyi á, kplɔ tsu oyí ámusu aki.”

<sup>41</sup>Alí kén Bulu igyí ahapú dehen, Mose mbla asunápú pú Yudafɔ ahandɛ amu é bɔbwe mu ahinlá ní. <sup>42</sup>Bɛblí bee, “Ɖlɔhɔ ahá nkpa, táme ɔmetalí hɔ mu iwɔ. Ní mɔgyí Israelfɔ owíe amu a, ɔkplú tsu oyí ámusu, méni abɔhɔ mu gyi. <sup>43</sup>Yéé ɔbéé Bulu mu Bi mɔgyi, mu ansí dɔn Bulusu. Bulu ɔlé mu séi, aki ání otekle mu asún.”

<sup>44</sup>Alí kén awikplu ámutú beda mántá nyikpalíhesu mu wá ámu é bɔbwe mu ahinlá ní.

### Yesu Lowu

(Marko 15:33-41; Luka 23:44-49; Yohane 19:28-30)

<sup>45</sup>Owí leta ɔsulúv amusu féé, tsú dódúanyɔɔ alu yɔfɔn ntúpwe dɔsato. Owí metrá lun ɛ. <sup>46</sup>Dɔsa ámutɔ á, Yesu

lókplun kúklókúú \*Hebri ɔblítɔ ɔbéé, “Eli, Eli, Lama Sabaktani?” Mú así gyí, “Mí Bulu, mí Bulu, ntogyi sú fakpá mí ɔma?”

47Bréá ahá ámúú bulú unu ámutɔ aku bonu asún ánfí á, beblí beé, “Ɔde \*Elia kpolí.” 48Unu amúúú ɔku lésrí yótsu ɔsapɔ, púdá ntá ɔdáúú, púyí oyísú, tsú mú fúá, pútín mu ɔnɔ ɔbéé onúu.

49Táme mu aba atráhe amu bebláa mu beé, “Si, alu kí beé Elia ɔbéba ɔhɔ mu.”

50Yesu létrá kplón kúklókúú, ɔlele ɔhé.

51Unu Bulu lébalí tati ámúú ɔpɔká Bulu Ɔtswékpa obu ámutɔ anyɔ, tsú awunso beyi así kĩaan. Bulu léha ɔsulúú lekpunkí, ɔleha abutá lemamáun. 52Olefinfínki ntsán, aha wankíhé tsɔtsɔɔtsɔ ɔkɔsú tsú afúlitɔ. 53Yesu kúsú tsú afúlitɔ ɔma a, aha wankíhé anfí bakúsú tsú afúlitɔ ánfí ɔyɔ Yerusalem wúlu wankíhé amutɔ, yéle iwí ɔwan súná ahá tsɔtsɔɔtsɔ.

54Bréá isá akɔpú ɔhande pú isá akɔpú ámúú bude Yesu iwí gyóo amu bowun ɔsulúkpunkí ámu pú tɔá ide músú yɔ féé á, ifú lehe kítá amú, beblí beé, “Lélé, Bulu mu Bi óyin ánfí gyí.”

55Atsi tsɔtsɔɔtsɔ bobuo Yesu, bude musu kí tsu Galilea ɔmátɔ. Amú é besi lú tsútsúútsú, bude mu kí sisí. 56Amúúú aku gyí, Magdalayintse \*Maria mua \*Maria ání ɔlɔkwí Yakobo mua \*Yosef pú Sebedeo mu ka ání ogyi Yakobo mua Yohane aná oyín.

### Yesu Pulá

(Marko 15:42-47; Luka 23:50-56; Yohane 19:38-42)

57-58Bréá owí depɔɔn a, Arimateayin iwí onyapú ɔkúá butetí mu Yosef, alamlí Yesu ɔkasípú lóyɔ Pilato wá, yókulí mu ɔbéé, osíi Yesu fúli amu ha mu. Pilato léha ání busíi fúli amu ha mu. 59Mú su Yosef lópu ɔhráda ání uletin wankláán kíklí fúli amu iwí, 60ɔlɔpu mu yówa ɔbɔ pɔpwe ání aladá butátɔ yáí há mu iwí. Múú olemináa ibwi yíléyílé ku tin ɔbɔ ámu ɔnɔ, ɔlenatí. 61Magdalayintse Maria mua Maria nyɔɔsi amu besi butsie unu fún bude ntsán ámu kí sisí.

### Yesu Ntsán Gyo

62Yudafɔ ɪwɪsɔ ɔdaké ɔyi kehe, igyi \*ɔkpónú ɔdaké á, Bulu igyí ahapú dehen, Farisifɔ ámu féé pú Pilato befia. 63Bebláa mu beɛ, “Owíe, anɪlakáɪn ání bréá ofunupu anfi tsie nkpa á, ɔleblí ɔbéɛ, ‘Nkensá ɔma a, Bulu ɔbélakúsúa mi tsú afúlitɔ.’ 64Mú su ha abuyogyo mu ntsán ámu ɔnɔ wankláán, yɔfun eke sáásí. Ní megyí alɪ á, mu akasípú amu bóyówi mu lé, bemlé ahá beɛ alakúsú. lbá alɪ á, akasípú amu ahámlé bóɔvɔn mu kle.”

65Pilato lébláa amú ɔbéɛ, “lsá akɔpú ní. Mliha amú abuyogyo unv wankláán alɪá mlétalí.”

66Mú su beyétan ɔbɔ ámu ɔnɔ wankláán, há agyópu bogyo mú asi.

### Yesu Kusú Tsú Afúlitɔ


(Marko 16:1-10; Luka 24:1-12; Yohane 20:1-10)

**28** 1Yudafɔ ɔkpónú ɔdaké ɔyi kehe, igyi Kwasiada bake a, Magdalayintse \*Maria muv \*Maria nyɔɔsi amu bɔkusú yɔ Yesu ntsán ámu ɔkíkpa. 2Inunv á, ɔsɔlúv lekpunkí kúklúkúv, Bulu-ɔbɔpu lékplí tsú ɔsúsú bemináa ibwi yilé ámu lé ɔbɔ ámu ɔnɔ, tsíá músú. 3Mu ansítɔ lehiɛ wankí, ɪɛ ogyá kpa. Mu atadiɛ é lofulí futútúútú fé opuli-mpútɔ. 4Bréá bowun mu a, ifú lehié kítá unv agyópu amu, bekpunkí kpakpakpakpa, dɪda, lwíí fé afúli.

5Bulu-ɔbɔpu amu lébláa atsi ámu ɔbéɛ, “Mlumánya ifú! Nawun ání Yesu amúv beda mántá oyikpalíhesv ámu mlɪdédunká. 6ɔma nfi. Bulu lakúsúa mu fé alɪá ɔleblí yái. Mlibekɪ ɔtíné amúv ɔbɔpu mu tswɪ amu. 7Mliwa ɔsa yebláa mu akasípú amu mliha, Bulu lakúsúa mu tsú afúlitɔ. Alagya mli nkpa ɔyɔ Galilea ɔmátɔ. Inú mlówun mu ni. Asún ání mbv ha mli ní.”

8Ifú lekítá atsi ámu, táme ɔbɔpu ansigyí tsíí ɔsrú tsú opulákpá unv ɔyɔ yébláa akasípú amu tɔá bawun.

9Imɔwa ɔpá kvkv Yesu léfia amú, há amú ité. Inv beda akpawunu kítá mu ayabi, súm mu. 10Yesu lébláa amú ɔbéɛ,



“Oma nfi. Bulu lakósúa mu fé alíá ñeblí yáí.” (Mateo 28:6)

“Mlumánya ifú. Mliyebláa mí apíó ámu mliaa, buyó Galilea òmátó. Inó bówun mi ní.”

**Ntsán Agyópu Amu Asun Klahe**

11 Bréá atsi ámu boṣu boṣy á, ntsán agyópu amu aku é boṣo wúluto yébláa Bulu igyí ahapú dehen amu tsá ulaba féé. 12 Inu su Bulu igyí ahapú dehen amu beti Yudafo ahande amu féé fía, kítá agywun. Beha ntsán agyópu amu kóba tsotsotsots. 13 Beha amú ònó bee, “Mliṣli mliaa, ‘Onyé, bréá anidédidi á, Yesu akasípú amu béba bowi mu náí.’



14Ní Roma ɔhande onú á, ania munyo abéblí mú, méni mluṃóowie asúntó.”

15Mú su ntsán agyópu amu botsulá ho kóba amu, begyi dinká Bulu igyi ahapú dehen amu asun blíhé anfisú. Onó ánfu beha amú ánfu lobwie wá Yudafɔ ɔmá ámu féétó bɔfun nde.

**Yesu lwɔwanle Súná Mu Akasípú**

(Marko 16:14-18; Luka 24:36-49;

Yohane 20:19-23; Gyumagyihe 1:6-8)

16Akasípú dúɔkun ámu benatí yó Galilea ɔmátó, ibu ámú Yesu lósuná amú ɔbéɛ bufia mu mósú ámusu. 17Bréá bowun mu a, beda akpawunu súm mu, táme umɔwankí amútó aku ání mu ni. 18Múú Yesu lókpukpé ba amú wá, blí ɔbéɛ, “Bulu lapú ɔsú mba asi túmi féé wá mí ibitɔ. 19Mú su mlyɔ ɔyító féé, amlibwe ahá féé mí akasípú. Mlibɔ amú \*asú ɔsí, Obí pú ɔɲe Wankíhé dátó. 20Mlɔsuna amú abugyi mbla ámú nɔwa há mli ámu féésú. Mlibi ání mbu mli wá brégyíbré, yófun ɔyí ɔnómɔ.”